

Maol Aposeli Basef bandami ma Maol aposeli

1:1-26 Jisas na'ipa alupumi ananimi ma maol ea' nalata heven ilif
 2:1-8:3 Alupusi Jisasi sofa' pepel Ambal Bu'unai Godi ma sonda' maol sowalipasa basef felefele'ma Jerusalem
 8:4-12:25 Alupusi Jisasi safe' sawalipasa basef etap hiagoma Judia naloma Samaria
 13:1-21:16 Pol nafe' wambel hiagoma nawalipasa basef Jisasi epes hiesi
 21:17-28:31 Pol nafe' Jerusalem na'ipasa basefa maol anan nanda'anai nagiambama esis Kristen hiesi ma basef Godi ea' esis Juda sanda' kotimana nafe' nanda' kalabus Rom. Ea' dembinai gavman name' basef ananimi.

¹ *Alupinai Tiofilus, buk anama fowa' ae' anda'anai*

anda' basefa amamaga hiami Jisas nanda'ami nawalipa esis amam nematawa

² *ma dambadamba nali' nanda'am ea' nafi'i natagama nemaf anama God nofa'ana nalata gani heven ilif. Fowa' Jisas owa' ata' nolata heven ilif, Anan nali' nase'ama basef amama na'ipam

* **1:1:** Lu 1:3 * **1:1:** Luk nanda' basef amama ma amam aposel manda' maol Godi. Ea' nanda' anona buk fowa' nali' nanda'anai nafe'ma Tiofilus, buk anama basef bu'wami Luk nanda'ami.

* **1:2:** Mk 16:19; Lu 24:49-51

mehipa maol amam aposel amama Anan nandandepami. Anan nase'ama maol amama pepel anama Ambal Bu'unai Godi.

³ *Fowa' saha Jisas nefal' nimanimi lu'wami naga' ea' notanima nohafel wapotl' nafe' natagama alupumi ananimi. Ea' nape aon sil'inai tu'waninai nanda' pepel hianai ma nihi'ambam mogawa endilisi anan nofa' ambal namunai nape. Nimeguf amama Anan nawalipasa epes hiesi siowis wambota Godi numafias.

⁴ *Anan ata' nape nalomam na'ipam mehip na'i, "Ipe' dei' ina pekwha Jerusalem ulal, owa'. Pepe pehafa amamaga amama Ahalome na'i endilisi niesi'ipami. Amama fowa' ae' a'ipipami.

⁵ *Fowa' Jon napisil' amam nematawa hiesi embel. Ea' ipe' nambimb God nondal' baptaisimipa Ambal Bu'unai Ananinai."

⁶ *Nemaf anama amam alupumi Jisasi mandatama etifigin mahali'ana ma'i, "Dembinal, a'i nambimb nogota anae' ine' nenda' ape' mofa' agof lu'wami ma motofa esis naumbih ma afa' atofa umafi wambel hiagoma afa'ima?"

⁷ *Ea' anan na'ipam na'i, "Amama ina amamaga ipe'imi ma pegawa nogota anama ma nimeguf Ahalome nandandepami, owa!. Anan atona numafi amama.

⁸ *Ea' basef ipe'imi amama. Nambimb Ambal Bu'unai Godi nifi'mai ipe', nemaf anama pefa' pepel Ananinai, pewalapa basef Ae'ami Jerusalem

* **1:3:** Lu 24:36-49; Ap 10:41 * **1:4:** Lu 24:49; Jo 14:16-17; Ap 2:33

* **1:5:** Mt 3:11 * **1:6:** Lu 24:21 * **1:7:** Mk 13:32 * **1:8:** Mt 28:19; Lu 24:48; Ap 2:32; 3:15; Ap 5:32

ea' ganima etap hiagoma Judia ea' ganima etap hiagoma Samaria, ea' pefe' anama etap wambel hiagoma hi'ilagon."

*Jisas nalata heven
(Mk 16:19-20; Lu 24:50-53)*

9* Jisas na'i basef amama hi'alam, esis ata' saitu satiligin etin, sati Anan nandegia nakwaha etap nalata ilif. Ea' anom elagw mofa'ana mafe' ea' ina satolona wapot'i, owa'.

10* Anan nafe' ea', esis ata' saitu satologon etin ilif otaga, ea' dei' atef anom amam biam mola klos afitimi mondokwama mataga malomas maitu.

11* Ea' ma'ipas ma'i, "Ipe' amam nematawa Galilipei, ipe' ina pitu piti otaga ilif, owa'. Jisas anama dei' God nofa'ana nakwahipa ea' nofa'ana nalata heven ilif. Anona nemaf notanima nifi'i petolona na'ama etin si'i dei' paitu patolona nalata heven ilif."

Esis sandandepa anona aman noho'ofa Judas

12* Ea' esis sakwaha halaf anama lawah oliv motawama, sotanima safe' Jerusalem. Halaf anama ina laogona Jerusalem, owa', felefele'. Kilomita atotona si'i esis Juda safe' safi'i nemaf anama sabat sapoma noma'wanai.

13* Esis sotanima safi'i Jerusalem, safe' sawis ipat ea' safe' sape ipat ilif esis sapeinai. Agof amumi amama. Pita naloma Jems naloma Jon a Andru a Filip naloma Tomas naloma Bartolomyu

* **1:9:** Jo 6:62 * **1:10:** Lu 24:4 * **1:11:** Mt 26:64; Lu 21:27

* **1:12:** Lu 24:50-53 * **1:13:** Mt 10:2-4

Matyu ea' Jems, Alfius nogalomana, Judas, Jems nogalomana ea' Saimon anan wambota Seloti.[†]

¹⁴ *Amam alupumi Jisasi mandatama etifigin nimeguf hiami la'ela'ef ama manda' beten maloma anowa nematawa saloma akwa'w Maria Jisas mama'wana saloma owapana Jisasi wapot'i!. Esis hiesi sape sanda' beten etifigin.

¹⁵ Anom nimeguf mafe'ma ea', esis Kristen 120-peleis hiesi sandatama etifigin sape ea' Pita nohafel naitu na'i,

¹⁶ "Sahin owan ae'ipei, anom basef mail buk Baibel fowa' gani Ambal Bu'unai Godi na'ipa dembinai king Devit ma'iam na'ama ma'i aman anama Judas anona nemaf nonda' waf aonai ma nihi'amba Jisas naumbih Ananimi. Eaf ina naso', owa'. Nagal. Basef amama mataga alihim. God atona na'i, dei' basef amama mataga mandawalap. Fowa' Judas ina dei' nanda' waf aonai nawalapa Jisasa amam, ata' owa', nogota anama

¹⁷ Jisas nandandepana anan alupunai afa'inai nanda' maol anama Jisasi naloma afa!".

¹⁸ "Moni Judas nofa'ana waf anama aonai ananinai natala anona etap. Anan nafe' etap anama nowa opaf pe'ana kolo'alanai hi'alana afuna.

¹⁹ Ea' epes hiesi sape Jerusalem sogawa amama. Ea' diga asasinai sofala anama agiliguma sa'i Akeldama. Ape' ma'i etap anama esimbek kolo'alamai ma'oma."

²⁰ Dei' main, Pita na'i basef amama mape Buk Song ma'l'i,

[†] **1:13:** Basef amama wabota esis Seloti, niti futnot Matyu 10:4.

* **1:14:** Jo 6:42; 7:5

“ ‘Ipat ananinai anan nope wafina. Ina anona aman napaina, owa!.’

Ea' anom basef mape Buk Songi ma'i wapoti' ma'i,

‘Anona aman anona, nemaf noho'ofana nofa' maol ananinai.

21-22 Ea' dei' ape' mondandepa anona aman ape'inai noho'ofana ma mowalipasa basef amama Jisas notanima nohafel wapoti!. Ape' mondandepa anona ma amam amama mape maloma ape' ma nemaf anama Dembinai Jisas nape nalomapa. Nemaf anama Jon nawalipasa basef Godi napisil' amam nematawa embel nafl'i nafl'i nataga ma nemaf anama God nofa' Jisas nalata heven ilif nakwahепа.”

23 Pita na'iam na'ama, ea' esis Kristen sandan-depa amam biam. Anona Josep, agel wa'ana Barsabas, ea' agel wa'ana wapoti' sa'i Jastus. Ea' anona Matias.

24 Ea' esis sanda' beten na'ama sa'i, “Dembinai, ine' negawa ukup epes hiesi. Ine' nendandepa amam amama biam nihi'ambapa maina aman

25 nofa' maol aposel noho'ofa aman anama Judas. Anan nakwaha maol anama nafe' wambel aonai ma God nogwamana waf aonai ananinai.”

26 Ea' esis sanda' agof amam biam mail otamba biam. Ea' sala otamba amama mala anona malep si'i tin sakoto'mam sati otam nali' nataga agel Matias. Ea' sanda' anan nanda' maol naloma amam aposel 11-peleima monda' maol Godi.

2

Ambal Bu'unai Godi nafl'i

1 Nemaf anama lu'unai Pentikos nataga, esis hiesi sembale'efana sandatama etifigin sape ipat atotona.

2 Ea' dei' atef same' anona maf lu'unai nanda'am nafil'i heven. Maf anama name' si'i uf la'ifinai naluwi ea' ipat anama esis sapeinai si'inama maf anama.

3 Ea' sati nif ilelowa si'i melisigah pepe'atam mafe' matoma esis hiesi atona etin hi' alas.

4 Ea' Ambal Bu'unai Godi nape si'inama esis atona etin hi' alas, sa'i basef Godi ma diga naninani wambel hiagoma. Ambal Bu'unai Godi anama nanda'am mataga malogof asasimi.

5 Ea' enis Juda sanda' lotuma Godi safi'i ganima etap hiagoma safi'i sape Jerusalem.

6 Esis hiesi same' maf anama ea' enis amam nematawa hiesi safi'i sondowa'anima sape. Ea' epes isima hiesi atona etin same' esis sembale'efanai sa'i basef Godi ma diga naninani hanai. Ea' sohafel gegelalasis kwapete'as endilisi ma same' diga asasinai.

7 Esis sohafel gegelalasis kwapete'as ea' ukup matamea hiahiam. Ea' sa'iam sa'i, "Amam amama Galilimi atom, ea' dei' ma'i diga ape'inai atona etin.

8 Dei' maina ape' hiapai atona etin mame' amam ma'i diga ape'inai dende' si'i ape' mame'ama mamasapa ape'isi? Ape' mafi'i etap anama hiagoma anama,

9-10 Partia, Midia Elam ea' Judia, Kapadosia naloma Pontus Esia Frigia Pamfilia Isip ea' ape' anona etap hiagoma Mesopotamia ea' esis ganima Libia felefele'ma wambel Sairini. Ea' anepa ape' wambel Rom mafi'i mape na'ae.

11 Ape'! Juda maloma enis epes maila waf esis Juda sanda' lotuwana'i ea' ape' etap hiagoma Krit Arebia, ape' hiapai mame' amam mawalapa basefa pepel maol Godi ma diga hianai nani-nani."

12 Ea' esis hiesi sohafel gegelalasis kwapete'as, esis ukup matamea mape hiahiam. Esis etis sandahali'ma sa'i, "Amamaga amama mataga ma'imama?"

13 Ea' enis sanda' iafam sa'i, "Amam ma' embel wain hianai ea' mahaga magaol dei' ma'i basef mamumami."

Pita nawalapa basef na'iam

14 Ea' Pita nohafel naitu naloma amam aposel 11-peleim ea' noga na'i mehip nawalapa basefa esis amam nematawa hiesi na'i, "Ipe'! Juda alupipei paloma ipe' amam nematawa hipei ipe' pape Jerusalem, ipe' pembe' aligaha basef ae'ami, ma pegawa amamaga amama.

15 Ipe' pa'i amam amama manda' spak, owa!. Dei' ata' kuhimbita aon ata' natefi nail etin si'i 9 klok.

16 Ea' amamaga amama mataga si'i anona profet Joel fowa' gani na'i,

17 'God na' i,
felefele' ma nimeguf akutaimi Ae' ese'as Ambal Bu'unai Ae'anai nope amam nematawa hiesi. Ea' efela esis batawisipa ipe'isi sowalapa basef si'i amam profet ma'iam. Ea' ihi'amba amam so'umi ipe'imi mondanda'oh motolom naep mose'am mope motolom, ea' ese'ama mo'oh

mondanda'oh motolom amam hagami
ipe'mi ma ihi'ambam waf ae'anai.

- 18 Nimeguf amama ae' ese'asa Ambal Bu'unai
ae'anai nope esis amam nematawa ae'asi
sanda' maol ae'anai nefelas sowalapa
basef Ae'ami si'i fowa' amam profet
manda'ami.
- 19 Ea' enda' anona ikwaf notaga gani otaga
ilif, enda' anona ikwaf notaga na'ae etap.
Anama na'ama. Enda' nogoh hiami otaga,
enda' esimbel, nif fandumi mataga etap
anae'.
- 20 Ea' emboma aon alipunai notaga owamb
owambunai notaga akwahina si'i esimbel.
Ea' enda'am i'i nemaf Dembinai nigi'
notaga. Nemaf anama ananinai lu'unai endil-
isi. Dembinai nihi'ambapa pepel nafifili
Ananinai.
- 21 Nemaf anama ata' owa' neataga emi egafis
sofala agel Dembinai, nofa'as sotanimani.'
"
- 22 Ea' Pita na'ipas wapotil' na'i, "Ipe' epes Is-
raelipei, ipe' peme' basef amama. Dei' i'ipipa
aman anama Jisas Nasaretinai. Ipe' pegawa maol
ahalomana la'ifinai naloma pepel anama God
nanda'anai la'afena ipe' ma lagel aman anama.
Amama mihi'ambepa andeande' aman anama
God nasapa'ana nafi'i.
- 23 Fowa' gani God nogawa ea' nail okom Anan-
inai atona nanda' aman anama nefe' nope lagof
ipe'imi. Ea' amam amama mololama mi'uli
Godi sanda' waf aonai, amam magiambama

ipe' pembale'ana paundana nail lawag usi'inai tu'wanainai ea' pahana naga'!

24 Ea' God nafelona nohafel wapot'i nakwaha ekep pahana ma naga'i. Dei' main, ga' anama ina la'ifina ma nombale'ana, owa'!

25 Fowa' gani Devit na'i basefa Jisas na'i,

'Ae' ati Dembinai ae'anai nape nalome wa'ol lagel ae'anai da'isinai la'ela'ef. Na'ama dei' ina enis epes la'ifisa sanda'me anom nimanimi, owa'!

26 Amama atom dei' okom ae'anai nandanifel. Ae' i'i basef bu'wami i'i, ae' egawa endilisi nambimb anona nigiambame epe andeande'.

27 Dei' main, anona nemaf ina nekwaha ambal ae'anai nef'e nepe anama epes saga'i sapoma, owa'. Ea' ina nambimb nekwaha aman anama bu'unai nanda' maol ine'inai alop ananinai folo'olana, owa'.

28 Ine' nihi'ambe eaf nafe' natagama ambal namunai. Anona nemaf ine' nepe nelome endanifel endilisi.' "

29 Ea' Pita na'ipas wapot'i na'i, "Ipe' sahope owape ae'ipei, dei' ae' a'i ewalapa basef i'ipipana aman anama akunamapa ape'inai Devit. Anan fowa' gani naga' sawana, dei' hi'agif ananinai ata' nape la'afena ape'. Basef amama Devit ina na'ima anan atona, owa'.

30 Aman anama Devit anan profet ea' nogawa God na'i basef la'ifimi na'i endilisi gani ilif na'ama ma anona nemaf nond'a bafalomana Deviti notaga nope dembinai king si'i Devit fowa' nape king.

³¹ Fowa' gani Devit ata' nepe, anan nogawa amama God na'i anona nemaf neanda'ami. Na'ama dei' anan na'i dembinai Krais anona nemef noga' notanima nohafel wapoti!. Anan na'iam na'i, 'Anona nemaf God ina nokwahona nope anama saga'i sapoma hi'agif alop ananinai folo'olana, owa!'

³² Aman anama Jisas God nafelana notanima nohafel wapoti!. Ea' afa' hiafai wati amama dei' wa'iam.

³³ Dei' God nafelona nohafel nalata gani heven ilif ea' nepe lagel da'isinai Godi. Anan nofa' Ambal Bu'unai Godi ma Ahalomana, si'i fowa' Ahalomana na'ipana na'i endilisi nese'ana. Amama atom dei' Jisas nase'asam esis amamaga amama dei' patolom pame'am ea'!

³⁴ Dei' main, Devit ina nalata heven, owa!. Ea' anan fowa' gani na'i basef na'i,

'Dembinai na'ipa Dembinai ae'anai na'ama na'i,
"Ine' nepe lagel da'isinai ae'anai ma nepe
Dembinai neloma ae!".

³⁵ Nepe na'ama nefe' nefe' enda' naumbih ine'isi sefe' owina bowagah ine'imi ine' nikila'as." "

³⁶ Ea' dei' Pita na'iam na'ama na'i, "Dei' ape' Israel mogawa isima andeande!. Aman anama Jisas ipe' paundana lawag usi'inai tu'wanainai pahana naga', dei' God nanda'ana nataga nepe dembinai anan Krais, God nandandepana nasapa'ana nafi'i."

*Amam nematawa hiesi samboma opalef saila
God ea' sofa' baptais*

³⁷ Esis same' basef amama, maha opalef asasimi endilisi. Ea' sa'ipa Pita naloma anom

aposel sa'i, "Ipe' sahopapa, dei' ape' monda' maina mope andeande??"

38 Ea' Pita na'ipas na'i, "Ipe' hipei pemboma opalef ipe'imi pila God ea' ipe' hipei atona etin pefa' baptaisa agel Dembinai Jisas Krais ma God nokwaha waf aonai ipe'inai. Ipe' penda'am na'ama, nambimb God nese'epa Ambal Bu'unai Ananinai nope nolomepa.

39 Fowa' gani God na'i basef la'ifimi endilisimi atom na'i nese'epa Ambal Bu'unai Ananinai nope noloma ipe' peloma awasi ipe'isi soloma esis amam nematawa hiesi ata' sape lauguni anona nemaf sigi' seatagai. God Dembinai ape'inai na'iam ma nose'as Ambal Bu'unai Ananinai nope noloma epes isima. Epes amama atom anona nemaf Anannofalas sotanimani."

40 Pita ina na'ipasa basef amama atom, owa'. Na'ipasa anom basef hiami wapot'i na'ipas basef la'ifimi ma nafela ukup asasimi na'i, "Ipe' pindumafuma andeande!. Na'ama pefa' nimanimi lu'wami peloma amam nematawa dei'isi sanda' waf aonai."

41 Ea' epes emi egafis sofa' basef Pitai sombale'efam, esis sofa' baptais. Nemaf anama God nowa'ani epes hiesi wambota ananinai sataga hias 3,000-peleis sataga Kristen, ea' sape saloma esis isima amam nematawa sombale'efanai.

Esis Kristen sombale'efanai sanda' waf bu'unai

42 Amam nematawa isima sataga Kristen dambaisi esis la'ifis endilisi ma same' basef amam aposel mawalipasami sandagiambanama etin enis sahin owan sape etifiggin etin sa' gwa'aimi sanda' beten etifiggin atogon.

43 Nimeguf hiami God nanda' ikwaf lu'unai ma pepel hianai nataga lagof amam aposeli. Ea' amam nematawa hiesi umbamahas endilisi sape.

44 Ea' esis hiesi sombale'efa Kraisi sandatama etifigin atogon. Amamaga asasimi gwa'aimi maim hiami, ina asasimi atona etin, owa!. Amamaga amama hiesi atom.

45 Ea' esis sombale'efanai enis sase'asa etap asasinai naloma anom amamaga asasimi mafe'ma enis epes satalamasam. Ea' sofa' otamba ma amamaga sotambel sanda'am sase' epes isima gwa'aimi a'asi kwahusi.

46 Ea' esis hiesi nimeguf la'ela'ef safe' ipat lu'unai Godi sanda! lotuwana. Ea' safe' sa' gwa'aimi ifagw asasimi atona etin. Esis sandanifel ukup bo'om sose'as gwa'aimi ma sigiambama enis epes ea' sandanifel sa' gwa'aimi etifigin.

47 La'ela'ef esis safela agel Godi lu'una, ea' opalef esis amam nematawa hiesi sape andi'i bo'oma esis Kristen nimeguf hiami. Ea' nimeguf la'ela'ef Dembinai nofa' enis amam nematawa sotanimani sape saloma epes hiesi isima sombale'efanai.

3

Pita nanda' aman bo'wagah mondola'anai nataga bo'ona

1 Nogota anama esis Kristen sanda' betenana, Pita naloma Jon mafe' ipat lu'unai Godi ma'i monda beten. Nemaf anama ea' wambomota 3 klok.

2 Ea' anona aman bo'wagah mondola'anai nape anama, mama'wana anani'wi fowa' kolana

nape na'ama la'ela'ef. Nimeguf hiami la'ela'ef esis sanda'ana sofa'ana sahaponana nape ipat lu'unai Godi ande' felefele'ma uta sa'i bu'unai. Sanda'ana na'ama ma nondailasa moni gwa'aimi maima esis amam nematawa safe'ma lotu.

³ Aman anama nati Pita naloma Jon ma'i mofe' muwis ipat anama, nahali' amam biam ma mose'ana anom otamba anan.

⁴ Ea' Pita naloma Jon mati anan titi titi ea' Pita na'i, "Ine' ata' niti afa' biafa."

⁵ Ea' nandamboma nati amam, okom na'i mose'ana anom amamaga.

⁶ Ea' Pita na'i, "Ae' otamba siliwa gol a'e, ea' amamaga bu'wami a'i atuwasi iesi'inami amama. Ae' a'i pepel Jisas Krais Nasaretinai atona a'ipina, dei' hafel nitu nefe'."

⁷ Ea' nahapila lagel da'isinai aman anama aonai nafelona. Ea' mehip etin bo'wagah maloma nembawa ananimi la'ifim mataga bo'om.

⁸ Ea' anan nitipa' nafe'. Ea' nalommom mafe' mawis ipat lu'unai Godi nomon nandanifel kwapi' etin naitu nalemb nafe' nafela agel Godi lu'una.

⁹ Ea' esis amam nematawa hiesi sati anan nafe' nafela agel Godi

¹⁰ ea' sogawana sa'i anan ma'una aman anama bo'wagah mandola'anai, fowa' nape la'ela'ef uta anama sa'i bu'unai ipat Godi lu'unai sanda' lutuwanai nape nondailasa moni maim. Esis sati anan bo'ona sohafel gegelalasis kwapete'as ukup matamea.

Pita nawalapa basef bu'wami na'iam ipat lu'unai Godi nomon

11-12 Aman anama nandanifel ma nataga bo'ona ea' nahapila Pita naloma Jon ea' esis sasagih safi'i ma sotolona ilaf anama sa'i ilaf Solomoni. Pita nati epes isima, na'ipas na'i, "Ipe' epes Isrel, dei' maina ipe' gegelalasipa ma amamaga amama mataga? Dei' maina ipe' pati afa' biafa? Pa'l pepel afa'inai naloma waf bu'unai afa'inai atona wanda' aman anama nataga bo'ona nohafel nafe'? Owa!.

13 God anama bafapapa ape'imi Abraham naloma Aisak naloma Jekop manda' lotumanai, anan atona nanda'ana nataga bo'ona nafela agel Jisasi, nanda' maola Anani. Anan aman anama atona ipe' pandaiwa'mana pase'ana amam agufumi gavmani ma mahana naga!. Dembinai Pailat na'i notagahona nifl'i, owa!. Ipe'pandaiwa'mana pewa' alafugahana.

14 Ipe' pewa alafugaha aman bu'unai Godi. Ea' pahali'a Pailat mehipa anona aman aonai naha epes saga'i, ea' nakwahomepanai.

15 Aman bu'unai ofagena ma ambal namunai, anama ea' pahana naga!. Ea' God nafelona nohafel hi'agif wapotil ea' afa' biafa wape amam ananifai ovalapa basefa amama, wati anan nepe namona endilisi.

16 Afa' biafa ombale'efa Jisas. Anan atona nafela bale'ef afa'inai, pepel ananinai atona nanda' aman anama bo'ona naep ipe'imi hipei. Pepel Jisasi atona dei' nanda' aman anama bo'ona endilisi patolona pegawana.

17 Endilisi, alupipei, ae' egawa ipe' ina pegawa andeande'ma dei' panda' waf anama aonai ma Jisas, owa!. Amam agufumi ipe'imi wapotil

amam na'ama etin.

¹⁸ Fowa' gani God nawalapa basefa amam profet hiami ma Krais, God nandandepana nasapa'ana nafi'i. Basef amama ma'i Krais nome' nimanimi lu'wami. Ea' waf anama dei' ipe' panda'anai, anama nandahama basef amama amamumi mataga mandawalap alihim.

¹⁹ Dei' ipe' pemboma opalef pila Goda nokwa-homepa waf aonai ipe' panda'anai.

²⁰ Ipe' penda'am na'ama, nambimb Dembinai nese'epa pepel namunai ma ambagof ipe'imi. Ama nambimb nosapa' Kraisnofi'mai ipe'. Aman anama fowa' gani God nandandepana ma ipe' ea'i, Anan Jisas.

²¹ Dei' napani heven nohafa nemaf anama God nonda' amamaga hiami motaga dambaimi wapot'i. Si'i fowa' gani na'ipipa basef Ananimi endilisimi atom ma amam profet ananimi bu'wami.

²² Amama si'i fowa' Moses na'iam na'ama na'i, 'God Dembinai ipe'inai, anona nemaf nefela anona sahalomepa ipe'inai, nonda'ana Nope profet si'i ae'. Ipe' peme' basef ananimi hiami pilana.

²³ Ea' emi egafis sondaiwa'ma some' basefa profet anama, esis ina ata' sope wambota Godi, owa'. Nambimb sefe' anagon.'

²⁴ Ea' amam profet hiami, Samuel naloma amam profet mataga magi'ma anani, hiami ma'iam a nimeguf amama dei' mataga.

²⁵ Basef Godi endilisimi atom amam profet dei' ma'ipa ipe' pembale'am pilam. Fowa' gani God na'i basef la'ifimi amama naloma bafasepa

ipe'isi. Dei' basef amama mataga alihim ma mi-giambama ipe' wapoti'. Fowa' gani anan na'ipa Abraham a nona nemaf Jisas notaga na'i,
 'Anona nemaf bafasena ine'isi etis ae' igiambamas amam nematawa hiesi sope etap hi-agoma i'ipasa basef bu'wami Ae'ami.'

²⁶ Ea' God nandandepa aman anama nanda' maol ananinai, nasapa'ana nali' nafi'mai ipe' ma nonda'epa petaga la'ifipa ma pemboma opalef atona etin pekwaha waf aonai ipe' panda'anai."

4

Amam dambami Juda mumafi koti manda' Pita naloma Jon manda' kalabus

¹ Pita naloma Jon ata' ma'i maloma esis amam nematawa, amam pris maloma kepten dembinai ma amam soldia mumafi ipat lu'unai Godi maloma amam Sadyusi mafi'i.

² Amam mogawa amam biam mawalapa basef ma'ipasa Jisas notanima nohafel hi'agif wapoti'. Ea' ma'i epes hiesi sali' saga'i anona nemaf sohafel wapoti'. Amam dambami Juda ma'i basef amama amam biam ma'i ami ina endilisi. Na'ama amam mandaiwa'mam endilisi ma ma'i basef amama.

³ Ea' dei' amam mafi'i mombalo' amam biam wambomota aon nowala. Ea' manda'am manda'kalabus owamb anama mahafa wefilu kuhimbita.

⁴ Esis amam nematawa hiesi same' basef amama Jisas nohafel hi'agif wapoti' sombale'efana. Amama atom dei' esis sombale'efanai sataga hias, amam atom mataga felefele'ma 5,000-peleim.

Amam Juda manda' kotima Pita naloma Jon ma naep dambami Juda

⁵ Nemaf nagl'i amam dambami Judaimi maloma agufumi esis Judai maloma amam Juda mawalipasa mi'uli Godi, mandakolas etifigin Jerusalem.

⁶ Dembinai pris Anas nepe nali'ma pris hiami naloma Kaiafas maloma Jon Aleksander ea' anom amam wapot'i wambota Anasi mafi'i hi'alam mandakolas etifigin maloma amam dambami Juda.

⁷ Ea' amam hiami manda' amam aposel biam maitu naep amamumi mahali'am mehip ma'i, "Ipe' pefa' maina pepel pa'i maina agel dei' panda' amamaga amama? Kiam!"

⁸ Ea' Ambal Bu'unai Godi nepe si'ina ma Pita nanda'ana la'ifina na'ipam na'i, "Ipe' Israel amam dembipei peloma ipe' agufipei,

⁹ ipe' dei' pahali' afa' biafa ma wanda' waf bu'unai wagiambama aman anama bo'wagah awomunai. Ipe' pa'i pegawa anan nataga bo'ona na'imama.

¹⁰ Ipe' hipei peme' basef ae'ami pegawa andeande'. Esis hiesi Israel wapot'i seme'ama sogawam andeande' ma pepel agel Jisas Krais Nasaretinai atona dei' aman anama ambo'ona endilisi nohafel naitu naep ipe'imi. Jisas ipe' paundana lawag usi'inai tu'wanainai pahana afuna, ea' dei' God nafelana nohafel hi'agif wapot'i.

¹¹ *Basef amama mail Buk Baibeli ma aman anama ma'i,

* **4:11:** Sam 118:22; Mt 21:42

'Owap*

anama ipe' pala' ifagwi pandaiwa'mana pelefata
na'oh, dei' nandamboma nataga nape nali'
nanda' ipat anama la'ifina.'

12* Ina anona epen la'ifina nofa'apa motanimani,
owa!. Ea' anan atona. Ama ganima etap hiagoma,
fowa' gani dei' wapot'i God ina nawalapa agela
anona aman ma nigiambamapa nef'a'apa motan
imani, owa!. Ea' Anan atona."

13 Amam agufumi mati Pita naloma Jon maitu
la'ifim ma'l basef amama. Ea' agufumi mogawa
amam biam ina manda' skul, owa!. Amam
lelaimi atom. Ea' amam agufumi ukup mohafel
kwapete'am ukup matamea ma amam. Ea' mo
gawa amam biam ma'i fowa' mape maloma Jisas.

14 Ea' agufumi Judai amama mati aman anama
nali' bo'wagah mondala'anai dei' nataga bo'ona
naitu naloma Pita naloma Jon. Ea' amam ina ma'i
anom basef magwamamam amam biam, owa!.

15 Ea' ma'ipa amam biam ma mokwaha ipat
anama mandakolasanai muwis ande!.

Amam biam mawis ande', amam atom ma'i
basef mandame'mam ma'i,

16*“Afa' nambimb ata' onda' amam amama
biam wi'imama ma osoptama malogof? Dei'
main, amam manda' maol la'ifinai si'i God
nanda'anai ea' epes hiesi sape Jerusalemi so
gawam. Afa' ina la'ififa ma ombaso'mas wi'i,
'Amam ina manda' maol anama', owa!.

* **4:11:** Basef amama ma'i owap mandahama olalef mala'
ifagwami. Basef amama womun etina owap ofagema ma'i Krais
atona. * **4:12:** Mt 1:21 * **4:16:** Jo 11:47; Ap 4:18; Ap 5:28,40

17 Afa' wi'i basef la'ifimi ma amam biam ina ata' mi'ipasa basef wapotil' enis epesa agel anama, owa!. Na'ama basef amama mefe'agon hi'ilagona esis amam nematawa hiesi."

18 Ea' agufumi motanima mofala amam biam mawisi wapotil' ma'ipam basef la'ifimi ma'i, "Ipe' bipa ina ata' pi'ipasa basef amama ma agel Jisasi, ina ata' piwalipasa agel Jisasi ma enis amam nematawa, owa!."

19 *Ea' Pita naloma Jon magwama basef ma'i, "I'i afa' okwaha basef Godi ma ugi'ma basef ipe'imi, na'amai andeande'ma naep Godi? Ipe' ata' ukup mondanda'ma amama pegawam pe-walogam.

20 Afa' biafa ina feso'mafa malogof, owa!. Afa' ovalapa basef hiami ma amamaga watolom wame'am."

21-22 Ea' agufumi mowatania anom basef la'ifimi ma'ipam amam biam ma mosopama malogof, ea' makwahom mafe!. Esis hiesi safela agel God lu'una ma amamaga amama sati amam biam manda'ami. Na'ama agufumi amama Judai ina mati anom basef ofagema ma mose'ama nimanimi amam, owa!. Aman anama amam biam manda'ana nataga bo'ona, afagof ananimi mikila' 40-peleim.

Esis Kristen sanda' betena sofa' pepel Godi ma sowalapa basef Ananimi

23 Agufumi Judai matagaha amam biam motanima mafe'ma esis sombale'efanai, ea' ma'ipasa

* **4:19:** Ap 5:29

basef hiami amam pris dambami maloma agufumi Judai ma'ipamami.

²⁴ Esis same'am ea', hiesi ukup etifim sanda' beten safela agel Godi na'ama sa'i, "Dembinai, ine' nahapila ilif etapi, ine' nanda' etap otaga naoh maloma amamaga amama hiami mape.

²⁵ Fowa' gani ine' nanda' akunamapa ape'inai Devit na'i basef. Anan nanda' maol ine'inai ea' Ambal Bu'unai Ine'inai nafelona nahali'as na'i, 'Dei' maina esis owa' Judaisi ukup wandafum endilisi? Dei' maina esis epes hiesi ukup aom endilisi ma Dembinai? Owa!. Esis ina la'ifis, owa'.

²⁶ Amam king ganima etap hiagoma mandandombol maloma amam agufumi mandatama mape etifiggin manda' wandafo motofa dembinai God noloma Krais Dembinai, God nondandepana nosapa'ana nifi'i. Owa', ina la'ifim.'

²⁷ Herot naloma Pontius Pailat maloma enis epes hiesi owa' Judaisi saloma esis Israel saila basef amama Deviti sanda' kolas wambel anama atona sasombala basef Jisasi, aman anama bu'unai nanda' maol ine'inai, fowa' gani nesahe'ana ea'.

²⁸ Esis sandakolas sape etifigina sonda' amamaga hiami si'i fowa' gani ine' la'ifina okom ine'inai na'i neataga dei'.

²⁹ Dembinai, ine' okom nepoma basef hiami wandafumi esis sa'iами ea' nigiambama afa' wanda' maol ine'inai. Nenda'am na'ama ma afa' otaga la'ififa endilisi ovalapa basef ine'imi, ma afa' ina umbamahafa, owa'

³⁰ Ine' newamona lagof ine'imi nihi'amba esis

ine' la'ifinai ma nigiambama esis awes nanda'asi sotaga bo'wes wapot'i!. Ea' nenda' pepel ine'inai neloma ikwaf naninani la'ifinai ma agel Jisasi, Anan bu'unai nanda'mena maoli."

³¹ Esis sanda' betena ea', same' ipat anama sapeinai nandakoto!. Ea' Ambal Bu'unai Godi si'inama esis hiesi sataga la'ifis ea' sawalapa basef Godi. Esis ina umbamahasa amam agufumi Judai, owa!.

Kristen hiesi ukup etifim

³² Epes hiesi sombale'efi ukup etifim. Ina enin epen atitin nati anom amamaga ananimi atom, owa!.

Amamaga hiami asasimi, amama esis hiesi.

³³ Amam aposel mawalapa basef ma'ipasama Jisas Dembinai ape'inai notanima nohafel, ea' basef amamumi la'ifim endilisi. Ea' God na-giambamas endilisi ma epes isima hiesi sombale'efana.

³⁴ Esis sandagigiambanama etin. Ea' ina enin epen atitin la'afena esis amamaga gwa'aimi maim a'an, owa!. Esis hiesi ofagesa etapi ifagwi, esis sase'asam enis epes satalom sase'asa otamba. Ea' sofa'ai otamba amama safi'i,

³⁵ sase' amam aposel. Ea' amam manda'am maso' isima gwa'aimi hiahaom a'asi.

³⁶ Ea' anona aman agel ananinai Josep amam aposel manda'mana anona agel Barnabas. Agel anama ofagena na'ama, "Epen nenda' ukup epesi la'ifim." Anan anona Livai, aman anama ailan Saiprusinai.

³⁷ Anan nase'asa etap ananinai enis epes satalona sase'ana otamba nofa'am nafi'i naso' amam aposel.

5

Ananaias naloma Safaira sambaso'ma amam aposel

¹ Anona aman agilinama Ananaias, anan nepe naloma waulu'mana anani'wi Safaira. Anan nase'asa anona etap asasinai enis epes satalona.

² Ea' nofa' otamba tu'wanim atom nase'amama aposel, tu'wanim ma'oma esis. Anan nambaso'ma amam na'i otamba ea' ma'um nase'amama si'im. Waulu'mana wapot'i kogawa amama.

³ Ea' Pita na'ipana na'i, "Ananaias, ine' na'i a'e ma Satan nafi'i nawis nepe si'ina ma okom ine'inai ma dei' nambaso'ma Ambal Bu'unai Godi nambahoi' otamba tu'wanim ma etap anama?

⁴ Fowa' esis ata' owa' sotala etap, nogota anama ata' etap ine'inai atona. Ama dei' satalona ea', otamba ine'imi nimafiam. Dei' maina ine' okom na'i waf anama aonai? Ina nambaso'ma afa' atofa, owa'. Ine' nambaso'ma God."

⁵ Ananaias name' basef amama, nowa etap afuna. Ea' esis same' basef amama ma naga', umbamahas kwapete' endilisi.

⁶ Ea' anom amam so'umi mafi'i mofa' alop ananinai mowa'ana lowaf mofa'ana mafe' mawana.

⁷ Ama nogota bandana awa wenifin nafe', akwa'w waulu'mana kwafi'i kwawisi. Akwa'w ina kogawa amamaga matagama anan, owa'.

8 Ea' Pita na'ipakw na'i, "Ipe' pefa' moni anama nandahama etap anama ea' ma'una?"

Ea' akwa'w kwambaso'mana kwa'i, "Ma'una anama atona."

9 Ea' Pita na'ipakw na'i, "Dei' maina ipe' bipa pa'i basef baso'maimi pandame'mam pam-baso'ma Ambal Bu'unai Dembinai? Neme!! Amam amama mefa' waulunamena ine'inai mafe' mawana, amam mafi'i maitu uta. Atuwasi mofa' ine' wapoti' nigi'mana nefel!"

10 Ea' mehip akwa'w kowa etap felefele'ma bo'wagah Pitai afu'w. Ea' amam so'umi mawisi nomon mati akwa'w afu'w ea' mofa'akw mafe' mawa'w felefele'ma waulunama'w akwa'unai.

11 Ea' esis Kristen hiesi saloma esis amam nematawa same' basefa amamaga amama, ea' umbamahas kwapete!!

Amam aposel manda' pepel naninani si'i God nanda'anai

12 Amam aposel manda' pepel naninani hinanai si'i God nanda'anai la'afena esis amam nematawa. Ea' epes isima hiesi sombale'efanai ukup etifim sandatama etifiggin sape atogon ilaf ipat Solomoni felefele'ma ipat lu'unai Godi sanda' lotuwanaai.

13 Enis amam nematawa hiesi umbamahas, ea' ina safi'i sandatama etifiggin salomas, owa!. Ea' isima sape ande'i safela agof esis Kristen sa'i esis epes bu'wasi.

14 Ea' enis amam nematawa hiesi sombale'efa dembinai, ea' safi'i timbi tambel sawisa epes hiesi Ananisi la'ela'ef sape.

15 Esis saloma enis epes wapoti' sati pepel anama amam aposel manda'anai. Ea' sofa' awesisi safi'i sambe'as sa'oh ande' eaf, salas balatagw mamumami sofa'as safi'i. Esis ukup ma'i, i'i Pita ina nefe'ma esis, ea' hapaimi. Esis sa'i owaf nonda' ambal ananinai atona nefe' naolo'mas.

16 Ea' esis amam nematawa hiesi wambel hiagoma sape felefele'ma Jerusalemi wapoti' safi'i sandatama etifigin salomas. Esis sofa'ai awesisi safi'i salomai epes isima ambagof awami mapaisi mahambombagasi. Ea' epes isima hiesi sataga bo'wes wapoti'.

Ensel natagaha amam aposel mape kalabusi

17 Ea' pris dembinai nepe nali'ma pris hiami naloma amam amama hiami alupumi ananimi amam Sadyusi, amam kowalam endilisi ma maol bu'unai amam aposel manda'anai. Dei' main amam mati esis hiesi saila basef amamumi.

18 Amama atom dei' amam mohafel mombalo' amam aposel mase'am kalabus lu'wami.

19 Ea' owamb anona ensel Dembinai nafi'i nawisi' uta lu'unai endalelemba kalabus ea' nafelai amam aposel mawisi ande' na'i,

20 "Ipe' fo'o pitu ipat Godi lu'unai sanda' lotuwanai nomon pewalapa basefa amam nematawa hiesi ma waf hianai dambainai ma ambal namunai."

21 Ea' amam aposel mame' basef amama, kuhibbita mafe' ipat Godi lu'unai sanda' lotuwanai ma'ipa esis amam nematawa.

Pris anama dembinai naloma amam alupumi ananimi mafi'i mofalai agufumi hiami Israeli mafi'i mandakolas etifigin. Ea' masapa' basef

mafe' ipat sanda' kalabusa, mofa'ai amam aposel mafi'i.

²² Ea' amam plisman mafe' ipat sanda' kalabusa, ina mati amam aposel, owa!. Ea' motanima mafe' ma'ipa amam dambami ma'i,

²³ "Afa' watı uta ipat kalabusi sowalowana la'ifina, ea' amam plisman mumafianai maitu mumafi utagw hiami andeande!. Afa' wawisi' uta wawis nomon, ina watı enin epen, owa!."

²⁴ Ea' kepten numafi ipat Godi naloma amam pris dambami mome' basef amama ea' nomonas matamea hiahias ma'i, "Maim amama atuwasi dei' motaga?"

²⁵ Amam mape nomonas matamea mafe', anona aman nafi'i nataga na'ipam na'i, "Peme', amam amama ipe' panda'am mape kalabusi dei' maitu nomon felefele'ma ipat lu'unai Godi ma'ipasa basef esis amam nematawa."

²⁶ Ea' kepten naloma amam plisman mafe' mofa'ai amam aposel mafi'i. Ea' amam ina maham, owa!. Amam umbamaham ma'i, "Na'ama esis amam nematawa sokwaha otamba sohafa."

Amam aposel Jisasi ina umbamahama mowalapa basefa amam dambami esis Judai, owa'

²⁷ Amam mofa'ai amam aposel maitu naep amam dambami esis Judai la'afen. Ea' pris anama dembinai nape nali'ma amam prisi na'ipam na'i,

²⁸ *“Afa' wa'ipipa basef la'ifimi wa'i ipe' ina pewalapa basef pi'ipasam amam nematawa ma

* **5:28:** Ap 4:18; Mt 27:25

agel anama, owa!. Ea' ipe' panda' basef amama mape mafe'agon hi'alogon Jerusalem asi'igina basef ipe'imi. Ea' pa'i basef mailafa pa'i ofagema afa'imi, afa' waha aman anama naga!".

29 *Ea' Pita naloma amam aposel magwa basef ma'ipam ma'i, "Afa' ina ugi'ma basef epesi, owa!. Afa' ugi'ma basef Godi atom.

30 *Ipe' paunda Jisas lawag usi'inai tu'wanainai ea' pahana naga!. Ea' God anama bafapapa ape' Juda manda' lotumanai nafelona nohafel wapot'i hi'agif.

31 *Ea' God nofa'ana nalata ilif nahaponana nape lagel da'isinai ananinai. Ea' nape agilinai ma nigiambama ape' Israel hiapai. Anan na'i nofa'apa ma momboma opalef mila God nok-waha waf aonai ape' manda'anai.

32 *Dei' afa' waloma Ambal Bu'unai Godi wawalapa basefa amamaga amama hiemi afa' watolom ogawami. God nase'asa Ambal Bu'unai Ananinai ea' ma amam nematawa saila basef ananimi."

Gameliel na'ipa amam dambami Juda ma monda' amam aposel sa'ombemam

33 *Amam mame' basef amama, ukup wanda-fum kwapete'am endilisi ma'i moha amam aposel moga!.

* **5:29:** Ap 4:19 * **5:30:** Ap 3:15 * **5:31:** Ap 2:33-34; Ef 1:20;
Hi 2:10; 12:2 * **5:32:** Ap 1:8 * **5:33:** Ap 7:54

34 *Ea' anona dembinai naitu la'afena amam dambami esis Judai, anan Farisi agilinama Gameliel* anan dembinai tisa mawalipasa mi'uli Godi, ea' esis amam nematawa sanifela agel ananinai. Na'ipa amama mokwaha amam aposel miowis ande' nogota bandana.

35 Ea' na'ipa amam dambami Juda na'i, "Ipe' amam Israelipei, ipe' pindumafuma andeande'ma amam amama. Ipe' ata' ukup mi'i andeande' pili'.

36 *Ipe' pegawa nogota anama fowa', anona aman Teudas nohafel na'i, 'Ae' aman dembiwei, agiliwei.' Ea' amam hiami felefele' ma 400-peleim mafe' mailana. Ea' enis epes sahana naga' ea' amam mombale'efanai mafa' mafe' atona etin. Ea' maol amamunai nowala.

37 Anom nimeguf mafe'ma ea', nogota anama gavman nofa'asa agof esis amam nematawa hiesi, anona aman Judas Galilinai nohafel nambomefa ukup enis epes hiesi. Ea' safe' sailana safela wandaf sapa' saloma gavman sa'i sogalo'mana. Ea' sahana naga' wapotil' ea' epes isima hiesi sombale'efanai safal' safe' atona etin hi'alas.

38 Na'ama dei' ae' a'ipipa, ipe' umbamehepama amam amama pekwhahom mopano. I'i amam monda' maola epes etis, nambimb maol anama aonai nowala si'i maol amam biam do'ok ali' a'ipipami.

* **5:34:** Ap 22:3 * **5:34:** Nogota anama Pol owa' ata' Kristen, aman anama nagawa gawai Gameliel nape dembinai tisa nawalipana basef Godi. * **5:36:** Ap 21:38

39 Ea' i'i God atona nonda' amam la'ifima basef amama, ipe' ina nambimb la'ifipama pesopama amam, owa!. Na'ama ipe' pepa' peloma God!"

*Amam aposel mandanifela amam dambami
Juda manda' ambagof amamumi aoma manda'
maolan Jisasi*

40 Ea' amam dambami Juda maila basef Gamelieli ma'i, "Afa' oham etin."

Ea' mofala amam aposel mafi'i, ma'ipa amam plismana moham. Ea' ma'ipam basef la'ifimi ma'i, "Ipe' ina ata' pi'i basef amama ma agel Jisasi wapoti', owa!".

Ea' makwaha amam mafe'.

41 Ea' amam aposel makwaha amam dambami Juda mumafi kota ea' mafe' mawis ande'. Manifela God na'i aho'ma mofa' nimanimi ma agel Jisasi.

42 Amam ina makwaha maol anama mawalipasa basef bu'wami ma Jisas Anan Krais, God nandandepana nasapa'ana nafi'i, owa!. Nimeguf hiami amam mawalipa esis amam nematawa hiesi ipat lu'unai Godi, ifagw asasimi wapoti'.

6

*Esis sandandepa amam 7-peleima
migiambama amam aposel manda' maol Godi*

1 Nogota anama esis alupusi saila Jisasi sataga hias endilisi. Ea' esis Juda hiesi enis sa'i diga Griki safitap saloma enis Juda sa'i diga Hibrui ea' sa'i, "Nimeguf hiami ipe' pagiambama esis amam nematawa isima gwa'aimi maim a'asi, ea' anowa nematawa alifiwai ape'iwai owa!".

2 *Ea' amam aposel 12-peleim mati nimanimi amama ea' mofalai esis alupusi isima hiesi safi'i ma'ipas ma'i, "I'i afa' okwaha maol anama owalipasa basef Godi ma otambe'am gwa'aimi, na'ama ina andeande', owa'.

3 *Ipe' Kristen alupipei, ipe' ata' pendandepa anom amam 7-peleim la'afena ipe' mape andeande'ma naep esis amam nematawai, Ambal Bu'unai Godi nape napaim si'inama amam nomonas bu'wami mapaimi. Ama afa' onda'am mopoma mumafi maol anama.

4 Ea' afa' opoma onda' beten etin ea' wi'ipasa basef Godi amam nematawa wigiambas."

5 *Amam nematawa hiesi ukup ma'i basef amama. Ea' sandandepa Stiven, anan nembale'efa Jisasi ma Ambal Bu'unai Godi napaina nape si'inamana. Ea' sandandepa Filip naloma Prokorus maloma Nikanor naloma Timon naloma Parmenas naloma Nikolas. Aman anama Nikolas Antiokinai, fowa' nafi'i naila waf esis Judai.

6 *Ea' esis hiesi sanda' amam amama maitu felefele'ma naep amam aposeli mawamona lagofa amam manda'mam betena monda' maol anama.

7 *Ea' basef Godi mafe'agon hi'alogon. Amam nematawa hiesi sape Jerusalemi sataga alupusi Jisasi sataga hias endilisi. Ea' pris amama hiami wapotil' mombale'efa Jisas mailana.

Amam Juda manda' kotima Stiven

* **6:2:** Ap 2:41; 16:5 * **6:3:** 1 Ti 3:7 * **6:5:** Ap 8:5 * **6:6:** Ap 13:3; 14:23 * **6:7:** Ap 2:41; 16:5

8 *God nandahowema Stiven nagiambamana. Ea' nanda'ana la'ifina, nanda' ikwaf la'ifinai hinai naninanani la'afena esis amam nematawa.

9 *Ea' anom amam mohafel ma'i basef mandahianama maloma Stiven. Amam amama fowa' manda' maol mape owina enis epes ea' dei' mape wafifim.*

Ea' sofalana amam wambel Sairini naloma Aleksandria anona etap hiagoma Silisia naloma etap hiagoma Esia.

10 *Ambal Bu'unai Godi nase'ana gawa bu'unai Stiven. Amam amama hiami ma'i basef mandahianama maloma Stiven ea' amam ina la'ifima mi'i basef mikila'ana, owa'!

11 *Ea' manda' anona waf baso'maimi ma moha Stiven noga'. Ea' mofa'ai anom amam mase'am anama otamba ma'i basef ma'i, "Afa' wame' anan na'i basef nanda' Moses findiwana ea' nanda' God findiwana wapot!."

12 Ea' amam mafela opalef esis amam nematawai saloma amam agufumi asasimi maloma amam mawalipasa mi'uli Godi. Ea' esis safe'ma Stiven sombalo'ana sofa'ana safe'ma amam dambami Juda mumafi koti.

13 Ea' sanda' anom amam maitu ma mambaso'mana ma anom basef baso'maimi. Amam amama ma'i, "La'ela'ef aman anama na'i basef awami ma ipat lu'unai Godi naloma mi'uli fowa' gani God na'ipa Mosesanai.

14 Ape' mame' anan na'i, 'Aman anama

* **6:8:** Ap 2:43 * **6:9:** 2 Ti 1:15 * **6:9:** Amam amama maloma enis epes manda' lotu anona ipat esis Juda sa'i basef sapeinai, ipat anama sofalana sa'i FRIMAN. * **6:10:** Lu 21:15 * **6:11:** Mt 26:59-61

Jisas Nasaretinai nambimb nohambombaga ipat anama lu'unai Godi ea' nondai' anona waf dambainai noho'ofa waf hianai fowa' gani Moses na'ipapanai.' "

¹⁵ Ea' amam hiami manda' kolas etifiggin ipat esis Juda sanda' kotanai mati Stiven ea' mati amaga ananinai nafifil nataga si'i amaga anona enseli.

7

Stiven nawalapa basefa amam dambami Juda mumafi koti

¹ Ea' pris dembinai nepe nali'ma pris hiami nahali' Stiven na'i, "Basef amama endilisi?"

² Ea' Stiven na'ipama basef na'i, "Ipe' sahin owan paloma ipe' ahape wapot'i ipe' peme' ae'. Fowa' gani bafalomafa afa'inai Abraham nepe etap hiagoma Mesopotamia ina dei' nafe' wambel Haran, ata' owa'. Nogota anama God Dembinai nihi'ambana nafifili howalagon ea' natagamana.

³ Ea' God na'ipana na'i,
 'Ine' nekwaha wambel etap ine'inai neloma
 sahin owan ine'isi nefe' anagon laogoma
 nepe anona etap hiagoma ae' a'i
 ihi'ambenagoma.'

⁴ Ea' dei' Abraham nakwaha etap hiagoma Kaldia ea' nafe' nafe' nataga nepe wambel Haran. Ahalomana ananinai naga' ea' God nasapa'ana nafi'i nepe etap anae' dei' ape' mapeinai.

⁵ God ina dei' nase'ana anona etap anama Abraham ma nef'a'ana, ata' owa'. Anona etap kwaie'una wapot'i', owa'. Ea' God na'i basef

endilisimi atom a nona nemaf owagama anan ea' nose'ana etap anama nona nefal'ana noloma esis bafasana ananisi owagama sigi' seatagai sefa'ana ea' sepaina. Nogota anama Abraham so'uso'win ata' a'ana God na'ipana basef amama.

6 Na'ipana na'i,

'Wombota bafasena ine'isi owagama sigi seatagai sope nona etap enis epesi. Ea' epes hiesi isima enis owagama sonda' epes hiesi ine'isi aowes sonda' maol ahifinai agof a'as sope owina esis ea' sonda'as kwapete'as sope sefe' sotaga nogota launai afagof 400-peleim.

7 Ea' nona nemaf ae' egwamasa waf aonai esis Isip sonda'as kwapete'asi.' Ea' God na'i, 'Anona nemaf owagama wapotil' epes isima hiesi ine'isi sokwaha etap anama hiagoma sifi'i sope sonda' lotuma ae' etap anae!.'

8 Ea' God na'ipa Abraham basef la'ifimi endilisi ma Abraham notopa' alop ananinai. Ea' Abraham name' basef amama nailam natopa' alop ananinai ea' nola Aisak nogalomana ananinai ma nataga nimeguf 8-peleim, ea' Abraham natopa'mana alop ananinai. Anom nimeguf mafe'ma ea' Aisak nataga ahalomana Jekopi, ea' Jekop ahalomana bafapapa amama dambami 12-peleim.

9 Amam bafapapa 11-peleim nomonas aom kowalama Josep. Na'ama masapa'ana mafe' mofa' otambana enis epes Isip sao'wana nafe' nanda' maol aonai agel a'ana nape owina esis. Ea' sofa'ana safe' hiagoma Isip. Ea' God nape

nalomana.

¹⁰ Anan nagiambamana nahagofam nimanimi hiami ananimi nape bo'ona. Nemaf anama anan na'i basef naloma king Isipinai Fero, God nase'ana gawa bu'unai na'i basef nalomana ma nanda' king Fero okom nainailana. Ea' dei' king anama nanda'ana nataga nape dembinai gavmana etap hiagoma Isip ea' numafi amamaga hiami ma ipat anan kingi wapot!

¹¹ Anom nimeguf mafe' ea', nolomas lu'unai nataga etap hiagoma Isip anama hiagoma nafe'agon hi'alagon nafe' nataga etap hiagoma Kenan wapot! ea' esis sefa' nimanimi lu'wami. Ea' esis bafasapa ape'isi sape Kenani ina ata' sofa' anom gwa'aimi, owa'!

¹² Ea' Jekop name' basef sa'i gwa'aimi ma'oh gani etap hiagoma Isip. Ea' nasapa' amam bafapapa ape'imi malii mafe' dambadamba.

¹³ Ea' magi' motanima mafe'ma bif ea' Josep na'ipa amam sahopam ananimi na'i, 'Ae' Josep.' Dei' king nogawa amam wambota Josepi mafi'i.

¹⁴ Ea' Josep nasapa' basef mafe'nofalai ahalomana Jekop nakwaha etap anama lu'unai Kenan nagi'mana nafe' Isip naloma esis wambota anan-inai hiesi sataga 75-peleis.

¹⁵ Na'ama Jekop nakini' Isip naloma bafapapa ape'imi. Anom afagof mafe' ea', amam maga'!

¹⁶ Amam maga' ea', sefa'am sotanima safe' wambel Sekem sawam hi'agif anama fowa' gani Abraham nakwana otamba natalogoma ma awasi Hemoi.

¹⁷ Felefele'ma nemaf anama God na'i basef ananimi fowa' na'ipa Abraham ami mataga alihim,

epes ape'isi Israel sataga amam nematawa hiesi endilisi sape etap anama hiagoma Isip.

¹⁸ Ea' anona aman dambainai nataga dembinai king Isipunai, anan ina nogawa fowa' Josep nape dembinai ma Isip, owa'!

¹⁹ King anama nambaso'mas nase'asa maol ahifinai ma epes hiesi ape'isi. Anan nanda' waf aonai ma esis bafasapa ape'isi, anan la'ifina endilisi na'i esis sokwaha awasi asasisi sope ande' ma afis.

²⁰ Nogota anama Moses mama'wana kolana. Anan so'uso'win bu'unai endilisi. Ea' mamasana sumafiana andeande' ipat asasinai ma aomb wanom.

²¹ Ea' sofa'ana safe' sambaho'ana na'oh aolop ande'. Ea' king Fero nogamana anani'wi kwafi'i kwatolona kofa'ana nape si'i nogaloma'w akwa'unai endilisi.

²² Ea' Moses nanda' skul nefal gawa hianai esis Isipi ea' nataga aman dembinai nanda' maol naninani na'i basef la'ifimi ma seme'am sailam.

²³ Moses nape dambena ma afagof 40-peleim ea', okom na'i esis wambota ananinai Israel ea' nafe' natilis.

²⁴ Nati anona Isipinai naha anona Israelinai nanda'ana kwapete'ana endilisi. Ea' nagiambama Israelinai naha aman anama Isipinai afuna.

²⁵ Ea' anan okom na'i 'Epes ae'asi nambimb sogawa God nagiambama ape' ma lagof Mosesi ma nokwahepa mope andeande!.' Owa!. Esis ina sagawa God nandandepa Mosesa nigiambammas, owa!.

²⁶ Wafilu Moses notanima nafe' natilis wapot'i'

ea' nati anom biam amam atom Israel mapa'
wapoti!. Ea' nohape'am na'ipam na'i,
'Ipe' etipa sahalomana owalomana penda'am
na'ama owa!. Dei' maina ipe' pahambo-
maga ipe' etipa?'

²⁷ Ea' aman anama naha anona aman Isrelinai
na'ipa Moses na'i,
'Emi na'ipina ma nepe dembinai ma newaloga
afa?'

²⁸ A'i ine' na'i nehe si'i nambati' naha aman
anama Isipinai naga!?

²⁹ Moses neme'ana na'ama, anan umbama-
hana nafa' nafe' anona etap hiagoma Midian lao-
goma. Nakwaha wambel ananinai nafe' nailas
nape naloma esis Midian ea' nase' nemata'w nola
awasi bias.

³⁰ Afagof 40-peleim mafe'ma ea', anona ensel
Dembinai natagamana anona etap wafiguma fa-
tauguma epes a'agoma felefele'ma halaf Sainai.
Ensel nape nomona nif ilelowa fandom mataga
anona lawag so'unai.

³¹ Ea' Moses natolom okom ananinai natanea
ma amama. Ea' nafe' felefele'ma natolom ande-
ande', Dembinai na'ipana na'i,

³² 'Ae' God amam bafapena ine'imi manda' lo-
tumei. Ae' God Abraham naloma Aisak
Jekop fowa' gani manda' lotumei.'

Ea' Moses gegelalasana umbamahana ma natolo-
gon.

³³ Ea' Dembinai na'ipana na'i,
'Tagaha su mape bo'wagah ine'imi. Etap anae'
ine' dei' naituma etap ae'anai.

³⁴ Ae' ati amam nematawa hiesi ae'asi sefa'
nimanimi lu'wami etap anama hiagoma Isip.

Ae' ame' lef asasinai ea' dei' bo'wes isila'i ma igiambamasa etofa nimanimi amama asasimi sope. Na'ama dei' ine' hafel. Ae' a'i esapa'ena netanima nefe' Isip.'

³⁵ Moses aman anama atona fowa' sosambalan sa'i,

'Emi na'i ine' nepe dembinai ma newalogapa?'
Dei' aman anama atona God nasapa'ana nefe' si'i dembinai ma numafias nofa'as sotanimani. God nanda'ana la'ifina ma anama ensel natagamana nalomana na'i ma lawag anama so'unai.

³⁶ Moses nao'was safe' sakwaha Isip, nanda' pepel naninani ma ikwaf naninani si'i God nanda'anai ma etap hiagoma Isip ea' naoh embel akwahimi ea' anama etap wafiguma fatauguma epes a'agoma ma afagof amama 40-peleim.

³⁷ Moses aman anama ma'una anan na'ipa esis Israel na'i,

'Anona nemaf God nosapa' anona sahalomepa ipe'inai nonda'ana nope profet si'i ae!'

³⁸ Anom nimeguf mafe'ma ea', esis Israel safe' sandakolas etifigin anama wafiguma fatauguma Moses aman anama atona nepe nalomas. Anan nepe naloma bafapapa ape'imi wapot'i'. Anan nepe naloma ensel anama nase'ana basef Godi halaf anama Sainai ea' nofa' basef amama ambal namunai na'ipapa.

³⁹ Ea' bafasapa ape'isi sandaiwa'ma some' basef ananimi, owa!. Esis sosambalona ea' sa'i sotanima sefe' Isip ukup maimailagon.

⁴⁰ Ea' sa'ipa aman anama Aron sa'i,
'Aman anama Moses nofa'apai Isip mafi'i, ina mogawana nefe' nepe eti? Ea' ine'

da'mapa anona god baso'amunai ape'inai
ma anan nope numafiapa.'

⁴¹ Nemaf anama esis sanda' anona bulmakau ea' sondolalima god anama baso'amunai. Ea' sandanifel ma god anama sanda'ana lagof assasimi atom.

⁴² Ea' God nase'asa alafuga esis nakwaha esisa sonda' lotu sefela agofa aon owambunai alipunai maloma ondowa, si'i basef mape buk profeti ma'iam ma'i,

'Ipe' epes Israel, ipe' paha bulmakau maloma sip-sip pendolali ma ae' pape anama wafiguma fatauguma epes a'agoma afagof 40-peleim?
Owa'!

⁴³ Ipe' pefa' ipat selinai panda' lotuma Molokanai, ea' pefa'ana naloma ikwaf si'i ondo'w god baso'amunai Refani, ambagof god baso'amunai hianai ipe' panda'ana panda' lotumana. Na'ama anona nemaf ae' egalo'mepa pefe' pepe laogoma peloma wambel Babilon gani wa'ol.'

⁴⁴ Fowa' gani bafasapa ape'isi sape anama wafiguma fatauguma epes a'agoma, nogota anama sowalo'a sel si'i ipat sanda' lotuwananai. Ipat anama nihi'ambapa anama God napainai. Ipat anama God na'ipasa basef ananimi. Esis sala' ipat anama selinai nandahama ikwaf anama God fowa' nihi'amba Mosesanai. God na'ipana ma nanda'ana na'ama etin.

⁴⁵ Ea' amam bafapapa ape'imi mafi'i maloma Josua ma mofa' etap lu'unai enis epesi. Ea' God nagalopa esisa naep esis bafasapa ape'isi. Nemaf anama sofa'ai ipat anama selinai, sanda'ana

na'ae la'ela'ef nepe nafi'i nafi'i nogota Devit nataga king.

⁴⁶ Devit nanda' waf bu'unai ma God nagiamba-mana nanda'ana la'ifina. Ea' nanda' betena Goda anan na'i howalagon anona ipat bu'unai ma God anama fowa' gani Jekop nanda' lotumanai.

⁴⁷ Ea' nogalomana Solomon nanda' ipat anama lu'unai Godi nala'ana.

⁴⁸ Owa!. Dembinai Edilisinai ina nepe ifagw amama epes sala'am lagof asasimi, owa!. Basef amama mail Buk Baibeli si'i anona profet na'iam na'i,

⁴⁹ 'Dembina na'i na'ama na'i, "Heven si'i balata Ae' apeinai, etap anae' Ae' ahapona bo'wagah matomama. Maina ipat nambimb pelana ma Ae'? Owa!. Ae' ina epoma noma'w ipat anama. Owa!.

⁵⁰ Lagof ae'ami atom anda' amamaga amama hiami hi'alam,"'

⁵¹ Ipe' epes pesambala basefi. Ipe' owa' pegawa basef Godi si'i enis epes owa' sogawa Godi. Ipe' pandaiwa' ma peme' basef Godi ma opalef aligh ipe'imi. La'ela'ef ipe' pesambala Ambal Bu'unai Godi. Ipe' panda'am na'ama etin si'i fowa' gani bafasepa ehasepa ipe'isi sanda'am.

⁵² Amam profet hiami fowa' gani mapani esis akusepa ipe'isi sanda' waf aonai ma amam hiami saham sanda'am aom. Saha amam profet ma'ipasa Aman Bu'unai anona nemaf neafi'i. Ea' dei' ipe' pawalapanma amam naumbih mahana naga' ea!.

⁵³ Fowa' gani God nase'epa mi'uli ananinai ipe'. Ea' amam ensel atom ma'ipipa mi'uli anama, ea'

ipe' ina pame'ana pailana, owa'."

Amam maha Stiven otamba afuna

54 Amam mame' basef amama maha opalef amamumi endilisi. Amam mona' nalelef tilili telele' ukup wandafulum endilisi ma Stiven.

55 Ea' Ambal Bu'unai Godi napaina endilisi, naniga nati heven ilif. Nati nafifili Godi ea' nati Jisas naitu lagel da'isinai Godi.

56 Ea' Stiven na'ipam na'i, "Peme!! Ae' ati heven nandawisi' ea' Dembinai nataga epen endilisinai naitu lagel da'isinai Godi."

57 Ea' amam ma'i basef la'ifimi mehip endilisi masopama aligah amamumi mandaiwa'ma mome' basef amama. Ea' mohafel masagih mafe' etin mombalo' Stiven.

58 Ea' mogwasi'ana nawis ande'. Amam do'ok mali' mambaso'mana basefi mowalia siaogw amamumi mambe'am wa'ol felefele'ma anona aman so'unai naituma agilinama Sol. Mowaliam ma'oh mokwaha otamba mehip maha Stiven.

59 Makwaha otamba mahana etin, nanda' beten na'ama na'i, "Dembina Jisas, ine' fa'ago ambal ae'anai!"

60 Ea' nindawa nembawa notawa na'i mehip na'i, "Dembina, ine' owa' negwamama waf anama aonai ma amam, owa'." Stiven na'iam na'ama, ea' naga'.

Sol naha esis Kristen

1 Ea' Sol okom atotona naloma amam maha Stiven naga'i.

Nogota anama esis amam nematawa sandaiwa'ma esis Kristen sape Jerusalemi, sahas sase'asa nimanimi lu'wami. Ea' amama atom dei' esis sombale'efanai safra' safe' anama etap hiagoma Judia naloma Samaria. Ea' amam aposel atom ata' mapani la'ela'ef Jerusalem.

² Anom amam maila waf Godi andeande'i mofa' Stiven mawana malopana endilisi.

³ Ea' Sol nafela maol nanda'ana naha esis Kristen. Anan nafe' nawis ifagw hiami atona etin nofa'ai amam nematawa hiesi sembale'efa Kraisi. Ea' nahonde'as nofa'as nafe' nanda'as sanda' kalabus.

Amam mawalapa basef bu'wami etap hiagoma Samaria

⁴ Esis Kristen safra' safe' wambel hiagoma sawalapa basef bu'wami Godi sa'ipasam.

⁵ Ea' Filip nowala nafe' anona wambel etap hiagoma Samaria nawalipasa basef bu'wami na'i Jisas anan Krais, God nandandepana nasapa'ana nafi'i.

⁶ Amam nematawa hiesi same' basefa anan ea' sati ikwaf la'ifinai hianai naninani anan nanda'anai ea' seme'am andeande'ma basef ananimi.

⁷ Ikwaf anama na'ama. Amam nematawa hiesi ambagof awami mapaisi, ambagof amama malef wigo' kwapete'am endilisi ea' makwaha esis mawisi mafa' mafe'. Ea' epes isima lagof bo'wagah awamisi, enis isima bihiguf mondala'asi, esis hiesi sataga bo'wes wapot'i.

⁸ Ea' dei' esis wambel anama sofa' danifel lu'unai.

⁹ Ea' anona aman nepe wambel anama agilinama Saimon. Aman anama fowa' nanda'

ambagofi nepe la'ela'ef nafi'i nataga dei' nemaf anama. Ea' nanda' ukup esis amam nematawa Samariaisi ukup matamea mafe!. Anan Saimon na'iam na'i, "Ae' aman dembiwei."

10 Ea' esis amam nematawa hiesi agof a'asi saloma agufisi, esis hiesi seme'am andeande' basef Saimoni. Sa'iam sa'i, "Aman anama anan nofa' pepel anama dembinai Godi sofalana sa'i pepel lu'unai."

11 Ea' esis la'ifisa saila basef ananimi. Dei' main, nimeguf hiami anan nanda' waf nani-nani hianai la'ifinai nanda' ambagof nahapila mu'uhup. Ea' satolom ukup matamea mafe!.

12 Ea' Filip nawalipasa basef bu'wami esis hiesi. Nawalipasa agel Jisas Kraisi ma siowis wambota Godi numafias. Ea' sombale'efa basef amama sofa' baptais. Esis amam nematawa wapotil.

13 Ea' aman anama Saimon wapotil' nem-bale'efa Jisas ea' nofa' baptais nepe naloma Filip. Anan nati Filip nanda' ikwaf anama la'ifinai naninani ea' okom natanea nafe!.

14 Amam aposel mape Jerusalemi mame' basefa esis Samaria sefa' basef Godi. Na'ama masapa' Pita naloma Jon mafe'ma esis.

15 Amam biam mafi'i mataga manda' betena God nigiambamasa sofa' Ambal Bu'unai Anan-nai.

16 Dei' main, Ambal Godi ina dei' nepe nalomas, ata' owa'. Esis sofa' baptais etina agel Dembinai Jisas.

17 Ea' amam biam mawamona lagofa esis ea' sofa' Ambal Bu'unai Godi napais.

18 Ea' Saimon nati aposel amama biam mawamona lagof atoma esis sofa' Ambal Godi. Na'ama anan nofa' moni ananinai nafi'mai amam na'ipam na'i,

19 "Ipe' bipa pese'e pepel anama ma ae' wapot'i ma ae' i'i ewamona lagofa enin epen, nef'a' Ambal Bu'unai Godi."

20 Ea' Pita nagwamana basef na'ipana na'i, "Ae' a'i otamba ine'imi moloma ine' pefe' wambel aonai hel. Amamaga bu'wami God nase'asam etin si'i presen, amama ine' okom na'i wilama netalom otamba ine'imi? Owa!"

21 Ine' owa' bo'wena neanda' maol anama Godi afa' wanda'anai. Owa!! Dei' main, okom ine'inai ina bo'onama naep Godi, owa!.

22 Ine' newa' alafugama waf anama aonai ine'inai nemboma opaf nefe'ma God. Ea' nenda' betena Dembinai ma nokwaha waf aonai nape okom ine'inai.

23 Dei' main, ae' ati ine' kowalena endilisi ma presen bu'unai God nase'afa anai. Ea' ae' egawena, waf anama aonai nembale'ena la'ela'ef nape si'i kalabus."

24 Ea' Saimon nagwa basef na'i, "Ipe' bipa penda' betena Dembinai ma anan nigiambambe. Na'ama amama ipe' pa'iami motagame."

25 Ea' Pita naloma Jon ma'ipasa basef ea' na'ipasam maloma amamaga amama Dembinai nigiambamam ea'. Ma'ipasam ea', motanima mafe' Jerusalem. Ata' nafe' eaf, mawalapa basef bu'wami Godi etap hiagoma esis Samaria.

Filip nawalapa basef bu'wami ma aman Itiopia'ainai

26 Ea' anona ensel Dembinai na'ipa Filip na'i, “Ine' nefe' lambihilifinama kwa'waha Jerusalem nikini'i Gasa. Eaf anama fowa' esis safe'anai. Dei' owa!. Eaf anama nape anama wafiguma fatauguma epes a'agoma.”

27 Ea' Filip nohafel nafe!. Ea' natagama anona aman Itiopiainai eaf anama. Anan aman dembinai numafi otamba hiami ma kwin akwama dembe'wi gavman kumafi esis etap hiagoma Itiopia, sofala'w sa'i Kandasi. Aman anama anom amam matopa'mona alop ananinai. Nimbewa' nafi'i Jerusalema nanda' lotu,

28 dei' na'i notanima nefe'. Anan natoma karis ananinai si'i wilkar ea' natoma nati basef mape buk Baibeli fowa' gani profet Aisaia nanda'am ea' nafe!.

29 Ea' Ambal Bu'unai Godi na'ipa Filip na'i, “Ine' fo'o felefele'ma aman anama nefe' neloma karis nanima.”

30 Ea' Filip nasagih nafe' felefele'ma karis anama, ea' name' aman anama natalifa basef amama Aisaia nanda'ami.

Ea' Filip nahali'ana na'i, “Ine' negawa basef amama ofagema dei' natalifam nafi'i?”

31 Ea' aman anama nagwamana basef na'i, “I'i enin open owa' nihi'ambe, dei' egawa basef amama i'imama?”

Ea' na'ipa Filip na'i, “Ine' letowi netoma karis neloma ae!.”

32 Basef amama tu'wanim Godi anan natalifimi ma'iama Jisas ma'i,

“Esis sao'wana nafe' si'i sipsip ama sa'i sohana noga!. Anan si'i sipsip noganai esis sahipilana satopa'mana awif ananimi, tol napan.

Ea' na'ama etina aman anama, ina na'i anom basef, owa!.

³³ Esis sasambalona endilisi ea' ina sanda'mana basef andeande' ma kot ananinai, owa!. Anan awasi bafasana a'ana ma enis epes sitilis si'ipa enis epesa esis, owa!. Dei' main, sahana naga' ma ina ata' napan etap anae' wapot'i, owa!".

³⁴ Ea' aman anama Ithiopianai na'ipa Filip na'i, "Ae' a'i ihal'iina. Profet anama na'i emi ma dei' nanda' basef amama? Na'iama anan atona o na'iama anona epen?"

³⁵ Ea' Filip na'i basef nawalapama aman anama. Nahafel na'ipama basef amama tu'wanim Godi aman anama na'iami mafe' mafe' ea' nawalapai basef bu'wami Jisasi.

³⁶ Amam biam mafe', matagama anona dumb. Ea' aman anama na'ipa Filip na'i, "Niti dumb notah anama. Ine' na'i a'e ma ae' efa' baptais?"

³⁷ [Ea' Filip na'i, "I'i ine' nembale'efa Dembinai endilisi ma okom ine'inai, wila."]

Ea' nagwamana basef na'i, "Ae' embale'efa Jisas Krais anan nogalomana Godi."]

³⁸ Na'iam ea', karis notawa ea' Filip naloma aman anama dembinai misila' mafe' mowala dumb anama. Ea' Filip napis'i'ana.

³⁹ Ea' amam biam makwaha dumb mandegiae wata'ita, mehip Ambal Bu'unai Dembinai nofa' Filip ea' nafe'. Ea' aman anama Ithiopia ina ata' natolona wapot'i, owa!. Ea' anan nandanifel endilisi naila eaf ananinai nafe'.

⁴⁰ Ea' Filip nafe' nataga Asdot. Anan nafe' taun anama hiagoma ganigani nawalapa basef bu'wami Godi. Nafe' nafe', notanima nafe' nataga taun Sisaria.

9

*Sol namboma opaf nataga Kristen
(Ap 22:4-16; 26:9-18)*

¹ Fowa' basef amama ata' owa' motagae, nogota anama Sol nanda'am na'ama. Anan na'i basef la'ifimi endilisi ma na ha esis alupusi saila Dembinai nohas soga'. Ea' nafe'ma pris dembinai nape nali'ma pris hiami.

² Na'ipana ea' pris anama nanda' basefa pas mafe'ma agufumi hiami mumafi ifagw esis Juda sa'i basef sapeimi wambel Damaskus. Ea' nase'ana pasa basef amama Sol. Ma'iam na'ama ma'i, "I'i Sol niti enis amam nematawa saila eaf anama dambainai sape Damaskusi, nondal' kabusimas nombale'as nefas sefe'as Jerusalem."

³ Ea' Sol nafe' nataga felefele'ma Damaskus, mehip anona nafifili howalagon nafi'i nisila'i heven ea' mafifimana.

⁴ Ea' nowa na'oh etap ea' name' anona maf na'ipana na'i, "Sol, Sol, dei' maina ine' nahambomba ae!?"

⁵ Ea' Sol nahali'ana na'i, "Dembinai, ine' emi egafina?"

Ea' maf anama na'i, "Ae' Jisas ine' nahambomba ae!"

⁶ Dei' ine' hafel nefel niwis taun lu'unai. Nambimb anona aman nifi'mai ine' ni'ipina amamaga ine' nambimb neanda'ami."

⁷ Ea' amam mafe' maloma Soli mame' maf anama ea' ina mati anona open, owa'!

⁸ Ea' Sol nohafel na'i niti, owa'. Nati owamb atona. Ea' amam mahapila lagof ananimi mofa'ana mafe' mawis Damaskus.

9 Anan nati owamb atona nepe nimeguf wanom ea' ina na' gwa'aimi embel maim, owa'!

10 Ea' anona alupunai Jisasi nepe na'ama Damaskus, agilinama Ananaias. Ea' na'oh nandondo'oh nati Dembinainofalana na'ipana na'i, "Ananaias!"

Ea' anan na'i, "Dembina, ae' ape na'ae."

11 Ea' Dembinai na'ipana na'i, "Ine' hafel fo'o eaf anama sa'i usi'inai nef'e ipat Judasi ea' niti anona aman Tarsusinai, agilinama Sol. Dei' anan nanda' betenape.

12 Sol nali' na'oh nandondo'oh ea' nati anona aman agilinama Ananaias atuwasi nifi'i nuwisi nowamona lagofa anona nonda' naep miti ande-ande' wapoti!."

13 Ea' Ananaias nagwamana basef na'i, "Dembina, ae' ame' basef hiami ma epen anama, waf aonai hianai anan nanda'ana esis amam nematawa ine'isi gani Jerusalem.

14 Anan nofa' agel lu'unai ea' ma amam pris dambami ma nombalo' amam nematawa sanda' betena agel ine'inai wambel anae' ma nanda' kalabusimas."

15 Ea' Dembinai na'ipana nasapa'ana na'i, "Ine' fo'o. Aman anama nambimb nond'a' maol Ae'anai. Ae' andandepana ea' ma nef'e ni'ipasa basefa agel ae'anai enis amam nematawa owa' Judaisi soloma amam dambami king asasimi moloma esis Israel wapoti!"

16 Nambimb ae' ihi'ambana nimanimi lu'wami nef'a'ami ma nowalapa agel ae'anai. Na'ama ine' dei' fo'o netolona."

17 Ea' Ananaias nafe' nawis ipat anama nomon nasa lagofa Sol na'i, "Sahalome Sol, Dembinai

Jisas natagamena eaf nogota anama ine' nafi'i na'ae. Dei' nasapa'e afi'mai ine' ma niti andeande' wapot'i' ma Ambal Bu'unai Godi nope si'inama ine'!"

¹⁸ Ea' amamaga mape masopama naep Soli si'i dunduf mafe' mehip makwaha naep Soli mowa. Ea' naep ananimi mati wapot'i', nohafel nofa' baptais.

¹⁹ Ea' na' gwa'aimi nataga la'ifina wapot'i'.

Sol nawalapa basef bu'wami Damaskus

Sol nape anom nimeguf naloma amam alupumi Jisasi Damaskus.

²⁰ Ea' dei' atef nafe' ifagw hiami esis Juda sa'i basef sapeimi nawalapa basef Jisasi na'i, "Jisas anan nogalomana Godi."

²¹ Epes hiesi same' basef ananimi ea' sohafel gegelalasis kwapete'as sa'i, "Aman anama na-hambombaga amam nematawa sofala agel Jisasi wambel Jerusalem. Ea' dei' nafi'i na'ae ma nowa' esis nonda' kalabusimas nofa'as sefe'ma amam pris dambami. Ea' ma'una aman anama atona."

²² Ea' pepel Soli nataga la'ifina nihi'amabas ma basef nawalipasami. Ea' esis Juda sape Damaskusi same' basefa anan. Esis ina la'ifisa sogwa anom basef si'ipanam, owa'. Anan la'ifina nihi'ambas endilisi na'i, "Jisas anan Krais, God nandandepana nasapa'ana nafi'i."

Amam Juda manda'mana waf aonai ma moha Sol afuna ea' nafa' nafe'

²³ Nimeguf hiami mafe'ma ea', amam Juda ma'i basef mandame'mama moha Sol noga'.

24 Ea' Sol name' basef amama amamumi. Ea' amam Juda hiami mape mumafi utagw hiami ma taun anama owamb alip wapot'i ma ma'i moha Sol noga'.

25 Ea' amam alupumi Soli mofa'ana owamb mafe' malata endalelemb nomon. Ea' malana nape anona holaf lu'unai mapana mandelef malana nisila' endalelemb ande'.

Sol nape Jerusalem

26 Sol nafe' Jerusalem ea' na'i nondakolas noloma esis alupusi Jisasi. Ea' esis hiesi umbamahasana. Esis ina sombale'efana sa'i anan alupunai Jisasi, ata' owa'!

27 Ea' Barnabas nao'wana mafe'ma amam aposel ea' na'ipama Sol nati Dembinai eaf ma Dembinai na'ipana basef anan. Ea' Barnabas na'ipam na'i anan la'ifina nawalapa basef na'ipasama agel Jisasi Damaskus, dei' anan ina ata' umbamahana, owa'.

28 Ea' dei' sogawa anan wambota atona Jisasi nalomas nape la'afena esis. Anan la'ifina nanda' maol nafe' Jerusalem anama hiagoma nawalapa basefa agel Dembinai. Anan ina umbamahana, owa'.

29 Na'ipasa basef Godi naloma amam Juda magawa diga Griki ea' na'i basef nalomam mandahianama. Ea' amam mandaiwa'ma basef ananimi magolopa eafa mohana noga'.

30 Amam Kristen sahin owan mogawa amama, ea' mofa' Sol mafe' makini Sisaria. Ea' masapa'ana nafe' nape wambel Tarsus.

31 Dei' esis amam nematawa Kristen sape etap anama hiagoma Judia naloma Galili naloma

Samaria sape opalef awanem sape andeande' ea' esis Kristen sataga la'ifis. Esis sape owina Dembinai ea' Ambal Bu'unai Godi nanda'as sataga la'ifis opalef asasimi. Ea' esis Kristen sataga hias.

Pita nanda' Inas bo'ona

³² Pita nave' wambel anama hiagoma ea' nakini' nave' taun anama Lida wapot'i nape naloma esis amam nematawa Godi sape wambel anama.

³³ Ea' nati anona aman Inas. Alop bihiguf ananimi maga'ana, tol na'oh nala lehis nape nogota laona afagof 8-peleim.

³⁴ Ea' Pita na'ipana na'i, "Inas, dei' Jisas Krais nanda'ena bo'wena wapot'i!. Ine' hafel nendon-domba lehis ine'imi andeande'."

Pita na'ipana ea' dei' etef nohafel.

³⁵ Ea' epes hiesi wambel anama biefina Lida naloma Saron satolona samboma opalef safe'ma Dembinai.

Tabita kwaga!, Pita nafela'w kohafel wapot'i

³⁶ Anona wambel Jopa ano'w nemata'w kwaila Jisasi kwape, agel akwa'unai Tabita. Diga esis Griki sofala'w sa'i Dorkas, agel anona mafin sa'i dia. La'ela'ef akwa'w kwanda' waf bu'unai ma kwagiambama esis amam nematawa kwahusi ma gwa'aimi maim.

³⁷ Nemaf anama awes nanda'akw kwaga!. Ea' sasa'opa alop akwa'unai ma sowa'w. Ea' sofa'akw sambe'akw kwa'oh rum ilifanai.

³⁸ Wambel Lida nape felefele' ma Jopa. Ea' esis alupusi Jisasi same' basefa Pita nape Lida, sasapa' amam biam mafe'ma anan mahali'ana na'ama ma'i, "Ine' nifi'mai afa!. Ni'i ota' ota' owa!"

39 Ea' Pita nohafel nafe' nalomam, ea' mafe' mataga mofa'ana mafe' rum anama ilif akwa'w kwa'oma. Nematawa hiawai alifiwai wafi'i waitu felefele'ma Pita wape walopa'w. Ea' wihi'ambana klos sagwegw maim akwa'w Dorkas kwagundisami nimbewa' la'ela'ef ata' kwape kwalomawa.

40 Ea' Pita nagolo'ma esis amam nematawa sawisi ande', nindiba nembawa notawa nanda' beten. Ea' namboma amaga ananinai nafe'ma alop nemata'wi na'i, "Tabita, ine' hafel."

Ea' akwa'w naep mati kwati Pita kohafel kwape.

41 Ea' Pita nahapila lagel akwa'unai nafela'w kwaitu. Ea' nofalai esis amam nematawa sombale'efa Godi saloma nematawa awama alifiwai, naso' akwa'w kotanima kwafe'ma esis.

42 Basef amama mafe' anama hiagoma wambel Jopa ea' esis amam nematawa hiesi same'am sombale'efa Dembinai.

43 Pita nape wambel anama Jopa nimeguf hi- ami. Anan nape naloma anona aman nandon- domba agwafuh bulmakaumi agel ananinai Sa- mon.

10

Ensel natagama Kornilius na'ipana basef

1 Anona aman nape Sisaria agilinama Kornilius, anan agilinai kepten numafi soldia 100-peleim. Soldia amama hiami sofalam sa'i soldia Italimi.

2 Anan aman nanda' lotu naloma epes hiesi ananisi sape ipat ananinai sanda' lotu ma God. Anan nase'as moni maina esis Juda kwahusi

otamba maim a'asi. Ea' la'ela'ef nanda' betena God.

³ Anona nemaf wambomota aon nasa 3 klok, anan nati anom amamaga si'i na'oh nandondo'oh mape mataga alihim endilisi. Nati anona ensel Godi nafi'mai anan na'ipana na'i, "Kornilius."

⁴ Ea' Kornilius natolona umbamahana endilisi na'i, "Dembinai, ine' na'i main?"

Ea' ensel na'ipana na'i, "God name' beten ine'inai ea', okom na'i waf ine' nanda'anai nase'as moni maim nagiambama amam nematawa amamaga a'asi. Ea' God ata' okokomam.

⁵ Dei' ine' nesapa' anom amam mofo'o Jopa mogolopa anona aman agilinama Saimon agel wa'ana Pita. Mi'ipana nifi'i na'aе.

⁶ Aman anama nape ipat Saimoni, anan nadondomba agwafuh bulmakaumi. Ipat ananinai notawa felefele'ma naoh mafe' motambela."

⁷ Ensel na'ipa Kornilius ea' nafe'. Ea' Korniliusnofalai amam biam ananimi manda'mana maoli maloma anona soldia. Soldia anama nanda' lotu ma God la'ela'ef nape nanda' maola Kornilius.

⁸ Ea' Kornilius na'ipa amam amama wanom andeande'ma basef amama hi'alam ea' nasapa'am mafe' wambel anama Jopa.

Pita nati anom amamaga misila'i heveni si'i nandondo'oh

⁹ Ea' amam wanom mohafel mafe' ma'oh eaf. Lala mohafel mafe' mataga felefele'ma Jopa. Ngota anama aon nahagasm Pita nalata natoma ipat ande' ilifa nanda' beten.

10 Ea' nolomahana na'i nea' gwa'aimi ea' esis ata' sanda'am. Ea' anom amamaga matagamana si'i na'oh nandondo'oh.

11 Nati otaga ilif nandawisi' ea' anom amamaga si'i lowaf lu'unai endilisi misila'i ilif mowalai. Anom amamaga mahapila da'malifinama biefigin biefigin malana nisila'i.

12 Amamaga mala lowaf anama nomoni, mafis amamaga hiami, amiguf mamumami mape aolopi, maloma iguf mamumami hiami.

13 Ea' anona maf na'ipa Pita na'i, "Pita, ine' hafel neha mafis nea'am."

14 Ea' Pita na'ipana na'i, "Dembinai, ae' owa' endilisi. Ae' ina a' anom mafis ape' Juda ma'i awami, owa!."

15 Ea' maf anama na'ipana wapot'i na'i, "Amamaga God na'i bu'wami, amama ina ni'i awami, owa!."

16 Amama matagamana wenif na'ama ea' mehip motanima malata otaga heven ilif wapot'i.

17 Ea' Pita okom natanea ma amamaga amama si'i na'oh dondo'oh, na'i, "Amama ae' atulumi ofagema main de'im?"

Anan okom natanea nape ea' amam amama Kornilius nasapa'am mafi'i mataga mahali'asa ipat Saimon napeinai. Ea' mowala mafi'i maitu úta.

18 Ea' mofalana ma'i, "Saimon agel wa'ana Pita anan nape na'ae?"

19 Pita ata' nape okom natanea nape ma amamaga amama ea' Ambal Bu'unai Godi na'ipana na'i, "Neme!! Amam amama wanom ma'i mogolopa ine!"

20 Ine' hafel nisila' nefe' nelomom. Ine' owa' okom nope hiahiana, owa'. Ae' asapa'am mafi'i."

21 Ea' Pita nisila'ma amam amama na'ipam na'i, "Aman anama ipe' pagolopanai ae' ea' ma'uwi. Ipe' pafi'mai main?"

22 Ea' ma'ipana ma'i, "Kornilius anan kepten dembinai numafi soldia 100-peleim hiami, nasapa'afa wafi'i. Anan aman nanda' waf bu'unai nanda' lotuma Godi. Esis Juda hiesi sa'i, 'Anan aman bu'unai.' Anona ensel Godi na'ipana manofalena nefe' ipat ananinai, ma ata' nome' anom basef ine'imi."

23 Ea' Pita na'ipam mawis ipat nomon nao'wam numafiam mape owamb anama. Wafilu nohafel nafe' nalomam. Anom amam Kristen Jopaimi mafe' malomana.

24 Amam mohafel mafe' ma'oh owamb atotona eaf ea' mafe' mataga Sisaria. Ea' Kornilius nape nahafa amam. Anan nali' nofalai esis wambota ananinai saloma alupusi ananisi endilisi sondowa'anima sape.

25 Ea' Pita nafi'i na'i nuwisi ipat ea' Kornilius nafi'i natagamana nindiwa nembawa felefele'ma bo'wagah Pitai na'i nefela agel ananinai.

26 Ea' Pita nafelona na'ipana na'i, "Ine' hafel. Ae' wapoti' open atowe si'i ine'."

27 Ea' Pita naloma Kornilius ma'i ea' mawis ipat nomon nati amam nematawa hiesi sandatama etifiggin sapan.

28 Ea' Pita na'ipas na'i, "Ipe' pegawa ea' mi'uli ape' Judai ma'i owa' ma ape' mefe' muwis ifagw o mope moloma enis epes owa' Judaisi, owa'. Ea' God nihi'ambe ma enis epes owa' Judaisi si'i ipe'

na'ae na'ipi na'i, 'Ina nendafa'ma enin open ni'i
enin nanda' waf aonai, owa!'

²⁹ Ea' ae' ina esambala basef amama God
na'ipiami, owa!. Ea' ame' fala ipe'inai afi'i. Dei'
a'i ihali'ipa, 'Ipe' pefale afi'i ma main? "

³⁰ Ea' Kornilius nagwamana na'i, "Amamaga
natagama ae'i ma dei' nimeguf wenif mafe' ea',
amama na'ama. Ae' ape anda' beten ipat ae'anai
nogota aon nasa 3 klok. Nogota ea' na'ama etin
si'i dei!. Anda' beten ape ea', ati anona aman
naitu felefele'ma naep ae'ami, luwaguf maim
ananimi mafifil endilisi.

³¹ Ea'nofale na'i, 'Kornilius, God name' beten
ine'inai ea', okom na'i amamaga hiami ine'imi
nase'asam epes isima amamaga a'asi.

³² Ea' ine' nesapa' anom amam mafe' Jopa
mofalai Saimon agel wa'ana Pita. Aman anama
nape naloma anona aman Saimon ipat anani-
nai, nandondomba agwafuh bulmakaumi. Anan
nape felefele'ma naoh mafe' motambela.'

³³ Ea' dei' atef ae' asapa' anom amam
mafe'mago ine' ea' dei' ine' nanda' waf bu'unai
nafi'i. Dei' ape' hiapai mafi'i mape na'ae ma
naep Godi ma meme' basef hiami Dembinai
nasi'inami ma ni'ipapam."

Pita na'i basef ipat Korniliusi nomon

³⁴ Ea' Pita na'iam na'i, "Endilisi, dei' ae' egawa
okom Godi anan ina okom na'i wambota epes
hiesi Judai etis, owa!.

³⁵ Anan okom nainaila emi egafis sanda' lo-
tuma anan sanda' waf bu'unai.

³⁶ Ipe' pegawa basef amama God na'iam
mafe'ma ape' epes hiesi Israeli. Anan nawalapa

basef bu'wami Jisas Kraisi, Anan Dembinai ma amamaga hiami maloma epes hiesi nanda'apa mataga ukup etifim maloma God opalef mape awanem malomana.

37 Ipe' pegawa, fowa' Jon nawalapa basefa esis samboma opalefa waf aonai ma sefa' baptais. Nogota anama basef mafe' etap hiagoma Galili ea' mataga anama etap hiagoma Judia.

38 Basef amama, basef Jisas Nasaretinai. God nandandepana na'ama. Anan nase'ana Ambal Bu'unai Ananinai naloma pepel lu'unai Ananinai. Ea' nafe' wambel hiagoma ganigani nagiambama esis amam nematawa. Ea' dei' God nape nalomana nanda' epes hiesi saila pepel Satani ambo'wes wapot'i!.

39 Ea' ae' afi'i aloma amam wanom afa' wawalapa basefa amamaga amama pepel anan nanda'anai gani Jerusalem naloma etap anama hiagoma ape' Juda mapoma. Ea' esis saundana lawag sahana naga' ma waf anama.

40 Nimeguf biam hi'alam ea' mafe'ma wanomi God nafelona nohafel wapot'i nawalapana alihina.

41 God ina nihi'ambasana Juda hiesi satolona, owa'. Nihi'amba afa' atofa fowa' God nandandepafa ma owalapa basef ananimi. Anan notanima nohafel hi'agif wapot'i' ea' wa' gwa'aimi walomania.

42 Anan na'ipafa basef la'ifimi ma wi'ipa esis amam nematawa owalapa basef alihim na'ama. God nandandepa aman anama ma nope aman nonda'masa basefa epes isima sape namisi soloma isima saga' ea'i.

⁴³ Amam profet hiami ma'lama anan na'ama ma'i, 'La'ifimi agel ananinai atona God nakwaha waf aonai esis amam nematawa emi egafis sembale'efanai.' ”

Epes isima owa' Judasi sofa' Ambal Bu'unai Godi napais

⁴⁴ Pita ata' na'i basef amama atom, Ambal Bu'unai Godi nafi'mai ma amam nematawa hiesi same' basef Godi napais.

⁴⁵ Amam amama Judaimi mombale'efi mafi'i malumai Pitai mohafel gegelalasom kwapete'am ma mati God nase'asa Ambal Bu'unai Ananinai etin si'i presena esis amam nematawa owa' Juidaisi wapot!

⁴⁶ Amam Juda mame' esis sa'i diga nannani safela agel Godi ea' amam gegelalasom kwapete'am.

Ea' Pita na'i,

⁴⁷ "Ina enin epen la'ifina nindaiwa'ma sipisi' amam nematawa isima embel, owa'. Esis sofa' Ambal Bu'unai Godi na'ama etin si'i ape'."

⁴⁸ Ea' na'ipasa basef la'ifimi ma esis na'i, "Ipe' pefa' baptaisa agel Jisas Kraisi."

Ea' sa'ipana sa'i, "Ine' ata' nepe nelomapa anom nimeguf wapot!"

11

Pita nawalapa basef na'ipasam esis Kristen sape Jerusalemi

¹ Ea' amam aposel maloma esis sahin owan sombale'efanai sape anama Judia hiagomai same' basef amama ma enis amam

nematawa owa' Judaisi wapot'i sefa' basef Godi sembale'efana.

² Ea' Pita notanima nondowasa' Jerusalem, enis epes Juda sombale'efa basef Godi sape. Esis saila waffowa'inai la'ifisa sa'i amam hiami mombale'efanai mila mi'uli esis Judai ma motopa' alop amamunai. Ea' sasambalana mehipa basef ananimi.

³ Ea' sa'ipana sa'i, "Ine' nafe' nawis ifagw amam owa' Judaimi meatopa' alopi na' gwa'aimi nalomam."

⁴ Ea' Pita na'ipasa basef ma amamaga amama hiami mataga. Nali' na'ipasa basef dambadamba mali'i nailam nafe' nafe' nambefam. Ea' na'i,

⁵ "Ae' ape taun Jopa anda' beten ape ea' okom ae'anai nandamboma ati anom amamaga si'i andondo'oh. Anom amamaga lu'wami misila'i ilif si'i lowaf launai endilisi. Amamaga mahapila lowaf anama da'malifinama biefigin biefigini mahapilana malana nisila'i heven ilif ea' nafi'mai ae'.

⁶ Ea' ae' a'i ata' egawa amama andeande', atologon nomon lowaf anama ati amamaga mamumami hiami mape nomona lowaf anama. Ati mafis hiamu mamumami maitu etapi mafis alopumi maloma iguf amiguf amamaga mape alopi.

⁷ Ea' ame' anona maf na'ipi na'i, 'Pita, ine' hafel neha anom mafis nea'am.'

⁸ Ea' a'ipa Dembinai a'i, 'Dembina'i, ae' andaiwa' endilisi! Fowa' ae' ata' so'uso'win afi'i ataga dei' ae' ina agwa' anom amamaga awami, owa'.'

⁹ Ea' maf anama nafi'i ilif wapot'i bif na'i, 'Ama-maga God nanda'am mataga bu'wami, amama ina ni'i awami, owa!.'

¹⁰ Amamaga amama matagama ae' wenif ea' motanima malata heven ilif hi'alam.

¹¹ Dei' atef amam amama wanom mafi'i mataga ipat anama afa' wapeinai. Anona aman nape Sisariai nasapa'am mafi'mai ae'.

¹² Ea' Ambal Bu'unai Godi na'ipi na'i, 'Ina okom netanea, owa!. Ine' fo'o noloma amam.' Amam sahope amama wanom wanom mafe' malome. Ea' afa' wafe' wawis ipat aman anama

¹³ na'ipafa ma nati ensel naitumana nomon gani ipat ananinai na'ipana na'i, 'Ine' nesapa' anom amam mefe' Jopa mi'ipa Saimon agel wa'ana Pita ma nifi'mai ine'.

¹⁴ Ama ni'ipina anom basef ine' ma basef amama etoma God nigiambama ine' neloma esis wambota ine'inai soloma esis sanda' maol ine'imi ma nofa'epa petanimani.'

¹⁵ Ea' ae' afela basef a'iam, Ambal Bu'unai Godi nisila'mai esis, nafi'i na'ama etin si'i nali' nafi'mai ape' Juda dambadamba.

¹⁶ Ea' ae' okokoma basef amama Dembinai wapot'i. Amama ma'l'i, 'Jon napisi'as embel ea' ina embel atom, owa!. Atuwasi pefa' Ambal Bu'unai Godi nupaipa.'

¹⁷ Fowa' ape' mombale'efa Dembinai Jisas Krais ea' God nase'apa Ambal Bu'unai Ananinai ape' si'i presen. Ea' dei' ae' emi egafuwi ma la'ifiwi i'ipa God niapani?"

¹⁸ Esis same' basef amama Pita na'ipasami ea' ukup mase'asa basef amama asasimi safela

agel Godi sa'i, "Dei' ape' mogawa God namboma opalef esis amam nematawa owa' Judaisi ma esis wapotil' safe'ma anan sope ambagof namumi."

Esis amam nematawa Antiokisi sataga Kristen dambaisi

¹⁹ Fowa' amam maha Stiven naga'i manda' nimanimi lu'wami matagama esis Kristen amam nematawa mahas. Ea' esis sembale'efanai safal' safe' ganigani ea' sataga anona wambel Antiok safe' anona etap hiagoma biefigin Saiprus naloma Fonisia sawalapa basef Godi ma esis Juda etis.

²⁰ Ea' anom amam Saiprusimi maloma anom Sairinimi mafe' Antiok mawalapa basef amama ma esis Grik wapotil'. Amam mawalapa basef bu'wami ma dembinai Jisas Krais.

²¹ Ea' pepel Dembinai atona nepe naloma amam, amama atom dei' amam nematawa hiesi samboma opalef safi'mai Dembinai.

²² Ea' esis amam nematawa Kristen sape Jerusalemi same' basef amama ea' sasapa' Barnabas nafe' Antiok.

²³ Anan nafe' nataga nati God nanda' esis bo'wesa waf bu'unai numafias nandanifamas. Nafela ukup esis amam nematawa hiesi ma sope la'ifis sila Dembinai.

²⁴ Barnabas anan aman bu'unai, Ambal Bu'unai Godi napaina nembale'efa God andeande'. Ea' nagiambama esis amam nematawa hiesi ma sembale'efa Dembinai ea' sawisi epes hiesi Godi.

²⁵ Ea' Barnabas nafe' Tarsus nagolopa Sol.

²⁶ Natolona ea', nofa'ana nafi'i Antiok. Ea' amam biam mape afagel atotona maloma esis Kristen amam nematawa sape Antioki mawalipa epes hiesi ma basef Godi. Ea' esis amam nematawa saila Jisasi, enis epes sofalas agel anama Kristen dambadamba wambel anama Antiok.

²⁷ Nogota anama anom profet mape Jerusalemi makini' Antiok.

²⁸ Anona profet esis sofalana sa'i Agabus, Ambal Bu'unai Godi napaina ea' nawalipasa basefa nolomeahas lu'unai nambimb neataga etap wambel anama hiagoma.

Anom nimeguf mafe'ma ea', aman anama Klodius nataga nape gavman dembinai esis Rom, nogota anama nolomahas nataga si'i fowa' Agabus na'iam.

²⁹ Ea' esis amam nematawa saila Jisas Kraisi sa'i basef sandame'mama sefa' anom otamba mafe'ma esis alupusi sahin owan sape Judai ma sigiambas. Esis Kristen atona etin ukup ma'i otamba ma'omasi sawalom sase'asa tu'wanim hiami mafe'ma esis sape Judiae. Enis otamba hiami sase'asa hiami ea' enis otamba kwawie'im sase'asa kwawie'im. Hiesi sanda'am na'ama etin.

³⁰ Esis sanda'am na'ama, sasapa' Barnabas naloma Sol mofa' otamba amama mafe'ma amam agufumi mumafi esis Kristen sape Jerusalemi.

12

Dembinai king Herot naha Jems naga' ea' nanda' Pita nanda' kalabus

¹ Nogota anama dembinai king Herot naha enis amam nematawa Kristen sefa' nimanimi.

² Ea' na'ipa anom soldia ananimi maha Jems, Jon sahalomana bainat mahana naga'!

³ Ea' anan nati esis Juda sandanifel ma amama ea' nanda' kalabusima Pita wapotil' nemaf anama esis Juda sanda' gwa'aimi lu'wami sa' bret wafinai owa' neatifi.

⁴ Anan nombalo' Pita nanda'ana nanda' kalabus. Ea' nanda'ana nafe'ma soldia wambotagw biami biam mumafiana. Herot okom na'i ota' Pita nepe wambota atotona soldia biami biam mumafiana ma esis Juda sope sea' gwa'aimi lu'wami sa'i Pasova ma hi'ilam, nefal'ai Pita nuwisi ande'ma naep amam nematawa hiesi sotolona ma nohana noga'!

⁵ Pita ata' napani kalabus amam soldia mape mumafiana. Ea' la'ela'ef esis Kristen sanda' beten la'ifisa God numafia Pita.

Ensel naula Pita nawisi ande' ma kalabus

⁶ Wafilu Herot na'i nofa' Pita nefel' ma kot. Ea' nemaf anama owa' ata' notaga ulal owamb anama Pita na'oh la'afena anom soldia biam. Amam mowa' Pita sen biefina. Anom soldia maitu mumafi uta ipat anama sanda' kalabusanai.

⁷ Ea' mehip ensel Dembinai nataga naloma howalagon nawis ipat sanda' kalabusanai nomon. Ea' ensel naha lambeh Pitai ninimbalona na'ipana na'i, "Ine' hafel mehip."

Ea' sen pele'atana etin lagof Pitai nowa na'oh etap.

⁸ Ea' ensel na'ipana na'i, "Ine' waho' let nungundisa lowaf la su bo'wagah ine'imi."

Ea' Pita nanda'am si'i ensel na'ipana. Ea' ensel na'ipana wapoti' na'i, "La siot ine'inai nila ae' nifi'i."

⁹ Ea' Pita nakwaha ipat sanda' kalabusanai nomon nagi'ma ensel anama nafe!. Ea' anan ina nogawa amamaga amama ensel nanda'ami na'i endilisi, owa!. Pita na'i si'i na'oh nandondo'oh etin.

¹⁰ Amam biam mafe' makwaha amam plisman maitu mali'i mafe' mikila' anom wapoti' ea' mafe' mataga uta lu'unai sonda' ainambanai. Uta anama nafe' tauni. Ea' uta anama lu'unai nadawisi' etina amam biam. Ea' amam makwaha kalabus mawisi ande' mafe' anona eaf. Ea' mehip ensel nandambaho'ma Pita nafe' anagon.

¹¹ Ea' okom Pitai nataga alihina nogawa na'i, "Dei' ae' egawa endilisi. Dembinai nasapa'i ensel ananinai nafi'i natagahowe ma lagel king Heroti ma awami amama hiami esis Juda ukup ma'i seanda'me emi."

¹² Anan negawa amama ea', nafe' ipat Mariai, Jon Mak mama'wana nati esis Kristen sandakolas etifigin sape ipat anama atona sape sanda' beten.

¹³ Ea' Pita nafe' naitu naha uta ande', ano'w nemata'w kwanda'masa maoli agili'wa Roda kwafli'i kwa'i kuwisi' uta.

¹⁴ Ea' kwame' maf Pitai kogawana, okom akwa'unai bo'ona kwandanifel ea' ina kwawisi' uta, owa!. Kwasagih kotanima kwafe' nomon kwa'ipas kwa'i, "Pita nani naitu uta ande!!"

¹⁵ Ea' esis sa'ipakw sa'i, "Ine' okom nahaga nagaolinai."

Ea' akwa'w la'ifikw kwa'iam kwa'i, "Endilisi, anan naitu ande!"

Ea' esis sa'i, "Anama ensel ananinai atona."

¹⁶ Ea' Pita ata' naitu naха uta wapotil'. Ea' esis same'ana safe' sawisi' uta satolona, sohafel gegelalasis kwapete'asa anan.

¹⁷ Ea' Pita nanda' lagel atona na'ipas na'i "Feso'mepa." Ea' na'ipasa amamaga amama Dembinai nofa'ana nakwaha ipat sanda' kalabusainai nao'wana nawisi ande!. Ea' na'i, "Ipe' kipago Jems nolomago sahin owan ama amamaga amama."

Ea' nakwaha esis notanima nawisi ande' nafe' anagon.

¹⁸ Ea' lala kuhimbita, amam soldia matimana owa' mohafel gegelalasom kwapete'am ukup matamea ea' ma'i, "Pita nafe' eti?"

¹⁹ Ea' Herot wapotil' nafe' nagolopa Pita, owa!. Ina natolona nofa'anai, owa!. Ea' nandamboma nahali' amam soldia nanda' kotimama noham mogal'.

Dembinai king Herot naga'

Ea' Herot nakwaha etap hiagoma Judia nafe' nakini' napani wambel Sisaria.

²⁰ Anan okom numbutinama esis amam nematawa sape wambel lu'unai biefina Tair naloma Saidon. Ea' enis epes Tair naloma Saidon sandakolas safi'mai anan. Ea' sali' sagolopa Blastus, nanda' maola dembinai kingi. Ea' sonandana basef salefa sonda' okom anama wandafunai noga!. Dei' main, epes sape wambel anama biefina sofa' gwa'aimi ma etap hiagoma kingi.

²¹ Anona nemaf Herot nandandepanai anan nandausa sosaf dembinai kingi ea' nape natoma balata kingi nanda' basef lu'wami ma esis.

²² Ea' esis seme'ana sa'i mehip sa'i, "Anama maf anona dembinai si'i god. Anan ina maf anona openi, owa!"

²³ Ea' Herot ina ata' nafela agel Godi, owa!. Na'ama dei' atef ensel Dembinai nahana. Ea' asagof iguf so'uso'umi mahana mahahape' alop ananinai ea' afuna.

²⁴ Ea' basef Dembinai mataga la'ifim mafe' wambel hiagoma ma epes hiesi sombale'efana.

²⁵ Barnabas naloma Sol manda' maol God nase'amana hi'alana Jerusalem ea' motanima mafe' Antiok mao'wa Jon Mak nafe' nalomam.

13

Esis Kristen sasapa! Barnabas naloma Sol mafe' manda' maol Godi

¹ Esis amam nematawa Kristen sape Antioki anom amam mawalapa basef bu'wami Godi mape. Anom profet maloma anom tisa mawali-pasa basef Godi isima sembale'efanai. Agof amamumi amama. Barnabas naloma Saimon agel wa'ana Niger, Lusius, anan wambel Sairin-inai maloma Sol maloma Manain anan alupunai Heroti gavman dembinai.

² Esis Kristen sakwaha gwa'aimi sanda' lotuma God atona sape. Ea' Ambal Bu'unai Godi na'ipas na'i, "Ipe' pendandepa Barnabas naloma Sola maol anama ae' efalam andandepam me-anda'anai."

³ Ea' esis sakwaka gwa'aimi sanda' beten, sawamona lagofa amam biam sasapa'am mafe'.

Barnabas naloma Sol mawalapa basef bu'wami Godi anona ailan Saiprus

4 Ambal Bu'unai Godi nasapa' amam biam mafe' makini' anona wambel Selusia. Ea' malata anona sip mefa'am mafe' anona ailan Saiprus.

5 Ea' mataga Salamis, mawis nomon ipat esis Juda sa'i basef sapeinai ma'ipasa basef bu'wami Godi, Jon Mak wapotil' nape nalomam nagiambamam.

6 Amam mafe' mataga wambel hiagoma nape ailan anama Saiprusi, ea' mafe' mataga wambel Pafos nape di'inai. Ea' mati anona aman anan Judainai. Anan nanda' ambagof nanda' amamaga mamumami baso'maimi. Anan profet nambaso'ma esis hiesi, agilinama Barjisas.

7 Anan alupunai ma dembinai gavman agilinama Sergius Paulus. Sergius Paulus anan nomonas okom bu'unai napainai. Anannofalai Barnabas naloma Sol mafi'i ma anan neme' basef Godi ma amam.

8 Ea' aman anama agel ananinai diga Griki sa'i Elimas, nanda' ambagofi nasambala basef amam biam ma'ihami. Na'i nomboma okom gavman anama dembinai ma ina nambimb nembale'efa basef Godi.

9 Ea' aman anama Sol, sofalana Poli, anan pepel la'ifinai Ambal Bu'unai Godi napainai. Ea' anan natiti Elimas na'ipana na'i,

10 "Ine' awani nogaloma Satani! Ine' naumbih ma waf anama hianai bu'unai! Waf anama baso'mainai hianai aonai si'ina ma ine' endilisi! Ine' nimeguf hiami nambomefa basef endilisimi bu'wami Dembinai mataga baso'maimi. Dei' maina ine' nandaiwa'ma nekwaha waf aonai ine' nanda'anai?

11 Ea' dei' ine' neme'. Dei' Dembinai ne-

hena lagel ananinai ea' atuwasi naep ine'imi mose'ena. Ea' ine' atuwasi niti aon alipunai, owa'. Ea' nepe na'ama etin anom nimeguf."

Pol na'iam na'ama ma ea', mehip anom amamaga si'i elagw owamb nasopama naep Elimasi. Ea' naha ganigani nefe' nogolopa enis epesa sohaila lagof ananimi ma sihi'ambana eaf.

¹² Ea' gavman anama dembinai nati amamaga amama gegelalasona endilisi ma basef Dembinai ea' dei' nembale'efa Jisas.

*Pol naloma Barnabas mafe' mataga wambel
Antiok nape etap hiagoma Pisidia*

¹³ Pol naloma amam malomanai makwaha wambel Pafos ea' mefa' nefam mafe' anona wambel Perga nape anona etap hiagoma Pamfilia. Ea' aman anama Jon nakwaha amam notanima nefe' Jerusalem.

¹⁴ Ea' makwaha wambel anama Perga mafe' mataga anona wambel Antiok nape etap hiagoma Pisidia. Anom nimeguf mafe'ma ea', nemaf anama Sabat esis Juda sapoma noma'wanai amam mafe' mawis ipat Juda sa'i basef sapeinai ea' matoma balata.

¹⁵ Ea' anona aman natalifa basefa mi'uli God naso' Mosesanai maloma basef amam profet ma'iami ea' amam agufumi Judai masapa' basef mafe'ma Pol naloma amam manda' maol etini ma'iam ma'i, "Alupipei, ipe' i'i anom basefa monda' ukup esis amam nematawai motaga la'ifim, ipe' awi kiam."

¹⁶ Ea' Pol nohafel nafela lagel na'i basef na'i,
"Ipe' Israel hipei paloma ipe' enipa epes panda'
lotuma Godi, ipe' peme' basef ae'ami.

¹⁷ God dembinai esis Israeli, anan nandandepa esis akusapa ape'isi ma nemaf anama esis safe' sailas sapani etap hiagoma Isip ea' anan nanda'as sataga epes hiesi wambota lounai. Anom nimeguf mafe'ma ea', pepel Ananinai atona nofa' esis sakwaha etap anama safi'i.

¹⁸ Ea' anama wafiguma fatauguma nofa' nimanimi ma waf esis sanda'anai ma afagof amama 40-peleim.

¹⁹ Ma etap hiagoma Kenan anan nahambombaga lain 7-peleina amam nematawa hiesi ea' nase'asa etap anama nafe'ma esis Israel,

²⁰ ea' sahapila etap anama sape afagof amama 450-peleim.

Ea' anan nafela amam dambami esis Israeli ea' amam mumafi esis sape satagama nemaf aman anama profet Samuel nataga.

²¹ Nemaf anama esis sawa salef sa'i sofa' anona king dembinai, ea' God nase'asa anona aman Sol, Kis nogalomana. Aman anama nataga wambota Benjamini. Ea' anan nape king dembinai ma afagof hiami 40-peleim.

²² Anom nimeguf mafe'ma ea', God nali'amona king Sol, nanda' Devit nataga nape king asasinai. Anan na'ipasa aman anama Devit na'i, 'Devit nogalomana Jesi, okom ae'anai nainailana. Anan nambimb nila okom ae'anai atona na'iami.'

²³ Ea' God nanda'am na'ama si'i fowa' na'iam na'i nondam. Ama wambota Deviti owagama God nefela Jisas, aman anama nofa' ape' Israeli.

²⁴ Fowa' Jisas ata' owa' nifi'i, nogota anama aman anama Jon nawalapa basef na'ipa esis

Israel hiesi ma somboma opalef sokwaha waf aonai sefe'ma Goda sefa' baptais.

25 Ea' felefele'ma Jon na'i nonda' maol anan-inai hi'ilana, anan na'i, 'Ipe' ukup ma'i ae' ma'imama? Ae' ina aman anama dembinai ipe' pape pembale'efanai, owa!. Ipe' peme!! Aman anama owagama nila ae' niefi'i, anan bu'unai nikila' ae'. Ae' ina bu'uwei ma etagaha mandelefa su ananimi, owa!'

26 Ipe' sahin owan, ipe' epes hiesi pataga wambota Abrahami, enipa owa' Judaipei panda' lotuma Godi, peme!. Dei' basef amama God nasapa'am mafi'mai ape' hiapai. Basef amama ma anan nambimb nofa'apa mokwaha waf aonai motanimani.

27 Ea' esis sape Jerusalemi saloma amam agufumi asasimi, esis ina sogawa aman anama nofa'apa motanimani, owa!. Esis ina sogawa andeande' basef amama amam profet fowa' ma'iami, owa!. Anom agufumi matalifam Sabat nimeguf hiami sapoma noma'wanai. Ea' ina sogawam, owa!. Basef amama atom mataga endilisi nemaf anama esis sanda' kotima Jisas sa'i anan aman aonai ma sahana noga!.

28 Esis ina sati anom basef ofagema waf aonai ma sohana noga!, owa!. Ea' sofalai gavman dembinai Pailat ma ni'i a'e ma mohana noga' etin.

29 Esis sanda'am hi'alam amamaga amama si'i fowa' amam profet ma'i basef manda'am mape buk Baibeli ma'iama anan. Nimeguf wanom mafe'ma ea!, esis satagaha anan nisila'i lawag usi'inai tu'wanainai ea' sawana anona hi'agif.

30 Ea' God nafelona wapot'i.

31 Esis isima hiesi sakwaha etap hiagoma Galili ea' salomana sondowasa' Jerusalemi, esis satolona nimeguf hiami. Dei' epes isima safe' sawalapa basefa ape' Israela anan.

32 Ea' ape' dei' ma'ipipa basef bu'wami ipe'. Amamaga amama fowa' God na'iama na'i nose'asas akusipa ape'isi,

33 ea' ma'um amama dei' God naso' ape' awasi ananipai ma nafela Jisas nepe namunai. Nafela Jisas si'i basef mape buk Baibel Buk Song nafe'ma bifi ma'iam na'ama. God na'i,

'Ine' nogalome ae'inai. Nemaf dei'inai ae' ataga ahalomena ine'wei.'

34 Dei' God nafelona wapot'i hi'agif, ea' anan ina ata' notanima nofe' hi'agif wapot'i folo'olana, owa'. Ea' na'ama etin si'i God na'iam wapot'i na'i,

'Nambimb ae' igiambamepa i'ipipa basef amama endilisimi Ae'ami. Fowa' basef amama a'iam ea' ma a'i i'ipanam Deviti, amama i'ipipa ma Ae' pepe pe bu'unai.'

35 Ea' si'i anom basef mape Buk Sami ma anan wapot'i ma'iam na'ama ma'i,

'Ina nambimb ni'i a'e ma aman anama nondai' maol ine'inai andeande' folo'olana, owa'.'

36 Ape' mogawa Devit nahapila maol naila okom Godi la'afena esis amam nematawa sape saloma anani. Anom nimeguf mafe'ma ea', anan naga' nafe' naloma amam bafapana ananimi ea' folo'walana.

37 Ea' aman anama God notanima nafelona wapot'i, anan ina folo'walana, owa'.

38 Amama atom dei' ae' a'i ipe' sahin owan pegawa basef ape'imi amama. Aman anama nakwaha waf aonai ipe' panda'anai.

39 Mi'uli anama God naso' Mosesanai anama ina la'ifina ma nokwaha waf aonai ipe' panda'anai ma pepe wafifipa andeande', owa'. Na'ama aman anama nakwaha waf hianai aonai ma ipe' emi egafipa pembale'efa anan, ma pepe wafifipa bo'wepa ma naep Godi.

40 Dei' ipe' pegawa waf ipe' panda'anai ande-ande' bo'ona o aona? Na'ama amamaga amama awami mifi'mai ipe' si'i amam profet fowa' ma'iami ma'i,

41 'Ipe' panda' basef findiwaimi, ipe' petologon ukup matamea mefe' ea' awepa. Ae' anda' anona maol la'ifinai ma nimeguf ipe' ata' papeimi. I'i enin epen ni'ipipa maol anama, ipe' ina atuwasi pembale'efa maol anama, owa!' "

42 Ea' Pol naloma Barnabas ma'i muwis mofe' ea' esis amam nematawa sa'iam na'ama sa'i, "Nemaf anama Sabat nigi'i ape' ma'i ipe' bipa pitanima pifi'i pi'ipapa basef amama wapot!."

43 Ea' esis sakwaha ipat esis Juda sa'i basef sapeinai sawisi ande' ea' esis Juda hiesi saloma enis epes hiesi sagi'mam. Esis isima saila waf esis Juda sanda' lotuwananai. Ea' amam biam mase'asa basef esis hiesi ma sape la'ifis sembale'efa God nanda' waf bu'unai ma ape' nagiambamapa etin.

44 Nimeguf wanom wanom atotona mafe'ma ea' Sabat nemaf nagii'i, amam nematawa sape wambel anamai safi'i sandakolasa same' basef

Godi. Amam nematawa isima felefele'ma hi'ilas wambel anama.

45 Na'ama esis Juda sati amam nematawa hiesi sandakolasi, ea' ukup kowalam endilisi. Ea' sa'i basef awami ma Pol sa'i anan nambaso'mas.

46 Ea' Pol naloma Barnabas ina umbamaham, owa'. Amam la'ifim ma'ipasam alihim ma'i, "Endilisi, afa' ata' wi'pipa basef Godi ipe' Juda pili'. Ea' ipe' pewa' alafugaha basef amama. Amama ipe' pa'iam pa'i, 'Ape' mandaiwa'ma mofa' ambal namunai ma mope andeande' la'ela'ef.'

Ipe' pa'i na'ama dei' ipe' peme'. Afa' dei' ok-waha ipe' ofe' ugi'ma epes owa' Judaisi wi'ipasa basef amama.

47 Dei' main, Dembinai na'ipafa mehipa anom basef mail buk Baibeli ma'l i na'ama ma'i, 'Ae' anda' ipe' si'i howalogon ma enis epes owa' Judaisi. Ama ipe' pigiambama esis amam nematawa sape wambel hiagomai ma etap anae'. Ama owagama efa'as sotanimani.' "

48 Ea' enis epes owa' Judaisi same' basef amama sandanifel endilisi. Esis sandanifela basef Dembinai safela agel Ananinai. Ea' amam nematawa isima God nosahe'asi ma sope namisi la'ela'ef, isima sombale'efa Jisas.

49 Ea' basef Dembinai mafe'agon hi'alagon anama hiagoma.

50 Na'ama esis Juda safela anowa nematawa agufuwai wanda' lotuma Godi waloma anom agufumi mape taun anama lu'wagoma saha Poli naloma Barnabas sanda'am kwapete'am. Ea' sagalo'mam wambel asasinai.

⁵¹ Ea' amam mandila'ma sopof mail bo'wagah amamumi ma mola ikwafa waf aonai napoma esis. Ea' mohafel mafe' Aikoniam.

⁵² Esis alupusi sombale'efa Jisasi sandanifel endilisi ea' pepel Ambal Bu'unai Godi nape si'ina esis.

14

¹ Ea' Pol naloma Barnabas mafe' mataga Aikoniam mafe' mawis ipat esis Juda sa'i basef sapeinai mawalapa basef si'i malii' manda'am. Amam mawalapa basef bu'wami ea' esis Juda hiesi saloma enis epes owa' Judaisi sombale'efa God.

² Ea' enis epes Juda ina sombale'efa God, owa'. Esis safela ukupa enis amam nematawa owa' Judaisi ea' sanda' epes isima opalef aoma esis Kristen.

³ Amam biam mapani nogota launai Aikoniam ea' mawalapa basef Dembinai la'ifim alihim. Amam ina umbamaham, owa'. Ma'ipasa basefa Dembinai nandahomas endilisi nagiambamas. Ea' Dembinai nanda' amam biam mataga la'ifim manda' ikwaf la'ifinai naninani hianai. Ea' dei' esis sogawa basef amama endilisimi atom.

⁴ Ea' esis amam nematawa taun anama sandawaloga biefis. Enis opalef atifim saloma esis Juda, ea' enis saloma amam aposel biam ukup etifim.

⁵ Esis epes ina Judaisi saloma esis sanda'ipama sa'i basef sandame'mam saloma amam agufumi assasimi ea' sa'i sonda' Pol naloma Barnabas aom. Sa'i sokwaha otamba soham afum.

⁶ Ea' amam biam mogawa amama mafa' mafe' etap hiagoma Likonia ma wambel biefina Listra naloma Derbe ea' anona wambel felefele'ma anama.

⁷ Amam manda' maol mawalapa basef bu'wami Godi ma esis sape wambel anama.

Pol naloma Barnabas manda' maol Listra naloma Derbe

⁸ Anona aman nepe wambel anama Listra, bo'wagah ananimi maga' mailana. Fowa' anan ata' nepe opaf mama'wanai bo'wagah ananimi maga' mailana nepe na'ama. Aman anama ina naitu nafe' kwaukwawie', owa'.

⁹ Ea' anan name' Pol na'i basef ea' Pol natolona titi nogawana na'i aman anama nembale'efa Goda notaga bo'ona wapot'i.

¹⁰ Ea' natolona titi na'i basef la'ifimi na'ama na'i, "Ine' hafel nitu."

Ea' nohafel mehip naitu ea' nafe'.

¹¹ Amam nematawa hiesi sati amama Pol nanda'ami ea' sa'i mehip diga Likoniai na'ama sa'i, "Amam god dambami ape'imi biam mataga si'i epes misila'a ape!!"

¹² Barnabas sofalana sa'i anona dembinai Sus. Ea' Pol anan aman nanda' basef atomi. Ea' sofalana sa'i anona dembinai Hermes.

¹³ Ipat esis sanda' lotuma Susi notawa ande' taun anama. Ea' pris nondolalima Susi nofa' anom bulmakau suwafumi maloma enis afis sowalo'ami ea' nafl'i uta anama tauni. Anan nalumai esis amam nematawa sa'i sondolali sonda' ofa ma amam biam.

¹⁴ Amam aposel Barnabas naloma Pol mame' esis sa'i basef na'ama, amam mawala luwaguf

maim amam malami. Ea' masagih mafe' mawala esis amam nematawa la'afena esis ma'ipas mehip ma'i,

¹⁵ “Ipe' epes, dei' maina panda'am na'ama? Afa' wandaiwa!. Afa' biafa ina God dembifai, owa!. Afa' epes atofa etin si'i ipe' wawalipipa basef bu'wami. Wawalipipa ma ipe' pekwhaha god anama falafunai baso'maimi ma pefe' pembale'efa God ambal namunai nape la'ela'efi. Anan nanda' otaga ilif naloma etap maloma epes hiesi saloma naoh embel lu'wami maloma amamaga hiami mape.

¹⁶ Endilisi fowa' nimeguf hiami nape nati amam nematawa hiesi saila waf asasinai.

¹⁷ Ea' anan ina nape nandambahi'i, owa!. Anan nihi'ambapa waf ananinai ma nanda' waf bu'unai ma ape!. Anan napani heven nanda' asaf nalai ma ipe' ea' nanda' amamaga gwa'aimi bu'wami mataga dende' nimeguf amamumi. Ea' nowapot'i'mipa gwa'aimi ipe', nanda' opalef ipe'imi mandanifel.”

¹⁸ Amam ma'ipasa basef amama, manda' maol lu'unai endilisi ma'ipas ina sandolalimam sanda' ofamam, owa!.

Esis sakwaha otamba saha Pol

¹⁹ Anom Juda mape Antiok naloma Aikoniam mafi'i Listra mafela ukup asasimi amam nematawa. Ea' dei' esis sakwaha otamba saha Pol sa'i endilisi anan afuna ea' sahonde'ana nawisi na'oh ande' taun anama.

²⁰ Ea' esis sombale'efa Godi safi'i saitu salipana, nohafel wapot'i ea' nafe' nawis taun anama. Wafilu nafe' naloma Barnabas mafe' Derbe.

²¹ Pol naloma Barnabas mawalapa basef bu'wami Godi taun anama ea' mafela ukup esis amam nematawa hiesi sataga alupusi Jisasi. Anom nimeguf mafe'ma ea', motanima mafe' wambel anama Listra naloma Aikoniam naloma Antiock.

²² Ea' manda' esis Kristen sataga la'ifis. Amam ma'ipasa basef la'ifimi na'ama ma'i, "Ipe' pepe la'ifipa pembale'efa dembinai God. Ape' meme' mofa' nimanimi mamumami lu'wami ma muwis nomon wambota Godi numafiapa."

²³ Ea' mandandepa agufumi mumafi esis Kristeni mandanda' ma sios amama hiami. Amam makwaha gwa'aimi manda' betena manda' esis sope la'ifisa lagel Dembinai anama sembale'efana.

*Pol naloma Barnabas motanima mafe' wambel
Antiock mape etap hiagoma Siria*

²⁴ Ea' amam mafe' la'afena anona etap hiagoma Pisidia, mafe' mataga anona etap hiagoma wa'ol Pamfilia.

²⁵ Amam mawalapa basefa epes sape Pergai ea' makini' Atalia.

²⁶ Anama Atalia malata sip ea' nefam mafe' Antiock. Wambel anama fowa' esis Kristen sandandepam mapoma lagel Godi ma nandahomam manda' maol anama dei' manda'anai hi'alana. Ea' dei' motanima maf'i wambel anama.

²⁷ Amam mataga Antiock mofala esis mowa'anias sandakolas etifigin ma'ipasa basefa maol Dembinai nepe nalomam nagiambamam manda'anai. Ea' ma'i, "God nanda' eaf nagala esis amam nematawa hiesi enis owa' Judaisi ma sombale'efa Krais."

28 Ea' mapani anom nimeguf hiami maloma esis sembale'efa Krais sailana.

15

Amam agufumi ma Kristen hiesi mandatama etifigin gani Jerusalem

1 Anom amam mape Judiai makini' mataga Antiok ma'ipama basef esis Kristen sahin owan sape anama. Ma'ipasa basef ma'i, "I'i ipe' amam owa' pila mi'uli God fowa' gani na'ipa Mosesanai ma owa' petopa' alop ipe'inai, anona nemaf God ina nofa'epa pitanimani, owa'."

2 Amam ma'iam na'ama, manda' ukup Poli Barnabasi wandafum endilisi ma'i basef la'ifimi mandahihianamam maloma amam Judaimi. Ea' esis Kristen sandandepa Pol naloma Barnabas maloma anom amam mombale'efa Kraisi wapot'i mondowasa' Jerusalem ma'i basef amama monandonam maloma amam aposel maloma agufumi siosi.

3 Esis Kristen sasapa'am mafe' ea' mafe' la'afena etap hiagoma Fonia naloma Samaria. Ma'ipasa basef esis Kristen sape etap anama biefina ma sogawa God namboma ukupa enis epes owa' Judaisi. Esis Kristen same' basef amama manda' esis sandanifel endilisi.

4 Amam mafe' mataga Jerusalem, amam aposel maloma esis amam nematawa Kristen saloma agufumi asasimi sohafel sandalalamam sanda'mam gude amam. Ea' Pol naloma Barnabas mohafel ma'ipasa basefa maol hianai God nagiambamama manda'anai.

⁵ Ea' anom Farisi mombale'efa Kraisi mohafel ma'ipa esis ma'i, "Ipe' petopa'mama alop amamunai, pil'ipama mila wafa mi'uli God fowa' gani na'ipa Mosesanai."

⁶ Ea' amam aposel maloma agufumi mumafi maol Godi mandakolas etifiggin mape monandona basef amama.

⁷ Amam ma'i basef hiami ma ea', Pita nohafel naitu na'ipam na'i, "Ipe' sahin owan, ipe' pegawa fowa' God nawaloga maola afa', ea' Anan nasahe'e ae' ea' ewalapa basef bu'wami ananimi ma enis epes owa' Judaisi seme'am sembale'efa God.

⁸ God nogawa opalef esis amam nematawa hiesi ea' nihi'ambafa okom Ananinai wila ma esis. Anan nihi'ambapa na'ama ea' nase'asa Ambal Bu'unai Ananinai esis si'i fowa' nali' nase'apana ape'.

⁹ Anan ina nanda' anona wafa ape' ea' nondam' anona waf esis, owa'. Esis sembale'efa God amama atom opalef asasimi mataga bo'om si'i afa'.

¹⁰ Dei' maina ipe' pa'i pegwamba God? Ipe' ina pese'asa amamaga amama nimanimi esis Kristen sofa'am, owa!. Fowa' amam bafalomapa maloma ape' wapot!, ina la'ifipama mofa' nimanimi amama ma matopa' alop ape'inai, owa!.

¹¹ Ape' mogawa eaf anama Dembinai Jisas nagiambamapa etin, dei' God nofa'apa matanimani ea' ananipai, ape' maloma esis wapot!."

¹² Pita na'iam na'ama ea' esis sandatama etifiggin ina sa'i anom basef, owa!. Ea' sape same' basef Barnabas naloma Pol ma'ipasami. Amam biam mawalapa basef hiami ma God nanda'am

la'ifim manda' amamaga pepel hianai ma naep esis amam nematawa owa' Judaisi.

¹³ Amam ma'ipasa ea', Jems na'iam na'i, "Ipe' sahin owan, ipe' peme' basef ae'ami.

¹⁴ Simeon na'ipapa ma dambadamba God nihu'ambapa nali' nati esis amam nematawa owa' Judaisi uwahipis nofa'ai enis sotanimani sope ananisi.

¹⁵ Ea' basef fowa' gani God na'ipa amam profet mape buk Baibeli na'ama etin si'i amama. Basef amama ma'iam ma'i,

¹⁶ 'Anona nemaf ae' etanima iefli', ipat anama Deviti natuwi, anama efelona notawa wapoti!. Amamaga ipat anamai aom, amama anona nemaf enda'am motaga dambaim wapoti' ea' efelona natawa.

¹⁷ Ae' enda'am na'ama ma esis soloma enis epes sololama Godi wapoti' sogolopa Dembinai, isima hiesi efalasi ea' ae'asi.

¹⁸ Fowa' gani endilisi Ae' Dembiwai awalapa basef amama.'

¹⁹ Dei' okom ae'anai nape na'ama. Epes hiesi owa' Judaisi samboma opalef safe'ma God ea'i, ape' ina mose'asa nimanimi esis, owa'!

²⁰ Ape' monda' anom basef mofe'ma esis mi'ipas mi'i ina sea' gwa'aimi maim sondolali-mama god baso'amunai, owa!. Amama alogw awami ma'ami. Esis sihi'amago waf aonai anama so'a waulanai ea' ina sea' mafis saham sowa' bagafowa afumi, owa!. Ina sea' esimbela anom mafis amama moloma anom mafis wapoti', owa!. Ae' a'i ape' monda'masa basef amama atom mofe'ma esis.

21 Dei' main, ape' mogawa fowa' gani nafi'i nafi'i nataga dei' ma amam mawalapa basef God fowa' naso' Mosesami ofagema amama atom mawalipasam taun anama hianai. Matalifam ifagw hiami ape' Juda ma'i basef mapeimi nimeguf hiami sapoma noma'wami."

*Amam manda'basef mafe'ma esis Kristen owa'
Judaiei*

22 Ea' amam aposel maloma agufumi mumafi maol Godi maloma esis Kristen hiesi sa'i basef etifim sandandepa anom amam biam asasimi mefe' Antiok maloma Pol naloma Barnabas. Amam amama agufumi Judas agel wa'ana Barsabas naloma Sailas. Amam biam agof lu'wami la'afena esis Kristen. Ea' sa'i sosapa'am mofe' Antiok moloma Pol noloma Barnabas.

23 Esis sase'ama anom basef mail pepa ma lagof amam biam Judas naloma Sailas ma'i na'ama ma'i, "Afa' aposel agufufai sahopepa afa'ipei, afa' dei' wanda'ago basef amama mafe'mago ipe' sahin owan owa' Judaipei. Ipe' pape wambel Antioki ma etap hiagoma Siria naloma Silisia, afa' wa'i nemaf bu'unai ma ipe'.

24 Afa' wame'am enis epes afa'isi safo'o sanda'epa pehafel gegelalasipa kwapete'epa ma basef asasimi, sanda'epa umbamahepa ukup matamea. Esis sanda'am na'ama sa'i somboma ukup ipe'imi. Ea' afa' ine' wa'ipas safo'o sanda'epa na'ama, owa'!

25 Afa' wame' basef amama ea' wa'ipasa ukup mape atogon wa'i basef wandame'mam.

Ea' wandandepa amam amama biam ma osapa'am mefe'mago ipe' malomago biam ape' ukup mailam endilisi, Barnabas naloma Pol.

²⁶ Amam biam ina umbamahama enis epes soham mogal' mefela agel Dembinai ape'inai Jisas Kraisi monda' maol ananinai, owa'.

²⁷ Afa' dei' wasapa'ago Judas naloma Sailas ama nambimb mi'ipipa basef amama atom afa' wa'iam wanda'am mail pepa mafe'mago ipe'.

²⁸ Ambal Bu'unai Godi nepe nalomafa wa'i basef wandame'mam na'ama. Afa' ina ose'epa anom nimanimi pefa'am, owa'. Waf anama atona ipe' penda'ana.

²⁹ Ipe' ina pea' mafis saham sondolali ma god baso'amunai, owa'. Ipe' ina pea' esimbela anom mafis, owa'. Ipe' ina pea' mafis sowa' bagafowa ma afumi, owa'. Ea' pihi'ama waf anama so'a waulanai aonai. I'i ipe' pindumafuma andeande'ma pihi'ama waf anama, andeande' ipe' penda' waf bu'unai pepe andeande!."

³⁰ Ea' esis Kristen sape Jerusalemi sasapa'am mafi'i Antioch, makolasai esis Kristen etifigin mase'asa pas amama.

³¹ Ea' esis satolom sandanifel ama basef amama bu'wami manda'as sataga la'ifisa bale'ef.

³² Judas naloma Sailas amam profet. Dei' ma'ipasa basef hiami bu'wami esis Kristen, manda'as sataga la'ifis mafela ukup asasimi.

³³ Amam ata' mapani anom nimeguf Antioch, esis Kristen sanda'mam nemaf bu'unai ma amam mape opalef awanem. Ea' sasapa'am mutanima mafe'ma esis sasapa'am mafi'i.

³⁴ Ea' Sailas na'i nopani Antioch.

³⁵ Ea' Barnabas naloma Pol ata' mapani Antiok maloma anom amam hiami wapot'i mawalapa basef bu'wami Dembinai mawalipasam.

Pol naloma Barnabas mandawalog a mafe' deindei

³⁶ Anom nimeguf mafe'ma ea', Pol na'ipa Barnabas na'i, "Afa' biafa otanima ofe' uti esis Kristen sahin owan taun anama hiagoma fowa' wafe' wawalapa basef Dembinaima. Ofe' ogawas, sape andeande' o owa."

³⁷⁻³⁸ Ea' Barnabas na'i no'wa Jon agel wa'ana Mak nofe' nolomam. Ea' Pol nandaiwa'ma anan nofe' nolomam. Dei' main, aman anama fowa' nakwaha amam gani Pamfilia notanima nafe'. Ina nalomam etin mafe' mambefa maolan, owa'.

³⁹ Amam biam manda' migimigaha amama ea' dei' ina ata' manda' maol etifigin, owa'. Ea' Barnabas nao'wa Jon Mak nafe' nalomana malata anona sip mafe' anona ailan Saiprus.

⁴⁰ Ea' Pol nao'wa Sailas nalomana mafe'. Ea' esis Kristen hiesi sasapa'am sa'i, "Okom lu'unai Dembinai nope nolomepa nigiambamepa numafipa."

⁴¹ Ea' Pol nafe' la'afena etap anama hiagoma Siria naloma Silisia naloma Sailas mafe' manda' esis Kristen sataga la'ifis.

16

Timoti nafe' naloma Pol

¹ Pol naloma Sailas mafe' mataga Derbe ea' makwaha Derbe mafe' Listra. Wambel anama anona aman alupunai nembale'efa Jisasi nape,

agilinama Timoti. Anan mama'wana ano'w nemata'w Judai'wi, akwa'w wapot'i kombale'efa Jisasi. Ea' ahalomana anona epen Grikinai.

² Esis Kristen sahin owan Listra naloma Aikoniham sa'i waf Timoti nanda'anai bu'unai.

³ Pol na'i Timoti nefe' nolomana. Amama atom dei' nao'wana natopa'mana alop. Pol okokoma esis Juda sape na'amai na'i, "I'i Timoti owa' neatopa' alop, esis ina nambimb sila basef animi, owa!." Na'ama dei' naila waf esis Judai natopa'mana alop. Dei' main, esis hiesi sogawa Timoti ahalomana anan Grikinai.

⁴ Nimeguf hiami amam maitu mafe' wambel hiagoma ma'ipasa basef esis. Basef amama fowa' amam aposel maloma agufumi ma'iam mandame'mam Jerusalemi, amama dei' ma'ipasam esis Kristen ea' ma'ipas ma'i, "Ipe' pila basef amama."

⁵ Ea' dei' esis Kristen sombale'efa Jisasi sataga la'ifis endilisi ea' wambota esis Kristeni sataga sandanda nimeguf hiami sataga hias endilisi.

*Pol nape nati amamaga si'i na'oh nandondo'oh
nati anona aman Masedoniainai*

⁶ Ambal Bu'unai Godi nasopama amam mawalapa basefa esis sape etap hiagoma Esiai. Ea' mafe' la'afena etap hiagoma biefina Frigia naloma Galesia.

⁷ Ea' mape anona etap hiagoma Misia, mafe' mataga felefele' ma anona etap hiagoma nafe' notanimaima Bitinia ma'i muwis etap anama ma mawalapa basef Godi etap anama hiagoma. Ea' Ambal Bu'unai Jisasi na'ipapa na'i owa'!

8 Ea' amam mawis etap hiagoma mafe' Misia misila'agon makini' mafe' Troas.

9 Owamb anama Pol nati anom amamaga si'i na'oh nandondo'oh nati anona aman Masedoniainai naitunofalai Pol na'ipana mehip na'i, "Ine' newala nimbuwi naoh ea' nifi'i Masedonia nigiambamapa."

10 Ea' Pol nati amama, afa' mehip wandoga eaf wafe' etap hiagoma Masedonia. Afa' ogawa Godnofalafa ma owalapa basef bu'wami ananimi ma esis.

Lidia kwataga Kristen

11 Ea' walata sip wambel anama Troas ea' wafe' usi'ifa Samotres. Wefilu wafe' Neapolis.

12 Ea' wakwaha wambel anama wafe' Filipai, anama fowa' esis Rom safi'i sapoma. Wambel anama lu'unai ma etap hiagoma Masedonia. Ea' wape anama anom nimeguf.

13 Wape anama, nemaf anama sabat nataga wafe' wawis endalelemb uta ande' ma wambel anama wafe' anona walemb. Afa' wa'i wambel anama esis Juda sanda' beten sapoma. Wape anama, wati anowa nematawa ondowa'anima wape etifiggin ea' afa' wafe' wape walomawa wa'i.

14 Ano'w nemata'w agili'wa Lidia kwanda' lotuma God kwape kwalomawa. Dembinai namboma okom akwa'inai kwame' basef amama Pol na'ipakwami. Akwa'w Taiatairai'wi, kwanda' maol kwanda' bisnisa luwaguf akwahimi.

15 Ea' kofa' baptais kwaloma esis sape ipat atona wapotii'. Akwa'w kofa' baptais, kwa'ipafa basef kwa'i, "I'i ipe' ukup mi'i ae' embale'efa

Dembinai endilisi, ipe' fi'i pepe peloma ae' ipat ae'anai."

Ea' akwa'w la'ifikw kwao'wafa wafe' waila basef akwa'umi.

Pol naloma Sailas manda' kalabus Filipai

¹⁶ Anona nemaf afa' wafe' anama esis sanda' beten sapoma, wati ano'w nemata'w kwafi'i kwallolofa eaf. Akwa'w agel a'akw kwape owinga anom amam kwanda' maolana amam. Nemata'w akwama anona ambal aonai napai'w ea' nawalapa basefa amamaga nambimb meatagai. Akwa'w kwahali' ambal anama ma basef mamumami ea' nagwama'wa basef. Ea' dei' amam amama dambami akwa'umi mofa' otamba hiami ma akwa'w kwanda'am na'ama.

¹⁷ Nemata'w akwama kwagi'ma Pol kwaloma afa', kofalafa timbi tambel kwa'i, "Amam manda' maola God nape ilif endilisi ma'ipapa basefa eaf God nofa'apa mutanimani."

¹⁸ La'ela'ef nemata'w akwama kwanda'am na'ama etin nimeguf hiami. Ea' Pol okom aona endilisi ma akwa'w, nandamboma na'ipa ambal anama napai'wi na'i, "Ae' a'ipina agel Jisas Kraisi, kwaho'w nemata'w akwama ea' fo'o!"

Ea' dei' atef ambal anama nakwaha akwa'w ea' nafe'.

¹⁹ Ea' nogota anama amam mumafia'wi mogawa ofagema ma eaf anama mofa' otambanai owa'. Ea' dei' mombalo' Pol naloma Sailas mahonde'am mafe'ma sandowa'anima ma mi'ipa amam agufumi mumafi koti mapoma.

²⁰ Ea' ma'ipam ma'i, "Amam amama biam Judaimi, amam mafela ukup awami esis amam nematawai ma wambel ape'ima.

21 Ea' mawalapa basefa anona waf ape' epes Romipai mandaiwa'manai. Mi'uli ape'inai nandaiwa'ma ape' mila waf anama amamunai, owa!"

22 Ea' esis amam nematawa wapot'i sambaso'ma amam biam. Ea' amam dambami mu-mafi koti mowaliam siogw amamumi ma mopa-gahom.

23 Ea' amam mapagahom mehip timbi tambel ea' manda'am manda' kalabus. Ma'ipa aman naitu numafi utai mehipa nope numafiam ande-ande'.

24 Ea' anan name' basef la'ifimi na'ama, nanda'am mapani rum anama nape la'afen ato-
gon ipat anama sanda' kalabus sapeinai. Ea'
nowa' bo'wagah amamumi sen, mail anona endap lu'unai.

25 Owamb la'afina amanota Pol naloma Sailas manda' beten manda' awalef mafela agel Godi ea' enis epes sanda' kalabusi same' manda'am.

26 Ea' mehip suwambon lu'unai nakoto' olalef mombalo' ipat anama sanda' kalabus sapeinai. Ea' utagw mandawisi', sen nowa' esis hiesi sanda' kalabusi nandatagah.

27 Ea' anan numafi esis sanda' kalabusi nohafel nati utagw ipat sanda' kalabus sapeinai mandawisi', na'i sanda' kalabusi sawisi safi' safe!. Ea' nagiai bainat ananinai na'i noha anan noga'!

28 Ea' Pol na'ipana mehip na'i, "Ai, ine' owa' nehambombaga ine!! Afa' hiafai wape na'ae!"

29 Ea' anan numafi kalabusi mehip nofalasa nogwapin sofa'ana safi'i ea' nasagih nafi'i nawisi nomon Pol naloma Sailas mapoma. Anan

umbamahana endilisi ilaus mana nape nindiwa nembawa notawa opalefima amam biam.

³⁰ Ea' nofa' amam biam mawis ande' nahali'am na'i, "Ipe' dembipei, ae' enda' maina nambimb God nofa'e itanimani?"

³¹ Ea' amam ma'ipana ma'i, "Ine' nembale'efa Dembinai Jisas, ama nambimb God nofa'ena netanimani. Ea' neloma wambota ine'inai wapot'i na'ama etin."

³² Amam ma'ipana basef Godi naloma epes isima sape ipat ananinai.

³³ Ea' dei' atef owamb anama atona anan nofa' amam NASA'opamam esimbela melegw amamumi sahamma. Ea' mehip anan naloma wambota awasi waulu'mana ananisi sofa' baptais.

³⁴ Ea' nofa'am mafe' ipat ananinai nase'ama gwa'aimi. Ea' anan naloma esis hiesi sape ipat ananinai sandanifel endilisi ma sombale'efa God.

³⁵ Ea' lala, amam dambami manda'masa koti masapa' plisman amamumi maf'i'i ma'i, "Ipe' kwaha amam amama biam mofo'o."

³⁶ Ea' anan numafi kalabusi nofa' basef amama nafe'ma Pol na'ipana na'i, "Amam dambami manda'masa koti masapa' basef maf'i'mai ipe' apefe'. Na'ama dei' ipe' pekwhaha kalabus pefe' ea' opalef ipe'imi mope awanem."

³⁷ Ea' Pol na'ipa amam plisman na'i, "Afa' biafa Romufai, amam ina manda' kotimafa andeande'ma miti anona waf aonai ma afa' biafa, owa!. Amam mahafa etina naep esis amam nematawai. Ea motofa afa' ofe'!? Owa!! Amam ata' mifi'i mo'wafa uwis ande'!"

³⁸ Ea' amam plisman mofa' basef amama mafe'ma amam amama dambami manda'masa

koti, mame' basef ma'i amam biam Romumi ea'
umbbamaham.

³⁹ Ea' mafe'ma amam biam maolai amam
mawisi ande' ma'i basef bu'wami malomam.
Ea' ma'ipama mokwaha wambel anama mefe'
anagon.

⁴⁰ Ea' makwaha ipat sanda' kalabus sapeinai
mawisi mafe' ipat Lidiai mati esis Kristen
ma'ipasa basef manda'as sataga la'ifis ea' mafe'.

17

Esis Tesalonaika sa'i soha Pol noloma Sailas

¹ Amam biam mafe' mataga anona wambel
Amfipolis ea' makwahagon mafe' mataga Apolo-
nia. Ea' makwaha wambel anama wapot'i ea'
mafe' mataga Tesalonaika. Anona ipat lu'unai
esis Juda sa'i basef sapeinai notawa wambel
anama.

² Ea' Pol nanda'am na'ama etin si'i la'ela'ef
nanda'am ea' nafe' nawis ipat anama nalomas.
Amam biam mape wikifah wanom ama nimeguf
amama wanom sapoma noma'wanai sabat, ea'
Pol na'i basef Godi mail buk Baibelia nalomas.

³ Anan nawalapa basef ofagema Godi
na'ipasam na'i, "Krais God nasapa'ana nafi'i
anan nofa' nimanimi lu'wami ma naga'
notanima nohafel wapot'i!"

Ea' anan na'i, "Jisas anama dei' ae' awalapa
basefanai, anan Krais."

⁴ Ea' enis amam nematawa Judaisi sombale'efa
Krais ea' saila Pol noloma Sailas sawis wambota
Godi. Enis Grik sanda' lotuma Godi hiesi saloma
anowa nematawa dembiwai hiawai esis wapot'i
sawis wambota Godi saila amam biam.

5 Ea' esis Juda kowalas opalef aoma esis hiesi sombale'efa basef Pol naloma Sailas ma'ipasami. Na'ama esis sofa' anom amam awami manda' waf aonai. La'ela'ef amam mape anama esis sandakolas etifigin sapoma. Ea' sa'ipa amam nematawa hiesi sape wambel anama safela ukup asasimi ma sopa'. Ea' safitap endilisi sa'i basef lupa'aimi safe' sawisi uta sawis ipat Jesoni ma suwis sogolopa Pol naloma Sailas. Sa'i sofa'am muwisi ande'ma sose'am amam nematawa hiesi.

6 Ea' esis ina sati amam biam, owa'. Ea' sahonde'ai Jeson ipat anama naloma anom Kristen mafe'ma amam agufumi wambel anama. Esis sa'ipa agufumi amama mehip sa'i, "Amam amama biam manda' waf aonai nataga etap hi-agoma ea' dei' mafi'i mape na'ae.

7 Ea' Jeson nao'wam mape ipat ananinai. Amam mosambala lo dembinai gavman Romunai, ma'i anona king dembinai nape agel ananinai Jisas."

8 Esis amam nematawa hiesi saloma agufumi wambelimi same' basef amama, sohafel gegelalasis kwapete'as sa'i mehip.

9 Ea' dei' agufumi manda' Jeson naloma anom Kristen amama mali' matala kot motagaha amam mafe' wafifim.

Pol naloma Sailas mafe' mawalipasa basef Godi Beria

10 Owamb nataga amam Kristen masapa' Pol naloma Sailas mafe' anona wambel Beria. Amam mafe' mataga Beria, mafe' mawis ipat lu'unai esis Juda sa'i basef sapeinai.

¹¹ Epes sape Beriai ukup mohafel endilisi same' basef sanda' waf bu'unai sikila' esis sape Tesalonaikai. Dei' main, esis Beria sofa' basef sandanifelamam endilisi. Ea' la'ela'ef satalifa basef mail buk Baibeli ma sogawa basef Pol na'ipasami endilisimi o owa'.

¹² Ea' dei' amam nematawa Juda hiesi sombale'efa Krais. Ea' anowa nematawa hiawai agof lu'wami waloma anom Grik hiami wapot'i sembale'efana.

¹³ Ea' anona nemaf esis Juda sape Tesalonaikai same' basef ma'i Pol nawalapa basef Godi Beria. Ea' safe' safela ukup esis amam nematawa sape Beriai aom.

¹⁴ Na'ama dei' atef amam Kristen masapa' Pol nakini' nafe' naoh akata. Ea' Sailas naloma Timoti atom mape Beria.

¹⁵ Ea' amam mofa' Pol mafe' eaf maitumana mafe' mahaponana Atens. Amam motanima mafe' ea', Pol nasapa' basef mafe'ma Sailas naloma Timoti na'i, "Ipe' bipa pifi'mai ae' mehip."

Pol na'i basef Godi Atens

¹⁶ Pol nepe nahafa amam biam Atens ea' nati wambel anama nati god baso'amunai hianai endilisi. Ea' okom nandaiwa' endilisi ma esis sanda' lotuma anama.

¹⁷ Ea' nimeguf hiami anan nafe' ipat esis Juda sa'i basef sapeinai na'i basef hiami naloma esis Juda saloma enis isima sanda' lotuma Godi. Nalomas sa'i basef sandahihianamam nahagofa ukup asasimi. Ea' nimeguf hiami nafe' anama esis sandatama etifigin sapoma na'i basef hiami nalomas sa'i sandahihianamam saloma enis safi'i sapani.

¹⁸ Anom amam tisa mogawa gawaimi anom Epikurian maloma anom Stoik ma'i basef mandahihianamam maloma Pol ma'i, “Aman anama okom nahaga nagaoli na'i basef mamumami, anan na'i ni'i main?”

Pol nawalapa basef bu'wami Jisasi na'ipasa Jisas nohafel hi'agif.

Ea' anom amam ma'i, “Anan na'i nowalapa basefa anom god dambami anona wambili?”

¹⁹ Ea' amam magawa gawai mefa' Pol mafe' maloma anom gawaimi mandatama etifigin anona domota agel Areopagus. Amam ma'i, “Afa' wa'i ogawa basef amama dambaimi ine' nawalapama esis amam nematawai.

²⁰ Afa' wagahembe'ma basef ine'imi ma ogawam. Owa!, anom basef. Ea' dei' afa' wa'i ogawa basef amama ofagema.”

²¹ Esis Atens hiesi saloma epes anona wambelisi safi'i sape Atensi, ina safi'i sanda' anona maol, owa!. Esis sape nimeguf hiami sape sa'i basef atom dambaimi ma seme' anom basef dambaimi.

²² Ea' Pol naitu la'afena amam gawaimi mandatama etifigin halaf Areopagusi na'ipasam na'i, “Ipe' epes Atensipei, ae' ati ipe' la'ifipa endilisi ma amamaga hiami panda' lotumami.

²³ Do'ok ae' af'o ati amamaga amama ipe' panda' lotumami ea' ati anona otam ipe' panda' ofa panda' lotumanai wapot'i, esis sanda' anom basef mail otam anama ma'i na'ama ma'i, ‘god anama ape' owa' mogawa agilinamae.’ Ipe' panda' lotuma anama ipe' owa' pegawa agilinama, dei' ae' awalapa basef alihim a'ipipana.

24 God nanda' etap naloma ape' epes maloma amamaga mape etap anae', anan Dembinai ma ilif etapi. Anan ina nepe nomona ifagw lotumi epes sanda'am lagufi, owa!.

25 Anan atona nase'asa ambal namunai naloma hiami epes hiesi. Ea' Anan ina anom amamaga a'ana ma epes sigiambamana sose'ana anom amamaga, owa!.

26 Aman atona anan God nanda' epes amam nematawa hiesi sataga etap anae!. Ea' nanda'as sape etap hiagoma. Anan atona nanda' nimeguf ma'uma'um mandahama esis sape eti. Ea' nadandepa etap nafe' neatambela naloma wambel asasima.

27 God nanda'am na'ama ma esis sogolopa anona sombale'efana. I'i esis sogolopana sefe' sombale'efana o owa!? Anan ina nepe laogona ape' hiapai atona etin, owa!. Nape felefele'ma ape' hiapai.

28 Si'i anona aman ipe'inai na'i basef na'i, 'Ape' mofa' ambal namunai ma anan ea' nase'apa pepel, dei' maitu mafe!.' Si'i anom amam gawaimi ma'i na'ama ma'i, 'Ape' wapotil' awasi ananipai.'

29 Ea' Pol na'ipam wapotil' na'i, "Ape' mape awasi Godi. Na'ama ape' ina ukup mi'i anan si'i ambal atona epes sanda' otamba gol siliwa sanda'anai, owa!. Anama ina ukup epesi atom ma'i sanda'ana gawa asasinai, owa!.

30 Fowa' gani epes owa' seagawanai, God ina na'i basef mamumami ma amamaga hiami esis sanda'am nogota anama, owa!. Ea' dei' anan na'ipas na'i mehip epes hiesi ma wambel etap

hiagoma na'i, 'Ipe' pemboma opalef pila Ae!.'

³¹ Anan nandandepa anona nemaf ea' ma nonda' basefa kot, nowaloga waf amam nematawa hiesi sanda'anai. Basefa kot anan-nai mofe' bo'om andeande!. Anan nandandepa anona aman ea' ma nohapila kot anama. Aman anama naga' ea' God nafelona wapot'i hi'agif. Amama atom dei' epes hiesi sape etap hiagomai sogawa basef amama endilisimi atoma anan anona nemaf nonda'mas kot anama."

³² Esis same' basef amama ma epes sohafel wapot'i hi'agif ea' enis sa'i basef sanda' iafana. Ea' enis sa'i, "Wila, ape' ma'i nambimb mome' basef ine'imi wapot'i ma amamaga amama."

³³ Ea' Pol nakwaha amam mogawa gawai mandatama etifigin mapeinai ea' nafe'!

³⁴ Ea' enis epes kwaie'wis sombale'efa Jissas saila Pol safe!. Epes isima Dionisius, anan nagawa gawai ma amam mandatama etifigin Areopagus naloma ano'w nemata'w agili'wa Damaris saloma enis epes wapot'i!.

18

Pol nanda' maol Godi wambel Korin

¹ Ea' Pol nakwaha Atens nafe' anona wambel Korin.

² Ea' nati anona aman Judainai agilinama Akwila. Mamasana solana nataga Pontus. Nimbewa' nakwaha etap hiagoma Itali nafi'i naloma waulu'mana Prisila. Dei' main, Klodius nape dembinai gavman Romunai na'ipa esis Juda mehipa sokwaha Rom sotanima sefe!. Ea' Pol nafe' na'i niti esis bias.

³ Ea' nepe nanda' maol naloma esis. Dei' main, anan nanda' maol anama atona naloma esis sofa' otamba maima sagundisa sel sanda'am sala' ifagwami.

⁴ Nimeguf hiami esis Juda sapoma noma'wanai, Pol nave' ipat esis Juda sa'i basef sapeinai ea' na'i nofela ukup asasimi ma sombale'efa Jisas, esis Juda saloma esis Grik wapot'i>.

⁵ Sailas naloma Timoti makwaha etap hiagoma Masedonia mafi'i Pol napoma, nogota anama Pol nakwaha maol anama nagundisa sel ea' la'ela'ef nawalapa basef bu'wami Godi nimeguf hiami. Nawalapa basef la'ifimi esis Juda na'ama na'i, "Jisas anan Krais, God nandandepana nasapa'ana nafi'i."

⁶ Ea' esis Juda sosambala basef ananimi sanda' anan findiwana. Ea' nanda'masa anona ikwaf nihi'ambasa waf aonai esis sanda'anai. Nandilama sopof usas mail luwaguf ananimi ma'oma esis na'ipasa basef la'ifimi na'i, "I'i ipe' hegiliba, ofagema ipe'imi atom. Ae' basef a'e ma amama. Dei' ae' efe'ma iwalipa amam nematawa isima owa' Judaisi."

⁷ Ea' Pol nakwaha ipat esis Juda sa'i basef sapeinai nawisi ande' nave' anona ipat notawa felefele'ma ipat anama ea' nepe la'ela'ef. Ipat anama anona amani, agel ananinai Titius Jastus. Aman anama nogawa God nanda' lotumanai.

⁸ Anona aman agilinai numafi lotu esis Judai Krispus. Anan naloma esis wambota ananisi hiesi sombale'efa Dembinai. Ea' esis Korin hiesi same' basef Pol nawalipasami sombale'efa Jisas sofa' baptais.

⁹ Anona owamb Pol nati anom amamaga si'i na'oh nandondo'oh, Dembinai na'ipana na'i, "Ina umbamahena nesopama malogel, owa!. Newalapa basef ni'iam.

¹⁰ Dei' main, ae' ape alomena. Amam nematawa hiesi sape taun wambel anama esis ae'asi. Na'ama ina enin epen nehafel neham-bombagena, owa!."

¹¹ Ea! Pol nape wambel anama Korin nogota launai afagel si'inai tu'waninai ea' na'ipasa basef Godi nawalipasam.

¹² Anona nemaf anona aman agilinama Galio nataga nape gavman dembinai ma etap hiagoma esis Grik sapoma. Nogota anama esis Juda sa'i basef sandame'mam sombalo' Pol sofa'ana safe'ma kot sambaso'mana sa'i,

¹³ "Aman anama nafela ukup esis amam nematawai ma sosambala basefa mi'uli God fowa' naso' Mosesanai ape'inai sanda' lotuma Goda anona waf."

¹⁴ Pol na'i nogwa basef, Galio na'ipa esis Juda na'i, "I'i aman anama nowala lo nondai' anona waf aonai ma pa'i penda'mana basef, ae' eme' basef ipe'imi.

¹⁵ Ea' owa!. Ipe' pafi'i pahali'ima enda' kota basef maloma anom agofa mi'uli ipe'inai atona. Ea' hapaimi, ipe' etipa penandondombam. Ae' andaiwa'ma eme' kota amamaga na'amaimi, owa!."

¹⁶ Ea' anan natofa esis sakwaha kot safe!.

¹⁷ Ea' esis sombalo' Sostenes agilinai numafi lotu esis Judai, sahana felefele'ma anama esis wambelisi sanda' kota. Ea' Galio ina okom

napoma amamaga amama, owa!. Nape natolom etin.

Pol notanima nafe' Antiock etap hiagoma Siria

¹⁸ Pol ata' nape nimeguf hiami wambel anama Korin naloma esis Kristen. Ea' nanda'masa nemaf bu'unai esis nakwahis nalata sip. Sip nakwaha wambel anama na'i nefe' etap hiagoma Siria. Akwila naloma Prisila safe' salomana. Nemaf anama Pol owa' ata' nolata sip, anan natopa' auf balaga wambel anama Senkria. Dei' main, anan na'i basef la'ifimi naloma Goda na'i nonda' anom amamaga.

¹⁹ Esis safe' sataga Efesus, Pol nakwaha esis Prisila kwaloma Akwila wambel anama. Ea' anan atona nafe' nawis ipat esis Juda sa'i basef sapeinai naloma esis Juda sa'i basef nawalipasa basef Godi ma nefela ukup asasimi sombale'efa Jisas.

²⁰ Ea' sa'ipana sa'i, "Ine' nepe nogota laona nelomapa."

Ea' na'i, "Ae' nambimb wila."

²¹ Ea' na'i nemaf bu'unai ma esis na'i, "I'i God ni'i aho'me, anona nemaf itanimai ifi'i itilipa."

Ea' nakwaha Efesus nafe' sip.

²² Sip nafe' nail Sisaria, Pol nisila' nafe' Jerusalem nanda'mas nemaf bu'unai naloma esis Kristen hiesi. Ea' nafe' Antiock.

Apolos nawalapa basef Godi Efesus

²³ Pol napani nogota launai kwaukwawie' Antiock ea' notanima nafe' wapot'i anona wambel hiagoma ganigani ma etap hiagoma Galesia naloma Frigia fowa' nali' nafe'ma. Ea' nanda' maol

nanda' esis Kristen hiesi sataga la'ifis ma sombale'efa Krais.

²⁴ Anona Judainai aman Aleksandriainai nafi'i nepe Efesus. Agel ananinai Apolos. Anan na'i basef bu'wami atom, nogawa buk Baibel andeande!.

²⁵ Fowa' enis sawalipana ma eaf Dembinai ea' dei' la'ifina endilisi ma na'ipas andeande' amamaga Jisas nanda'ami. Ea' anan nogawa basefa baptais Joni atom.

²⁶ Ea' nafe' ifagw esis Juda sa'i basef sapeimi nawalipasa basef. Anan ina umbamahana ma esis amam nematawa, owa!. Prisila kwaloma Akwila same' anan sao'wana safe' ipat asasinai sihi'ambana anom basef wapot'i' ma eaf Godi ma nogawa basef ofagema.

²⁷ Ea' Apolos na'i nefe' esis Krik sapoma ea' esis Kristen sape Efesusi sanda' okom ananinai nataga la'ifina ma nanda'as na'ama. Esis sanda' anom basef mafe'ma esis Kristen Grikisi sa'ipasa sofa'ana. Apolos nafe' nataga Grik sapoma, nati enis amam nematawa sombale'efa Jisasi. Fowa' God nati uwahipis nagiambamas sembale'efana. Dei' Apolos nanda' maol nagiambama Kristen isima andeande' nanda'as sataga la'ifis ma sombale'efa Krais.

²⁸ Anan la'ifina endilisi ma nagwa basef esis Judai ma naep esis amam nematawai. Anan la'ifina nalomas nandahihianama natalogofas nikila'as. Ama nihi'ambamasa basef alihima buk Baibela Jisas Anan Krais God nasapa'ana nafi'i.

Pol nanda' maol Godi Efesus

¹ Apolos nepe Korin, nogota anama Pol nafe' wambel anama nepe nomona halafutagw ea' nafe' nataga Efesus nati enis Kristen.

² Ea' nahali'as na'i, "Fowa' ipe' pembale'efa Jisas pefa' Ambal Bu'unai Godi?"

Ea' esis sa'i, "Ata' owa'. Ape' ina mame' basefa anan Ambal Bu'unai Godi Holi Spirit nepe, owa!."

³ Ea' Pol na'ipas na'i, "Dei' ipe' pefa' baptaisa main?"

Ea' sa'i, "Ape' mofa' baptais Joni."

⁴ Ea' Pol na'i, "Fowa' Jon napis'i as embeli na'iam na'i, 'Ipe' pemboma opalef pewa' alafugaha waf aonai pefe'ma God pefa' baptais. Ea' pembale'efa aman anama Dembinai nambimb nigi'ma ae' nifi'i. Aman anama anan Jisas.' "

⁵ Esis same' basef amama, sembale'efa Dembinai Jisas sofa' baptaisa agel Ananinai.

⁶ Ea' Pol nawamona lagofa esis, Ambal Bu'unai Godi nafi'mai esis nafelas sa'i diga naninani sawalapa basef si'i amam profet ma'iami.

⁷ Esis seamba epes isima sataga felefele'ma 12-peleis.

⁸ Ea' Pol nafe' nawis ipat esis Juda sa'i basef sapeinai nawalapa basef bu'wami Godi. Anan nanda'am na'ama etin nepe aomb wanemb. Ina umbamahana, owa!. Anan la'ifina na'ipas. Anan naloma esis sape sa'i basef etin, na'ipasa nefela ukup asasimi ma sogawa siowis nomon wambota Godi numafias la'ela'ef.

⁹ Ea' enis sasopama opalef la'ifis endilisi, ina sombale'efa Jisas, owa!. Esis sa'i basef awami ma eaf Dembinai ma naep esis amam nematawai.

Ea' dei! Pol nakwaha esis hiesi nao'wa esis Kristen etis safe' salomana. Ea' Pol nawalapa basef nimeguf hiami la'ela'ef ipat anama Tiranus, anama sawalipasa basefa.

¹⁰ Ea' nanda'am na'ama etin nepe afagof biam. Esis amam nematawa hiesi sape etap hiagoma Esiai wambel hiagoma same' basef Dembinai, esis Juda saloma isima owa' Judaisi wapot'i'.

Amam Skeva nogamana

¹¹ God nagiambama Pol nanda' pepel la'ifinai hianai si'i God nanda'anai.

¹² Esis sati amama, sofa' hankisip luwaguf maima sanogam alop Poli, sofa'as safe'ma esis awes nanda'asi. Esis sanda'am na'ama, awes hianai hi'alana ea' ambagof awami makwaha esis mafe'.

¹³ Ea' anom Juda mafe' ganigani manda' bisnisa maol anama matofa ambagof awami. Mati maol Pol nanda'anai ma'i motofa ambagof awami ma waf anama. Ma'iam na'ama atona etin ma'i, "Agel Jisas anama Pol nawalapa basefanai, afa' wa'ipipa mehip endilisi ma pekwhahe epes isima piwisi ande'."

¹⁴ Ea' anona aman Judainai pris dembinai agel ananinai Skeva. Nogamana ananimi 7-peleim manda' waf anama ma'i motofa ambagof awami ma agel Jisasi.

¹⁵ Ea' aman anama ambal aonai napainai nagwa basefa amam na'ama na'i, "Ae' egawa Jisas naloma Pol. Ea' ipe' emi egafipa? Ae' ina egawepa."

¹⁶ Ea' aman anama ambal aonai napainai fete'ana nalatawa amam ea' naham nanda'am

aom kwapete'am nahambombaga alop amamunai nahape' luwaguf maim amamumi makwaha ipat anama mafa' mafe' alop wafifina.

¹⁷ Ea' epes hiesi sape Efesusi, Juda saloma esis owa' Judaisi wapot'i same' basef amama ea' umbamahas kwapete'as. Ea' safela agel Dembinai Jisasi lu'una.

¹⁸ Amam nematawa hiesi sembale'efanai safi'i sawalapa waf aonai esis sanda'anai sa'iana.

¹⁹ Ea' isima hiesi sanda' naoh awami mamumami satamai buk amama hiami sanda' mu'uhup ma'akw naoh mailanai saofana nifa naep esis amam nematawai. Esis seamba otamba ma'um ma satala buk amama mataga 50,000 kina.

²⁰ Sanda' waf anama, ea' basef Dembinai mataga la'ifim mawalapai pepel Ananinai nataga lu'una endilisi mafe'agon hi'alagon.

Esis Efesus sofala Pol sa'ipana awagon

²¹ Amama mafe' ea', okom Poli nohafel la'ifina na'i nefel' etap hiagoma Masedonia esis Grik sapoma ea' nefel' Jerusalem. Anan na'iam na'i, "Ae' efe' anama ea' efe' iti Rom wapot'i!."

²² Ea' nasapa' amam biam magiambamanai Timoti naloma Erastus mafe' etap hiagoma Masedonia. Ea' Pol ata' nape etap hiagoma Esia anom nimeguf wapot'i.

²³ Nogota anama enis epes sanda' naumbih saloma eaf bu'unai Dembinai sanda' aga lu'unai sindininifama sa'i mehip.

²⁴ Anona aman agilinama Demitrius, aman anama nanda' amamaga hiami ma anona kapa siliwa. Anan ofagonama nanda' bisnis nanda'

ifagw so'uso'umi endlisi manda' kapa siliwa manda'ami. Ea' mandati si'i ipat lu'unai sanda' lotuma god nemata'w akwama Artemis. Ea' nase'ama maol amam manda' maol siliwai mofa' otamba lu'wami.

²⁵ Ea' natagama amam amama maloma anom amam manda' maol atifina si'i amam manda'anai na'i, "Ipe' pegawa ape' mofa' otamba lu'wami maol anama atona.

²⁶ Ea' aman anama Pol na'ipa amam nematawa hiesi saila anona waf namboma ukup asasimi, amama ipe' patolom pegawam! Anan ina nanda'am na'ae Efesus atogon, owa!. Anan nanda'am mafe'agon hi'alagon felefele'ma etap hiagoma Esia anama hiagoma. Anan na'i, 'Amam god ape' manda' lagof manda'ami, amama ina god endlisisimi, owa!'.

²⁷ Basef amama Poli nambimb mohambombaga maola bisnis ape'imi. Ea' ina amama atom, owa!. Basef amama ananimi mohambombaga ipat lu'unai god ape'ikwi nemata'w dembe'wi Artemis. Ea' kotaga falafu'wi ma naep esis amam nematawai ma ukup asasimi. Dei' esis sape etap hiagoma Esiai hiesi saloma epes hiesi sape etap hiagomai wapot'i sanda' lotuma god ape'ikwi nemata'w akwama ato'w. Ea' basef Poli ma'i mohambombaga agel lu'unai akwa'unai."

²⁸ Amam manda' maoli mame' basef amama, ukup amamumi wandafum endlisi moga ma'i mehip ma'i, "Artemis ape' Efesusi akwa'w ato'w Dembe'wi agel lu'unai."

²⁹ Ea' epes hiesi sape taun anama sanda'am sa'i mehip endlisi. Ea' sohafel safe' anama sondowa'anima sa'i basefa. Sahondo' Gaius

naloma Aristarkus Masedoniaimi mafi'i maloma Poli mafe' maloma esis.

³⁰ Pol na'i nefe' ni'ipa esis amam nematawa la'afisa, ea' esis Kristen sili'akwana.

³¹ Anom amam mape gavman dambami ma etap hiagoma Esiai amam alupumi Poli masapa' basef mafe'ma anan. Ea' ma'ipana mehipa ina nefe' nuwis anama sandatama sape sanifa basefa, owa'!

³² Amam nematawa isima epes hiesi ukup asasimi ea' mololas endilisi. Enis soga sa'i mehip sa'i anom basef, enis sa'i anom basef. Ea' esis amam nematawa hiesi ina sogawa esis safi'i sandakolasa main.

³³ Esis Juda sasapa' Aleksander nafe' la'afena esis saitu sa'i basefa. Ama sa'i anan ni'ipasa anom basef. Ea' Aleksander nafela lagel na'i nogwamasa basef esis amam nematawa.

³⁴ Ea' satolona sogawa anan Judainai. Na'ama dei' hiesi sandame'mam na'ama etin sakolasa malogof atom sa'i, "Artemis ape' Efesusi akwa'w ato'w dembe'wi agel lu'unai."

Esis sa'i mehip na'ama etin sape la'ela'ef no-gota launai awa biefina.

³⁵ Ea' kaunsel agilinai esis Efesusi na'ipasa basef la'ifimi esis amam nematawa na'i, "Ipe' epes Efesusipei, esis hiesi sape wambel hiagoma sogawa Efesus taun ape'inai numafi ipat lu'unai sanda' lotuma god dembe'wi Artemisi, taun anama numafi otam nowai heven ilifi.

³⁶ Ina anona aman nasambala basef amama, owa'. Ipe' feso'mepa pepan. Ipe' ina penda' anom amamaga mehip, owa'!

³⁷ Ipe' pefa'ai amam amama biam mafi'i na'ae. Ea' amam ina makowalopa anom amamaga ma ipat lu'unai ape' manda' lotuwana'i, owa!. Amam ina ma'i basef findiwami ma god nemata'w ape'ikwi, owa!.

³⁸ I'i Demitrius noloma amam manda' maola anani mi'i monda' basefa epen emi, anona nemaf monda'ama kot. Amam jas mape. Amam Demitriusami mi'ipam.

³⁹ I'i ipe' penda' anom basef wapoti', penandonam anama sandatama sa'i basefa nogota anama dambami gavman mape meme' basef.

⁴⁰ Amam dambami gavman Rom nambimb monda'mapa basef o owa!? Ape' ina mogawa. Dei' maina ape' mafela wandaf manda'ana dei' nemaf anae'? Ofagema owa'etin endilisi ma amamaga amama. I'i amam dambami Rom mi-hali'apa ma amamaga ofagema ma mandakolas anama, ape' ina anom basefa mogwam, owa!."

⁴¹ Kaunsel agilinai na'iam ea', nasapa' esis amam nematawa safe'.

20

Pol nafe' etap hiagoma Masedonia esis Grik sapoma

¹ Esis sa'i basef awanami, Polnofalai esis Kristen safi'mai anan, na'ipasa anom basef nanda' opalef asasimi mataga la'ifim. Ea' nanda'masa nemaf bu'unai esis nakwahis nafe' etap hiagoma Masedonia.

² Anan nafe' anama hiagoma nawalipasa basef hiami esis Kristen nanda' opalef asasimi mataga

la'ifim. Ea' nafe' nataga etap hiagoma esis Grik sapoma.

³ Anan nepe aomb wanom etap anama. Na'i nofa' sip nefe etap hiagoma Siria ea' nogawa esis Juda sa'i basef sandame'mama sohana noga'. Ea' ḥanindifa okom ananinai na'i notanima nefe' nuwis etap hiagoma Masedonia la'afen.

⁴ Sopater Beriaainai, Pirus nogalomana nafe' nalomana. Ea' amam biam Tesalonaikaimi Aristarkus naloma Sekundus naloma Gaius Derbeinai. Naloma Timoti maloma amam biam Esiaimi Tikikus naloma Trofimus, amam amama mafe' maloma Pol.

⁵ Amam mali'afa mafe' mape mohafafa Troas.

⁶ Nimeguf amama esis Juda sagwa' gwa'aimi saloma bret owa' niatifi, yis a'anai. Nimeguf amama mafe'ma hi'alam, afa' walata anona sip wakwaha Filipai ea' wafe'. Wafe', nimeguf wanom biam mafe' hi'alam watagama amam mali' mafi'i Troas mape wik si'ina.

Pol nafela Yutikus Troasinai nohafel nape namunai wapot'i'

⁷ Nemaf Sarere owamb afa' wandakolas waloma esis Kristen ma' gwa'aimi atogon ea' mofa' komunion gwa'aimi Jisasi. Naman Pol na'i nefe'. Na'ama nawalipasa basef nafe' nafe' akita amanota.

⁸ Rum anama lamifah hiami motaoi anama ape' mandatama etifiggin mapoma ilif.

⁹ Ea' anona aman so'unai agilinama Yutikus natoma windoa. Pol ata' na'i basef mafe' etin, Yutikus ambeh mahana naep ma'i mose'ana na'oh ea' na'oh nelola endilisi. Rum anama wenifina nape ilifi la'afen, anan nowai gani ilif laogoma

nafe' etap. Ea' esis sisila' safe' sofa'anai ea' sati afuna endilisi.

¹⁰ Ea' Pol nisila' nasisil nowa natoma aman anama so'unai nahapila lagel ananinai na'iam na'i, "Ipe' ina pehafel gegelalasipa ukup aom, owa'. Ambal ata' napaina."

¹¹ Ea' Pol nao'was sotanima salata ipat ilif wapot'i, nawala bret sa'ana. Ea' Pol na'i basef laumi wapot'i nalomas nefe' nataga lala. Ea' Pol nakwahis nefe'.

¹² Aman anama so'unai nepe namunai ambal napaina ea' sofa'ana safe' sambe'ana ipat ananinai, opalef asasimi ambo'om wapot'i.

Pol nakwaha Troas nefe' Miletus

¹³ Afa' wali' wafe' walata sip ea' wafe' wataga Asos. Afa' wa'i ogolopa Pol Asos ofa'ana ofe' sip. Dei' main, do'ok Pol nali' na'ipafa basef na'i nili' nefe' etap notaga Asos.

¹⁴ Ea' Pol nafi'i natolofa wambel anama Asos ea' ofa'ana wafe' sip wafe' Mitilini.

¹⁵ Ea' sip nofa'afa wakwaha Mitilini wa'oh ama lala wataga felefele'ma anona ailan Kios. Ea' wa'oh lala wafe' wataga anona ailan Samos. Ea' wa'oh lala wafe' wataga Miletus.

¹⁶ Pol nanindifa okom ananinai la'ifina na'i amam mikila' Efesus. Anan nandaiwa'ma nope etin anom nimeguf etap hiagoma Esia, owa'. Na'i nefe' ulal Jerusalem nemaf anama sa'i Pentikos.

Pol na'i basefbu'wami naloma agufumi mumafi esis Kristen sape Efesusi

¹⁷ Afa' wataga Miletus, Pol nasapa' basef mafe' Efesusnofala amam agufumi esis Kristenimufi'mai anan.

¹⁸ Ea' mafi'i matagamana na'ipam na'i,
"Ipe' pegawa ma waf ae' ali' anda'ana nemaf nali'i dambadamba anama ae' ataga etap hiagoma Esia la'ela'ef ape alomepa.

¹⁹ Ipe' pegawa nimeguf hiami la'ela'ef esis Juda sa'i basef sa'i sogolope sehe ega'. Amama atom ae'efa' nimanimi magwamba ae'. Owa'. Ae' anda' agel ae'anai nafe' owin endilisi, efa' nimanimi ea'embif maluwi naep ma anda' maol Dembinai.

²⁰ Ea' ae' ina umbamahe ma awalapa basef hiami ma agiambamepa, owa'. Anama ipe' pandakolas awalipipa ea' awalipipa ifagw ipe'imonomon wapot'i. Amama ipe' pegawam.

²¹ Ae' a'i basef la'ifimi ma esis Juda saloma isima owa' Judaisi wapot'i ma sowa' alafugaha waf aonai somboma opalef sefe'ma God, sombale'efa dembinai ape'inai Jisas.

²² Ea' ipe' peme', dei' Ambal Bu'unai Godi nafela okom ae'anai aila anan atona. Amama atom dei'ae'efe' Jerusalem. Nambimb maim motagame ganima, ae' ina egawa amamaga amama, owa'.

²³ Ae' egawa amama atom. Anama ae'afe'ma, wambel hiagoma Ambal Godi nihi'ambe basef la'ifimi na'ama na'i, 'Ine' nambimb niti esis sese'ena nimanimi ea'sonda'ena nenda'kalabus.'

²⁴ Ea' ae' ina okom napoma ambal ae'anai atona nope, owa'. Ea' ina la'ifiwi ma ihapila ambal ae'anai la'ifina, owa'. Ae' a'i ila eaf

anama ilana efe' embefana. Ae' a'i enda'ana hi'ilana andeande' maol anama Dembinai Jisas nasi'ianai. Maol anama ewalapa basef bu'wami Godi nagiambamapa na'a nofa'apa motanimani.

²⁵ Ea' ipe' peme'. Fowa' ae' afe' la'afena ipe' hipei awalapa basefa epes hiesi siowis nomona wambota Godi numafias. Ea' dei' egawa, namanani ipe' hipei ina piti amaga ae'anai wapot'i, owa'.

²⁶ Ea' dei' ae' a'ipipa. I'i enin open ipe'ini awen higililan, amama ina ofagema ae'ami, owa'. Ofagema ipe'imi atom.

²⁷ Dei' main, ae' ina umbamahe ma a'ipipa basefa okom hianai Godi, owa'. A'ipipam hi'alam.

²⁸ Ipe' pimafi ipe' andeande' ea' pimafi esis amam nematawa isima Ambal Bu'unai Godi nadandepepa ea' ma pimafiasi. Ipe' pindumafuma andeande' ma pimafi esis Kristen sios Godi andeande' si'i sanda' maoli sumafi sipsip andeande'. God natala esis Kristen ea' ma esimbel ananimi atom.

²⁹ Ae' egawa atuwasi ikwahipa efe', nambimb anom amam awami si'i nombagw wandafumi mufl'i motaga la'afena ipe' ea' mohambombaga esis Kristen si'i nombagw maha sipsip.

³⁰ Ea' enis epes ipe'isi etis sohafel si'i basef baso'maimi atoma somboma ukup esis Kristen sefe' silas.

³¹ Ipe' dei' pindumafuma andeande' la'ela'ef. Ipe' ukup mopoma amama afagof amama wanom la'ela'ef owamb alip ae' ina apoma noma'w ma awalipipa afela ukup ipe' hipei atona etin, owa'. Awalipipa aloma embif maluwi

naep ae'ami.

32 Dei' anda'epa ukup mopoma God noloma basef ananimi. Basef amama ma'ipipa Anan okom nainailipa ma nagiambamepa etin. Amama la'ifima monda'epa petaga la'ifipa mose'epa amamaga bu'wami atom God nase'asam amam nematawa anan nanda'as bo'wes ea' Ananisi etis.

33 Ae' ina kowalema otamba siliwa gol luwaguf maim enin openi, owa!.

34 Ipe' etipa pegawa ae' atowe anda' maol agiambama ae' aloma amam mape malumai ma anom amamaga a'afa.

35 Maol hianai ae'anai, ae' ahi'ambepa ma ape' monda' maol la'ifipa migiambama isima emi egafis owa' la'ifisa sigiambama esesi. Ea' ape' ukup mopoma basef amama Dembinai Jisas na'iами. Anan na'i na'ama na'i, 'Danifel enin open nese'as amamaga anasi nikila' danifel open inima nefal'ami. God nofalo'ma open inima nikila' inima nefal'asi.' "

36 Pol nanda' basef amama ma ea', nindiwa nembawa nanda' beten naloma agufumi amama.

37 Amam hiami malef kwapete'am mandalulupatanima ea' mombalo' Pol masisi'amana dialogw.

38 Doko' Pol nali' na'i basef na'i, "Atuwasi ipe' ina piti amaga ae'anai wapot'i!, owa!."

Amam mame' basef ananimi hiami hi'alam. Ea' basef amama tu'wanim atom manda' opalef amamumi nimanim endilisi. Ea' maitumana nafe' nalata sip.

21

Pol nalata sip ea' nafe' Jerusalem

¹ Afa' wakwaha agufumi wafe' walata sip nakwaha Miletus ea' nafe'. Afa' usi'ifa wafe' naoh wataga Kos. Ama wafilu wafe' wataga Rodes. Ea' wakwaha Rodes wafe' wataga Patara wakwaha sip anama ukila'i wape.

² Ea' wati anona sip na'i nef'e' Fonisia ea' walata anama nakwaha anama ea' nafe'.

³ Ea' wati ailan anama Saiprus wikila'agon nape da'isinaima. Afa' wafe' wataga etap hi-agoma Siria ea' wafe' wataga wail Tair. Esis sa'i sowafa hiahaom ma sip anama wambel anama.

⁴ Ea' afa' wafe' wagolopa enis Kristen watilis ea' wape walomas wik si'ina. Ea' Ambal Godi nafela ukup esis Kristeni ma sa'ipa Pola ina nef'e' Jerusalem, owa'!

⁵ Nogota afa'inai hi'alana wambel anama, wa'i a' ofe'. Amam Kristen maloma awasi nematawa amamisi saitumafa wafe' wawis ande'ma taun anama. Ea' ape' mindiwa nembawa manda' beten naoh akata.

⁶ Ea' esis sa'i basef sandanifel salomafa ma mondaso'ama lagof etin ea' sotanima safe' ifagw asasimi, afa' wafe' sip.

Profet Agabus na'ipana basef Pol anona wambel Sisaria

⁷ Afa' wafe' sip wakwaha Tair wafe' wataga Tolemes. Ea' wape wanda'masa nemaf bu'unai esis Kristen wape walomas nemaf atotona.

⁸ Ama wafilu wakwaha Tolemes wafe' wataga Sisaria wakwaha sip ea' wafe' ipat anona

aman Filip nawalipasa basef Godi wape waloman. Anan anona ma amam amama 7-peleimi fowa' mandandepam Jerusalemi ma magiambama amam aposel.

⁹ Anan nola nematawa biawai biawa, ina dei' waso' amam, ata' owa!. God nase'awa gawa wawalapa basef ananimi si'i profet.

¹⁰ Afa' wape Sisaria anom nimeguf wapot'i ea' anona profet agilinama Agabus nakwaha etap hiagoma Judia nakini'i Sisaria.

¹¹ Anan nafi'mai afa' nofa' let Poli nowa' bo'wagah maloma lagof ananimi atom. Ea' na'iam na'ama na'i, "Spirit Ambal Godi na'i na'ama na'i, 'Amam Juda mape Jerusalemi nambimb mowa' aman anama ofagenama let anama. Ea' mose'ana nefe'ma lagof anom amam mololama Godi.' "

¹² Afa' wame' basef amama ea' waloma esis wambel anamaisi wapot'i wa'ipa Pol mehip wa'i anan ina nefe' Jerusalem, owa!.

¹³ Ea' Pol nagwa basef na'i, "Dei' maina ipe' palef endilisi ma panda' okom ae'anai aona? Ae' ina andandombama enda' kalabus etin, owa!. Ae' andandombama eaga' wapot'i Jerusalema efela agel Dembinai Jisasi."

¹⁴ Ea' afa' ina la'ififama osambala okom anan-inai, owa!. Ea' afa' ukup mase'afa ma basef amama wa'i, "Okom Dembinai notaga."

Pol nawalapa basefa maol na'ipa amam agufumi mumafi esis Kristen sape Jerusalemi

¹⁵ Anom nimeguf mafe'ma ea', afa' wandon-domba amamaga afa'imi ma ofe' Jerusalem.

16 Ea' enis alupusi saila Jisasi Sisariaisi safe' salomafa. Esis saitumafa wafe' ipat Nasoni, anan Saiprusinai nataga Kristen fowa'inai. Anan na'i afa' atuwasi ope ipat ananinai.

17 Ea' wafe' wataga Jerusalem, esis Kristen sandanifela sofa'afa.

18 Ama wafilu nemaf gi'maifi Pol nefe' nalo-mafa ma niti Jems. Ea' amam agufumi hiami ma esis Kristeni mape malomana.

19 Pol nanda'mam nemaf bu'unai ea' na'ipama amamaga hiami ma God nagiambamana nanda'am la'afena esis amam nematawa epes hiesi sololama Godi.

Pol name' basef amam agufumi ea' nefe' nawis ipat lu'unai Godi

20 Amam mame'am ea', mafela agel Godi lu'una. Ea' ma'ipa Pol ma'i, "Sahalomafa, ine' negawa esis Juda tausen hiesi endilisi sombale'efa Jisas sataga Kristen. Ea' Kristen isima hiesi la'ifis endilisi ma saila mi'uli anama God fowa' naso' Mosesanai.

21 Ea' enis epes sambaso'mas sa'ipasa ine' na'ama sa'i, 'Pol na'ipa esis Juda safe' sape salomas anona wambel enis epes hiesi owa' Judaisi. Na'ipasa esis sokwaha mi'uli anama fowa' God naso' Mosesanai.' Anan na'i, 'Ipe' ina petopa' alopa amam so'umi ipe'imi ea' ipe' ina ata' pilana wapot'i waf fowa'inai, hapainai.' Enis epes some' basef ine' na'iами dei' sa'iam na'ama.

22 Ape' mogawa endilisi atuwasi esis Kristen Judaisi some' basefa ine' nafi'i nataga. Na'ama dei' afa' ata' onda'am wi'imama?

23 Ea' afa' wa'i wi'ipina anona wafa ine' nenda'ana na'ama. Afa' anom amam biamibiam ma'i basef endilisimi maloma Goda monda' anom amamaga.

24 Ea' ine' ne'wa amam pila waf anama nenda'epa petaga bo'wepa ma naep Godi. Ine' netal otamba amamumi wapot'i amam migi'ma waf esis Judai ma mando balagah amamumi. Ine' nenda'am na'ama, epes hiesi sogawa basef amama esis sanda'menam ine'i, amama baso'maimi atom. Ea' sogawa ine' naila mi'uli anama.

25 Ea' esis Kristen owa' Judaisi, ape' manda' basef mafe'masi ma'ipasa basef amama fowa' mowa'ami. Esis sindumafuma sope andeande' na'ama. Esis ina sea' mafis saham saso' god baso'amunai ea' ina sea' esimbel ea' ina sea' mafis amama sowa' bagafowa ma afumi ea' ina sonda' waf aonai so'a waulanai, owa!"

26 Ea' Pol nao'wa amam amama ma wafilu naila waf hianai ma nondam anan nataga bo'ona ma naep Godi noloma amam. Anan nanda'am na'ama nafe' nawis ipat lu'unai Godi na'ipa amam pris. Na'ipama nemaf anama atuwasi anan no'wa amam amama mifi'i ma amam pris monda' ofa mondolali ma amam atona etina motaga bo'oma naep Godi.

*Amam Juda mombalo' Pol nomon ipat lu'unai
Godi sanda' lotuwananai*

27 Nimeguf amama 7-peleim felefele'ma hi'ilam, anom Juda mape etap hiagoma Esiai mati Pol nepe nomon ipat lu'unai Godi ea'

mafela ukup esis amam nematawa hiesi ma mombale'ana.

²⁸ Ea' soga sa'i mehip na'ama sa'i, "Ipe' epes Israelipei, pigiambamapa aman anama na'ipa epes hiesi wambel hiagoma nasambala epes hiesi Israela mi'uli anama Godi fowa' gani Moses nawalipasanai naloma ipat lu'unai Godi wapoti!. Ea' ina amama atom, owa!. Anan nao'wai enis epes owa! Judaisi safi'i sawisi nomon ipat anama sanda'ana aona."

²⁹ Dei' main, fowa' amam mati anona aman Trofimus Efesusinai owa! Judainai nepe naloma Pol taun anama. Ea' amam ukup ma'i Pol nao'wana mafe' mawis nomon ipat anama. Owa'etin. Mambaso'mas.

³⁰ Ea' amama atom dei' esis hiesi sape Jerusalemi sohafel gegelalasis kwapete'as ma basef amama sa'i sonda' wandaf. Ea' sasagih safi'i sondowa'anima sawis ipat nomon sombalo' Pol sahonde'ana nawisi ande!. Ea' mehip etin sowalowa utagw ipat anama.

Soldia Dembinai numafi soldia hiami Romumi nofa' Pol

³¹ Esis sa'i soha Pol noga!, ea' basef mafe' matagama soldia dembinai numafi amam soldiai. Basef ma'iam na'ama ma'i, "Esis Jerusalem hiesi sohafel gegelalasis kwapete'as sa'i sonda' wandaf."

³² Ea' mehip anan nao'wa anom soldia masagih makini' ma esis hiesi. Ea' amam Juda mati anan ofisa dembinai nao'wa amam soldia, makwaha Pol ina ata' mahana wapoti!, owa!.

³³ Soldia anama dembinai nafi'i felefele' nombaloi Pol na'ipa amam soldia mowa' lagof ananimi sen biefina. Ea' nahali' esis na'i, "Anan emi? Anan nanda' main?"

³⁴ Amam nematawa hiesi sohafel sa'i basef. Ea' esis ina sagwam mafe' etifigin, owa'. Sagwam mafe' deindei. Ea' sanda' salamala Pol sa'i sohana sa'i mehip, ea' ofisa dembinai ina nogawa basef ofagema asasimi, owa'. Ea' na'ipa amam soldia ma mo'wa Pol nafe' nuwis ipat amam soldiai.

³⁵ Ea' Pol nafe' nataga bulasan salata ipat anama, esis amam nematawa la'ifis endilisi ma sohana. Na'ama amam soldia mafelona mofa'ana mafe'.

³⁶ Ea' esis amam nematawa hiesi sa'i mehip sa'i, "Hana ma afuna, hana ma afuna!" Ea' amam soldia mafelana mefa'ana mafe' ma'i muwis ipat.

Pol na'ipa esis Juda ma bale'ef kofagona anan-inai

³⁷ Amam soldia ma'i mofa' Pol mofe' muwis ipat amamunai nomon, ea' Pol nahali' ofisa dembinai na'i, "Ae' a'i i'ipina anom basef o owa!?"

Ea' soldia anama dembinai na'ipana na'i, "Ine' negawa diga Griki?

³⁸ Ae' a'i ine' aman Isipinai fowa' nogota anama nafela wandaf napa' naloma gavmani ea' nao'wa amam 4,000-peleim mahapila bainahi nao'wam mafe' anama wafiguma epes a'agoma."

³⁹ Ea' Pol na'i, "Owa!. Ae' aman Judaiwei. Wambel ae'anai Tarsus etap hiagoma Silisia. Ea' ae' aman anona wambel lu'unai agel lu'unai. Ine' ni'i awi, ae' i'ipasa anom basef esis amam nematawa."

40 Ea' soldia anama na'i aho'mana na'i. Pol naitu bulasan anama, nafela lagel nanda'ana de'inda' ma esis amam nematawa sosopama malogof. Ea' Pol na'ipasa basef diga Hibrui.

22

1 Na'iam na'ama na'i, "Ipe' sahin owan poloma ahape, ipe' peme!. Ae' a'i egwa basefa' ipe' dei' ma pegawa ae' ina anda' anona waf aonai, owa!."

2 Esis same' Pol na'i diga Hibrui ea' malogof mase'as sape, ina ata' sanda'am de'inda', owa!.

3 Ea' Pol na'i, "Ae' Juda. Mama'we ae'akwi kolaе wambel Tarsus etap hiagoma Silisia, na'ama ae' ataga dambewe wambel lu'unai anama. Ae' anda' skula dembinai tisa Gameliel ea' nawalipi andeande'ma mi'uli anama hianai amam bafapapa ape'imi. Na'ama ae' okom nohafel la'ifiwi ma aila God si'i ipe' dei' pailana.

4 Fowa' ae' anda' maol ahambombaga epes saila eaf anama sombale'efa Dembinaianan. Na'ama aha esis amam nematawa wapot'i, a'i ehas soga!. Ea' ewa'as sen efa'as afe' ipat sanda' kalabusanai.

5 Pris dembinai naloma amam agufumi hi-ami esis Judai mogawa andeande'ma mowalapa basef amama endilisimi. Amam mase'e pas manda'asa amam sahin owan amamisi Juda sape Damaskus, ea' ae' afe' Damaskus a'i embalo' esis sape wambel anama ewa'as sen. Ae' a'i efa' esis saila eaf anama sefe' Jerusalem sofa' nimanimi ma amam plisman mohas.

*Pol na'i basefa anan nataga Kristen
(Ap 9:3-19; 26:12-18)*

6 Ae' afe' ataga felefele'ma Damaskus, aon nahagasom 12 klok. Mehip anagon howalagon nisila'i ilif heven howalagona ae'!

7 Ea' ewa etap ame' anona maf na'i na'ama na'i, 'Sol, Sol, dei' maina ine' nahambombaga ae'?'

8 Ea' ae' agwa basef a'i, 'Dembinai, ine' emi?'

Ea' na'ipi na'i, 'Ae' Jisas Nasaratiwei ine' nahambombage.'

9 Amam malome maituwi mati howalogon ea' amam ina mame' malogola aman anama na'ipei, owa'!

10 Ea' ae' a'i, 'Dembinai, dei' ae' atuwasi enda' main?'

Ea' Dembinai na'ipi na'i, 'Ine' hafel nefel niwis Damaskus ama atuwasi anona aman nofo'o ni'ipina maol hianai Godi na'i ine' ne-anda'menanai.'

11 Howalagon endilisi, na'ama ae' ina ati anom amamaga, owa'. Naep mase'e. Ea' amam amama maitu maloma ae' mahapila lagof ae'ami mofa'e afe' Damaskus.

12 Anona aman nepe Damaskus agilinama Ananaias. Aman anama naila mi'uli Godi ande-ande'. Amam nematawa Juda sape Damaskus sa'i anan aman bu'unai.

13 Anan nafi'i naitu felefele' ma ae' na'ipi na'i, 'Owalome Sol, dei' naep inewapot!.'

Ea' nogota anama atona naep ae'ami mati wapot!.

14 Ea' na'i, 'God bafapapa ape'imi anan nadandepena ma negawa okom Ananinai ma niti Aman bu'unai. Ama nenda' maol Godi ma neme' basef Ananimi mataga malogel Ananinai.

¹⁵ Nambimb ine' newalapa basef Ananimi ni'ipa amam nematawa hiesi ma amamaga amama ine' name'am natolom.

¹⁶ Dei' maina ine' ata' nape nehfana etin? Ine' hafel nefalona nosa'opena nokwahomena waf aonai ine' nanda'anai ma nefal' baptais!'

God nasapa' Pol nafe'ma epes hiesi ina sogawa Godi

¹⁷ Anom nimeguf mafe'ma ea', ae' etanima afi'i Jerusalem, ea' awis anda' beten nomon ipat lu'unai Godi sanda' lotuwananai, si'i a'oh andando'oh.

¹⁸ Ea' ati Dembinai na'ipi na'i, 'Ine' mehip nekwaha Jerusalem nefe'. I'i ine' newalapa basef Ae'ami na'ae, ina nambimb seme'ena, owa!.'

¹⁹ Ea' a'ipa Dembinai a'i, 'Dembina, na'ama owa!. Esis sogawa ae' fowa' afe' ifagw hiami esis Juda sa'i basef sapeimi embalo' esis amam nematawa hiesi sombale'efa ine' ahah.

²⁰ Fowa' esis saha Stiven naga', aman na'ipasa basefa ine' nogota anama aitu felefele' okom ae'anai bo'onama amama. Ae' aitu imafi siogw amamumi amam mahana.'

²¹ Dembinai na'ipi na'i, 'Ine' fo'o. Nambimb ae' esapa'ena nefe' eaf laogoma ma enis amam nematawa hiesi owa' Judaisi sogawa ae'i.' "

Anona soldia dembinai Romunai numafi Pol

²² Esis Juda same' basef Poli mafe' matagama basef amama ma'i epes isima ina Judaisi. Ea' esis sa'i mehip sa'i, "Epes amama ina mope etap, owa!. Hana ma afuna!"

²³ Ea' esis sa'i mehip sowali siogw lagof asasimi sakwaha sopof nalata ilif.

24 Ea' soldia anama dembinai na'ipa amam soldia mehipa mo'wana mofe' muwis ipat amam soldiai nomon. Ea' na'ipa amam soldia mohana ma nowalapa basef amama ofagema. Anan na'i nogawa andeande' dei' maina esis sofalana na'ama.

25 Ea' amam mowa'ana ma mohana anona let ea' Pol nahali' anona kepten dembinai naitu felefele' na'ama na'i, "A'i lo na'i ipe' wila ma penda' basef na'ama ma aman anama Romunai? Ae' Romuwei. Ipe' ina dei' panda'me kot ea' ma dei' ipe' pahe. Waf anama andeande!?"

26 Ea' kepten anama name' basef amama, nafe' na'ipa soldia anama dembinai na'i, "Ine' na'i nanda' main? Aman anama anan Romunai!"

27 Ea' soldia anama dembinai nafi'mai Pol na'ipana na'i, "Ine' kipa ae'. Ine' aman Romunai?"

Pol nagwamana basef na'i, "A'e."

28 Ea' soldia anama dembinai na'i, "Ae' ak-waha otamba hiami atala pepa ma ataga aman Romuwei."

Ea' Pol na'i, "Ae' owa!. Mamase esis Romisi. Ea' ae' wapot'i Romuwei."

29 Ea' amam amama mahali'ana ma'i meahanai, owa!. Amam umbamaham mandafa'mana. Ea' soldia anama dembinai okokoma Pol anan Romunai ea' na'ipama mowa'ana sen. Ea' anan wapot'i umbamahana.

30 Wafilu soldia anama na'i nogawa andeande' amam Juda ma'i basefa maina waf Pol nanda'anai. Ea' soldia anama natagahamana sen ea' nasapa' basef mafe'ma amam pris dambami maloma amam Juda dambami mumafi koti mifi'i

mondowa'anima mope. Ea' anan nao'wa Pol nafi'i nahaponana naitu naep amamumi.

23

Pol na'ipama basef amam Juda dembami mumafi koti

¹ Pol nati amam Juda dembami mumafi koti la'ifina ea' na'i, "Ipe' sahope, ae' afe' naep Godi ea' okom ae'anai bo'ona nafe'ma naep Godi, afi'i ataga dei!. Basef mape opaf ae'anai nomoni ma'iami ma'ipi basef mihi'ambe ma waf ae' anda'anai ina aona, owa!."

² Anan na'iam na'ama, pris dembinai Ananaias nape nali'ma pris hiami na'ipa amam maitumania felefele' ma maha malogel ananinai.

³ Ea' Pol na'ipana na'i, "Ine' aman aonai si'i anom endaleemb awami sanda' pen bu'unai asitinai sandisam ande' atogini. Atuwasi God nehena. Ine' nape na'ae naila mi'uli anama Godi ma nanda' kotima ae', ea' ine' etina nesambala mi'uli anama ma dei' na'ipam mahe!"

⁴ Ea' amam maitu felefele' ma'ipana ma'i, "Ine' na'i basef findiwama aman pris dembinai Godi?"

⁵ Ea' Pol nagwa basef na'i, "Ipe' sahope, ae' ina egawa a'i anan pris dembinai, owa!. Dei' main, basef mail buk Baibeli ma'i na'ama ma'i, 'Ipe' ina pi'ipa agilinai numafi ipe'i pi'ipana basef awami, owa!. Amama ae' egawam."

⁶ Ea' Pol nogawa amam Juda dambami mumafi koti anom Sadyusi, anom Farisi. Na'ama anan na'ipam mehip na'ama na'i, "Ipe' sahope, ae' Farisiwei ea' ahalome ae'anai Farisinai. Ae'

embale'ef a'i endilisi anona nemaf epes saga'i sohafel wapot'i', dei' ape ehafa nemaf anama. Ofagema amama atom dei' esis sanda' kotima ae'."

⁷ Anan na'ipama basef amama, ea' amam atom mafitap la'afena amam Farisi maloma Sadyusi ea' mandawal biefim.

⁸ Dei' main, amam Sadyusi membale'ef ma'i epes saga'i owagama ina sotanima sohafel wapot'i', owa'. Amam ma'i ensel owa', ambagof owa'. Ea' amam Farisi membale'efa ambagof maloma ensel maloma epes saga'i sohafel wapot'i' endilisi.

⁹ Amama atom amam ma'i mehip. Ea' anom dambami mawalipasa mi'uli Godi amam Farisi mohafel maitu ma'iam mehip na'ama ma'i, "Afa' wati aman anama basef ofagema a'ana. I'i anona ambal bu'unai o anona ensel ni'ipana ma ni'ipasa basef amama, andeande!"

¹⁰ Ea' fitap nataga lu'una, soldia dembinai umbamahana ma Pol, na'i na'ama amam hiami mandawal biefimi mohonde'ana pele'atana bie-fina afuna. Ea' na'ipa amam soldia ananimi mikini' mombalo' Pol la'afena amam mofa'ana mofe' ipat amamunai.

¹¹ Wafilu owamb Dembinai nafi'i naitu fele-fele'ma Pol na'ipana na'l'i, "Ine' nitu la'ifina. Ina umbamehena, owa'. Fowa' nawalapa basef ae'ami Jerusalem, ea' nambimb ine' newalapam na'ama etin wambel lu'unai Rom wapot'i!".

*Amam Juda ma'i basef mandame'mama moha
Pol noga'*

¹² Ea' wafilu kuhimbita amam Juda mandakolas ma'i basef mandame'mama mape atogon ma'i endilisi ilifa moha Pol afuna. Amam ma'i ina mea' gwa'aimi embel muli', na'ama ota' ma mohana afuna, ea' mea'am.

¹³ Amam ma'i endilisi ilif mandame'ma basef amama, amam hiami mikila' 40-peleim.

¹⁴ Amam mafe'ma amam pris dambami maloma agufumi Juda ma'ipam ma'i, "Afa' wa'i basef wandame'mama oha Pol afuna. Afa' wa'i endilisi ilif ina ata' wea' gwa'aimi embel, ota'ma oha Pol afuna.

¹⁵ Na'ama dei' ipe' peloma amam Juda dambami mumafi koti pesapa' basef mefe'ma soldia dembinai Romunai ma nofa'i Pol nifi'mai ipe'. Ipe' pembaso'mana pi'i, 'Afa' wa'i ata' ome' basef ofagema Poli andeande!.' Ea' afa' wandandombam wape. Anan ina nifi'i notanimai ma ipe', ata' owa', afa' uli' ohana afuna."

¹⁶ Ea' taganamana Poli name' amam Juda ma'i mofe' mopoma Pol eaf ma mohana noga', nafe' ipat amam soldiai nawis na'ipa Pol.

¹⁷ Ea' Pol nofala anona soldia dembinai na'i, "Akwolanago aman anama so'unai nefe'mago kepten dembinai ma amam soldia hiami. Anan anom basefa na'i ni'ipanam."

¹⁸ Ea' soldia anama nao'wana nafe'ma kepten dembinai na'ipana na'i, "Aman anama nanda' kalabusi Pol nofala ae' na'ipi ao'wai aman anama so'unai nafi'mai ine!. Anan anom basef ni'ipinam."

¹⁹ Ea' kepten anama nahapila lagel ananinai

nao'wana nafe' wa'ol, amam atom mape na-hali'ana na'i, "Ine' na'i ni'ipi maim basef?"

²⁰ Ea' so'unai na'ipana na'i, "Amam Juda ma'i basef mandame'mam ea' ma ma'i mohali'ina ma naman nefal Pol nefe'ma amam Juda dambami mumafi koti. Amam mambaso'am ma'i ata' mohali' Pol atona ma basef ofagema ananimi.

²¹ Ea' ina nila basef amamumi, owa!. Dei' main, anom amam amamumi hiami mikila' 40-peleim ma'i basef la'ifimi mandame'mam ma'i endilisi ilif ina mea' gwa'aimi embel, owa!. Ota' ma muli' moha Pol afuna. Amama atom dei' amam mape eaf mohafana. Amam mandondombam mape mohafa ine' ma ni'i aho'ma basef amamumi."

²² Ea' Kepten anama nasapa' anan so'unai nafe' na'ipana basef la'ifimi na'i, "Ina nefe' ni'ipa enin epen atitina basef amama, owa!."

Kepten dembinai nasapa' Pol nafe'ma gavman dembinai Feliks

²³ Ea' kepten anama nofala anom soldia dambami biam na'ipam na'i, "Ipe' bipa pefa'ai soldia hiami 200-peleim moloma anom soldia 70-peleim matoma hos ea' 200-peleim mahapila wambawai. Ipe' pendondombama pefe' Sisaria atuwasi owamb 9 klok.

²⁴ Ea' pendondomba anom hosa Pol wapotil' notomam ea' pefa'ana andeande' pefe'ma gavman dembinai Feliks."

²⁵ Kepten anama nanda' anom basef mafe'ma Feliks na'ama ma'i,

²⁶ "Ae' Klodius Lisias anda' basef amama mafe'mago ine' gavman dembinai nape nali'i Feliks. Nema bu'unai.

27 Amam Juda ma'i mombalo' aman anama ma'i nohana noga!. Na'ama ae' ame'anama basef anan na'i anan aman Romunai. Ea' ae' aloma amam soldia wafe' watagama amam Juda wandalombamana lagof amamumi.

28 Ae' a'i ata' egawa basef ofagema amam mambaso'amanami, na'ama ae' ao'wana akini' ma amam Juda dambami mumafi koti.

29 Ea' ma'ipi anom basefa mi'uli amamunai mambaso'mana ma basef amama. Na'ama amam ina manda' kotimana ma anom amamaga ma ohana noga!, o onda' kalabusimana, owa!.

30 Na'ama dei' anom basef matagama ae' ma amam ma'i anom basef mandame'mama ma'i mohana noga!. Ea' dei' ae' mehip asapa'ana nafe'mago ine!. Ea' ae' a'ipa amam amama mambaso'manai ma mofo'o mowalapa basef alihima naep ine'imi ma ine' negawa amamaga amama amam ma'i monda' kotimanami."

31 Ea' amam soldia mame' basef mofa' Pol mafe' anona wambel Antipatris owamb.

32 Lala soldia amama motanima mafe' ifagw amamumi Jerusalem. Ea' amam 70-peleim matoma hos atom mofa' Pol mafe' Sisaria.

33 Mafe' mataga Sisaria, mase'ana pas basef amama gavman dembinai ea' mofa'ai Pol wapot'i nafi'i naitu naep ananimi.

34 Ea' dembinai gavman anama nafi'i nati pas amama ea' nahali' Pol na'i, "Ine' etap lu'unai agel lu'unai eti?"

Ea' Pol na'ipana na'i, "Ae' Silisiaiwei."

35 Ea' anan na'ipa Pol na'i, "Nambimb amam amama mambaso'ma ine'i mufi'i motaga, ae' eme' basef ine'imi."

Ea' na'ipa amam manda' kalabusima Pol ipat lu'unai gavman dembinai Heroti.

24

Amam agufumi Judai manda' kotima Pola naep dembinai gavman Feliks

¹ Nimeguf wanom biam mafe' ea', pris dembinai Ananaias nakini' nafe' Sisaria naloma anom agufumi Judai ea' anona aman Tertulus aman nogawa mi'uli gavman nalomam nafi'i. Amam hiami ma'ipa gavman dembinai Filiksa basef amama ma'i monda' kotima Polami.

² Ea' gavman anamanofalai Pol nafi'i, Tertulus nanda' basef findiwama anan. Ea' na'ipa Feliks na'i, "Ine' aman dembinai Feliks, ine' nagiambama ape' Juda ma mape nogota launai andeande' ea' wandaf main owa'etin. Okom bu'unai ine'inai nagiambama esis wambota ape'inai ma dei' mape andeande' mikila' fowa' mali' mape.

³ Ea' ape' mape wambel hiagoma opalef ape'imi mape bo'oma ine'. Ea' nimeguf hiami la'ela'ef manifelina ma amama.

⁴ Na'ama ae' andaiwa'ma ahapilina nogota laona. Dei' ahali'ina ma neme' basef ape'imi bandami.

⁵ Ape' mogawa aman anama nanda'mapa amaga awami hiami. Ea' nanda' naumbih nafela ukup awami naloma esis Juda hiesi napa' nalamas etap hiagoma wambel hiagoma. Anan agel lu'unai ma epes isima sapa' sawala epes hiesi ape'isi ma epes sape deindei'i, sa'i epes Nasareti.

6 Ea' anan na'i nonda' ipat lu'unai sanda lotuma Godanai aona wapotil!. Na'ama ape' mombale'ana ma'l'i monda' kotimana ma mi'uli ape'inai.

7 Ea' kepten dembinai Lisias nafi'i, anan la'ifinai nahonde'ana lagof ape'impi.

8 Anan na'i mehip ape' manda' kotima anan mifi'i motaga naep ine'imi. I'i dei' ine' nihali' aman anama, atuwasi ine' negawa endilisi basef ananimi ma ni'i amamaga hiami ape' manda' kotimanami."

9 Ea' amam Juda dambami wapotil' magiambama anan mambaso'ma Pol mawalapam ma'iam ma'l'i, "Basef amama endilisimi atom."

Pol nagwa basefa Feliks

10 Ea' gavman dembinai nanda' balaga nahali' Pol nogwa basef na'ama na'i, "Ae' egawa afagof hiami ine' nanda' jas nape dembinai gavman numafi ape' Juda hiapai. Na'ama dei' okom ae'anai bo'ona, endilisi ma egwa basef amama ihil'ambena ae' ina anda' anona waf aonai, owa!.

11 I'i ine' nihali' esis, atuwasi neme' basef amama dei' ae' a'i i'ipinami. Nimeguf ata' 12-peleim mafe' ea' ae' ali' afe' Jerusalem anda' lotu.

12 Ea' amam Juda ma'l'i monda' kotima ae' mati ae' ina a'i anom basef afitapam aloma enin epen nomon ipat lu'unai Godi, owa!. Amam ina mati ae' afela ukup asasimi ma sopa' ifagw esis Juda sa'i basef sapeimi nomon o anagon nomona wambel anama lu'wagoma, owa!.

13 Ea' basef amama esis dei' sanda' kotimiami, esis ina atuwasi la'ifis sowalapa anom basef ofagema ma ine' negawa, owa'!

14 Na'ama ae' a'i ewalapa basef amama atom a ine'. Eaf anama esis Juda etis sandaiwa'manai sa'i waf anama sawala wambotagwanai ina endilisinai. Waf anama endilisinai ae' ahapi-lana ailana. Ae' aila eaf anama anda' lotu ma God amam bafapapa ape' Juda hiapai manda' lotumanai. Ae' ahapila basef hiami mape mi'uli Godi naloma basef hiami amam profet fowa' manda'ami.

15 Ae' embale'efam ape ehafa God owagama nefela esis saga'i, epes isima bu'wasi soloma isima sanda' waf aonai wapot'i!. Amam manda' kotima ae' wapot'i' mombale'ef mape mohafa God na'ama etin.

16 Ea' la'ela'ef ae' anda' maol lu'unai ma epe andeande' ma malogel nape opaf ae' nomoni ina nihi'ambe anona waf aonai ae' anda'anai, owa'. Ae' anda' maola waf aonai a'e ma naep Godi naloma naep epesi wapot'i!.

17 Ae' ape anom afagof anona wambel ea' etanima afi'i Jerusalem ma epes hiesi ae'asi. Ae' efa'ai moni maina igiambama isima kwahusi ea' eha anom mafis endalalima God ese'ana.

18 Anda'am na'ama ma anda' waf bu'unai, waf aonai a'e ma naep Godi. Ea' esis satolowe. Ina enis amam nematawa hiesi sape salome afela opalef enis epes sanda' salamala naninani, owa'etin.

19 Na'ama enis Juda sape etap hiagoma Esiaisi safi'i sombale'e. I'i esis anom basefa ae', dei'

andeande'ma sifl'i na'ae naep ine'imi sonda' kotimi.

²⁰ I'i owa', amam amama mi'ipina anom basefa amamaga awami amam mati ae' anda'ami, nemaf anama fowa' aitu naep amam Juda dambami mumafi koti.

²¹ Anom basef etifim na'ama. Nemaf anama aitu la'afena amam, ae' ega a'i, 'Ae' embale'efa God nefela esis saga'i sohafel wapot'i', ea' amama atom ipe' dei' panda' kotima ae' ma naep ipe'imi.'

²² Feliks nogawa andeande'ma bale'ef naloma waf sa'i eaf esis Kristen. Ea' na'ipa esis Juda ma ata' sope sohafana. Anan na'i, "Ota' ma soldia dembinai Lisias nikini'i, ae' enandonama basef amama ipe'imi."

²³ Ea' na'ipa anona soldia dembinai ma ata' nonda' Pol nuwis nope kalabus nope wafifina etin. Ea' na'i aho'ma esis alupusi ananisi sifl'i sigiambamana ma amamaga.

Feliks nanda' Pol nanda' kalabus afagof biam

²⁴ Anom nimeguf mafe'ma ea', Feliks nao'wa waulu'mana anani'wi Drusila safi'i. Drusila akwa'w ano'w Judai'wi. Ea' Feliksnofala Pol na'i neme' anom basef ananimi. Ea' Pol nafi'i na'ipana basef ofagema ma esis sombale'efa basef Jisas Kraisi.

²⁵ Na'ipana waf bu'unai ma epes sumafi alop asasinai andeande' ma owagama God nonda' kotima epes hiesi. Na'iam na'ama, Feliks umbamahana.

Ea' na'i, "Ine' fo'o. Nambimb anona nemaf, efalena wapot'i!"

26 Feliks nape nohafa anom amamaga wapot'i!. Anan na'i nambimb Pol nose'ana anona moni ma nokwahona nofe' waffifina. Na'ama la'ela'ef anannofalana nafi'i na'i nalomana.

27 Afagof biam mafe'ma hi'alam, Festus nofa' maol Filiksi. Ea' Feliks na'i ata' nondal' ukup esis Judai mope andeande'. Ea' ata' nanda' Pol nape nanda' kalabus.

25

Polnofala Sisar gavman dembinai esis Romi manome' kot ananinai

1 Festus nafi'i nofa' maol nape dembinai gavman numafi etap hiagoma fowa' Feliks numafifagoma. Nape nimeguf wanom ea', nakwaha wambel Sisaria nondowasa' Jerusalem.

2 Ea' amam pris dambami maloma agufumi Judai mafi'mai anan mambaso'ma Pol.

3 Ma'ipa Festus mehip ma'l'i, "Ine' nigiambamafa nesapa' aman anama nifi'i anae'."

Dei' main, amam ma'l'i mondambaho' mope eafa mohana noga'.

4 Ea' Festus nagwa basef na'ipam na'i, "Pol nanda' kalabus nape wambel Sisaria. Nambimb ae' etanima efe' ganima.

5 Ea' amam agufumi ipe'imi mifi'i mikini'i moloma ae!. I'i aman anama nanda' waf aonai, amam monda' kotimana."

6 Festus nape nalomam nimeguf 8-peleim o 10-peleim, ea' nakini' wambel Sisaria. Wafilu nafe' nawis ipat sandakota na'ipa amam soldia mo'wa Pol mifi'i.

7 Ea' amam Juda makwaha Jerusalem mape mahafa Pol nafi'i makini'i maitu felefele'ma anan mambaso'mana basef hiami nimanimi. Ea' amam manda'mana basef etin, basef ofagema amamumi ina anom.

8 Ea' Pol nagwa basef na'i, "Ae' ina anda' anona waf aonai ma mi'uli ape' Judai, ipat lu'unai Godi, o mi'uli Sisari wapot'i, owa'etin."

9 Na'ama Festus na'i nonda' ukup esis Judai mope bo'om. Ea' nahali' Pol na'i, "Ine' na'i nefe' Jerusalem ama nambimb eme'enama basef ine'imi gani?"

10 Ea' Pol na'i, "Ipat anae' ae' dei' aituinanai, anae' ipat Sisari sanda' kota. Ipat anae' atona peme' basefa kot ae'anai. Ine' etina negawa, ae' ina anda' anona waf aonai ma esis Juda, owa'."

11 I'i ae' anona waf aonai ma enda' anom amaga awami mondahama ae' ega', andeande'ma amam mohe ega'. I'i basef amama amam manda' kotima ae'ami owa' endilisimi, ina andeande'ma dembinai gavman nese'e efe'ma lagof amamumi, owa'. Dei' ae' efala gavman dembinai Sisar neme' kot ae'anai."

12 Ea' Festus ata' na'i basef naloma amam dambami ananimi, na'ipa Pol na'i, "Ine' nefala Sisar ama neme' kot ine'inai, ine' fo'mago Sisar."

Festus nahali' dembinai King Agripa ma Pol

13 Anom nimeguf mafe'ma ea', dembinai king Agripa nafi'i naloma ano'w nemata'w Bernaisi esis bias safi'i Sisaria sa'i sonda'mana nemaf bu'unai Festus.

14 Esis sape Sisaria nimeguf hiami ea' Festus nawalapa basef na'ipanam king Agripa ma Pol.

Anan na'i, "Anona aman fowa' napani Feliks nanda'ana dei' nanda' kalabus.

¹⁵ Fowa' ae' apani Jerusalem, amam pris dambami maloma agufumi esis Judai mambaso'mana mahali' ae' ma i'i endilisi anan aman aonai ma nogra'.

¹⁶ Ea' ae' agwamama basef na'ama a'i, 'Ape' Rom waf anama a'apa ma mose'ana nimanimi na'a enin epen, owa!. I'i basef milan, enin ata' nili' nitu nonda' basefa naep esis isima sanda' kotimani ma ape' ata' mose'ana nogota ma enin negwa anom basefa esis sanda' kotimani.' "

¹⁷ Nemañ anama amam agufumi Judai mafi'i na'ae, ina apoma noma ma eme' basefana, owa!. Nemañ gi'mainai ae' afe' ape ipat sanda' kota a'ipa esisa sofa' aman anama nafi'i.

¹⁸ Ea' amam manda' kotima anan mafi'i maitu mambaso'mana. Ea' amam ina ma'i anom basef endilisimi ma waf aonai masindinana a'i amam monda' kotimanami, owa!.

¹⁹ Amam mandahihianama anom basef malo-mana ma waf esis sanda' lotuwanaí ea' anona aman naga'i, Jisas. Ea' Pol na'i aman anama nape namunai ambal napaina.

²⁰ Ae' a'i egolopa basef amama ofagema ande-ande', na'ama okom ae'anai ina egawa, owa!. Ae' ina la'ifiwi, owa!. Ea' ahali'ana a'i, "Ine' na'i nefe' Jerusalem ama nambimb eme'enama basef ine'imi gani?

²¹ Ea' Pol na'i anan nope kalabus ama nambimb gavman dembinai ape'inai Sissar neme' basef ananimi. Ae' a'i anan nope kalabus ea' esapa'ana nefe'mago Sisar."

²² Ea' Agripa na'ipa Festus na'i, "Ae' atowe a'i eme' basef ananimi."

Ea' Festus na'ipana na'i, "Naman ine' neme'ana."

²³ Wafilu Agripa naloma nemata'w akwama Bernaisi safi'i sanda' sosaf hianai ma sefela agof asasimi lu'um. Ea' sawis ipat lu'unai sandatama etifigin sape sa'i basef nomon saloma amam soldia dambami mali'i maloma amam agufumi taun anama. Ea' Festus na'ipas mehip sao'wa Pol nafi'i.

²⁴ Ea' Festus na'i, "King Agripa, naloma ipe' epes hipei pape paloma ape', ipe' pati aman anama. Esis amam nematawa hiesi Juda sape Jerusalemi saloma sape na'ae wapot'i sanda' kotimana naep ae'ami. Esis sa'ipi basef laifimi sa'i ehana afuna. Sa'i 'Ina nope, hana afuna.'

²⁵ Na'ama ae' ati anan ina nanda' anom amaga awami ma noga!, owa!. Ea' anannofala gavman dembinai Sisar ma nome' kota anan. Amama atom ae' a'i basefa esapa'ana nofo'o.

²⁶ Ea' ae' ina ati anom basefa anan mataga alihima enda' anom basefa pas esapa'am mofe'ma Sisar, owa!. Ea' dei' king Agripa ae' au'wai aman anama nafi'mai ine' neloma ipe' hipei wapot'i!. Afa' ome' basef ananimi andeande'ma nambimb ae' egawama enda' anom basef mil pas.

²⁷ Dei' main, ina andeande'ma esapa'ana nofe' etin. Afa' onda' anom basef sanda' kotimanami mil pepa mefe' molomana, andeande!."

26

Pol nawalapa basefa dembinai king Agripa

¹ Ea' Agripa na'ipa Pol na'i, "Dei' ine' negwa basef amama amam mambaso'mena."

Pol nafela lagel na'i basef ananimi na'i,

² "King dembinai Agripa, ae' a'i egwa basef amama hiami amam Juda mambaso'ma ae'ami. Ae' okom na'i andeande'ma a'i ewalapa basef ae'ami ma naep ine'imi.

³ Dei' main? Ine' negawa andeande'ma waf ape' Judai naloma amamaga ape' ukup mapomam mafe' deindei'mami. Amama atom dei' ae' a'i ine' neme' basef ae'ami, okom ine'inai ina iwanina mehip, owa'.

⁴ Fowa' ape afi'i afi'i dei' fe' anama ae'anai esis Juda hiesi sogawa. Fowa' ata' sa'owe ape etap ae'anai ea' afe' ape Jerusalem wapot!

⁵ Fowa' gani esis sogawa ae'. I'i ukup asasimi mi'i a'e, sowalapa basef amama ma waf ae' anda'anai. Esis sogawa ae' aila waf epes hiesi ape' Farisi. Waf anama ahifina endilisi, nikila' waf hianai anona lotu ape'inai.

⁶ Ea' basef ofagema ma kot na'ama. Ae' embale'ef endilisi ma God nefela saga'i sohafel wapot!, amama atom. Ae' embale'ef ape ehafa God nondal amamaga amama motaga si'i fowa' na'ipa akupapa ape'imi Judai. Amama atom dei' esis sanda' kotimi.

⁷ Wambotagw apa'imi 12-peleim manda' lutuma God owamb alip ea' mombele'ef endilisi mape mohafa amama atom. Dei' a'ipa ine' dembinai king, ae' wapot! embale'ef ape ehafa amama. Ea' na'ama esis Juda sambaso'me."

⁸ Pol na'ipa king Agripa ea' nandamboma na'ipa amam Juda na'i, "Dei' maina ipe' pa'i

basef ina endilisimi ma God owagama nefela esis isima saga'i wapoti? Ipe' pembale'efa basef amama.

⁹ Fowa' ae' wapoti' okom na'i ae' enda' amamaga hiami ma ehagofa agel Jisas Nasaretinai.

¹⁰ Ae' anda'am na'ama etina enis epes gani Jerusalem. Amam pris dambami mase'e pepel anda' kalabusima amam nematawa hiesi Godi. Nemañ anama amam pris dambami ma'i moha enis Kristen soga', ae' wapoti' a'i a'e.

¹¹ Ea' nimeguf hiami ae' ase'as nimanimi Kristen isima ahas nomon ifagw esis Juda sa'i basef sapeimi hiami. Ae' a'i enda' esisa sonda' Dembinai findiwana ma sokwaha basef Dembinai. Ae' okom wandafuna endilisi ma esis, ailas afe' anona wambel laogoma lu'wagoma.

*Pol na'i basef nawalapama nataga Kristen
namboma okom naila God*
(Ap 9:3-19; 22:6-16)

¹² Efa' pepela amam pris dambami masapa'e afe' Damaskus.

¹³ Ae' a'ipa ine' dembinai king, ma aon nahagasm ae' aila eaf afe', ati howalogon nisila'i heven nikila' aon alipunai. Howalagon nafi'i nolalowe aloma amam mafe' malumai.

¹⁴ Afa' hiafai wa'oh etap ea' ae' ame' anona malogel na'i diga Hibrui na'i, 'Sol, Sol, dei' maina ine' nanda' maol nahambombaga ae'? Ine' nanda' maol naha anama ina negawa. Dei' nefa' nimanimi bolam si'i anona naha bulmakau ananimi bolam nanindinama nafe' andeande'.'

¹⁵ Ea' ahali'ana a'i, 'Dembinai ine' emi?'

Ea' Dembinai na'i, 'Ae' Jisas, ine' nahambombage.

16 Ea' ine' hafel nitu. Ae' afi'mai ine' ma amamaga amama. Ae' a'i esahe'ena ma nihapila maol ae'anai, newalapa basefa amamaga ine' natoloma ae'i. Ea' amamaga amama owagama ae' ihi'ambenam.

17 Nambimb ae' etagahina lagof esis epes hiesi ine'isi Juda ea' etagahina ma lagof isima enis epes sololoma Godi wapot'i. Ae' esapa'ena nefe'ma epes isima.

18 Ama newala naep asasimi ma esis sowa' alafugaha akota waf aonai somboma opalef sifi'mai howalagon ma sokwaha pepel Satani sifi'mai God. Esis sombale'efa ae' ma ekwaha waf aonai esis sanda'anai. Ama sofa' amamaga bu'wami soloma enis amam nematawa God nanda'as bo'wes ananisi etisi.'

Pol na'ipa dembinai king Agripa ma maol anan nanda'ana Dembinai

19 Dembinai king Agripa, ae' ati amamaga amama mataga heveni ea' ina esambala basef amama, owa'!

20 Ae' ali' awalapa basefa esis amam nematawa sape Damaskusi ea' awalapama epes sape Jerusalemi ea' awalapama esis sape etap hi-agoma Judia ea' afe' awalapama isima sololoma Godi wapot'i. Ae' awalapa basefa penda' maol peloma waf bu'unai nendahama epes somboma opalef sefe'ma God.

21 Ae' anda'am na'ama ea' ofagema amama atom dei' esis Juda sombale'e ipat lu'unai Godi sa'i sehe ega'!

22 Na'ama God nagiambame afi'i afi'i ataga dei' aitu na'ae ea' awalapa basef a'ipa epes hiesi

agof a'asi saloma ipe' agufipei wapot'i!. Ae' ina ewalapa anom basef, owa!. Awalapa basef amama Godi atom fowa' amam profet maloma Moses ma'iami ma amamaga owagama meatagai.

²³ Amam ma'iam na'ama ma'i, 'Dembina Kai Krais ata' nofa' nimanimi, ma nambimb notanima nohafel hi'agif nili'ma epes hiesi. Ama Anan nowalapa basefa epes hiesi sogawam si'i howalagon nikila'i nififima esis ananisi soloma isima sololama Godi wapot'i!.'

Pol na'ipa dembinai king Agripa nombale'efa Jisas

²⁴ Pol na'ipas na'ama ea!, Festus noga na'i basef la'ifimi na'ama na'i, "Pol, ine' okom nololaina! Ine' nati buk hiami natalifam nogawam dei' gawa anama lu'unai nanda'ena okom nololaina!"

²⁵ Ea' Pol nagwamana na'i, "Ine' aman dembinai Festus, ae' ina okom nololae, owa!. Ae' okom napaewe dei' a'i endilisi.

²⁶ Ine' dembinai king negawa hi'alam amamaga amama hiami. Ea' ae' dei' awalapam a'iam ae' ina umbamahe, owa!. Ae' egawa amamaga amama hiami ina mandambaho'ma naep maloma aligah ine'imi, owa!. Ine' natolom negawam ea!. Dei' main, amamaga amama ina mataga mandambaho', owa!.

²⁷ Dembinai king Agripa, ine' nembale'a basef Godi amam profet fowa' mawalipasami o owa!? Ae' egawa ine' nembale'am!"

²⁸ Ea' king Agripa na'ipa Pol na'i, "Nogota anama bandana ine' na'i nenda'e etaga Kristen?"

²⁹ Ea' Pol na'i, "Nogota bandana o laona andeande!. Ae' anda betena God na'ama. A'i

nambimb ine' neloma epes isima hiesi dei' pamel' basef ae'ami petaga Kristen na'ama etin si'i ae'. Ea' sen anama nowa' ae'i, andaiwa'ma nowa'epa."

³⁰ Pol na'iam na'ama ea', dembinai king nali' nohafel naitu naloma Bernaisi saloma gavman dembinai saloma epes isima sape salomasi.

³¹ Ea' sawis ande!. Esis etis sanda'ipama sal'i, "Aman anama ina nanda' anom amamaga awami ma noga' o nonda' kalabus, owa!."

³² Ea' Agripa na'ipa Festus na'i, "I'i aman anama inanofala gavman dembinai Sisar ma nome'anama kot, ine' netagahana nofo'o wafifina."

27

Amam soldia manda' Pol nafe' anona sip nafe' Rom

¹ Ea' anom dambami Rom ma'i basef mandame'mama afa' ofa' sip ofe' etap hiagoma Itali. Ea' anom dambami masapa' Pol naloma enis epes sanda' kalabusi ma anona soldia dembinai Julius numafias. Anan anona amam soldia gavman dembinai Sisari.

² Ea' afa' walata anona sip nafi' Adramitiumi. Sip anama na'i nefel' anona wambel nepe naoh amama etap hiagoma Esia. Afa' wafe' ea' anona aman Aristarkus Tesalonaikainai ma etap hiagoma Masedonia nafe' nalomafa.

³ Wafilu wafe' wail anona wambel Saidon. Ea' aman anama Julius numafi Pol nanda' waf bu'unai ma anan. Na'i aho'ma anan nefel' niti alupusi ananisi ma nofa' gwa'aimi maima esis.

⁴ Afa' wakwaha Saidon wafe' ea' uf naluwi anama afa' wa'i weafe'ma. Ea' wafe' anona ailan Saiprus wa'ol uf a'agoma.

⁵ Ea' wafe' watopa' naoh wafe' felefele'ma etap hiagoma Silisia naloma Pamfilia ea' wafe' watagama anona wambel Maira etap hiagoma Lisia.

⁶ Wambel anama Julius nati anona sip nafi'i Aleksandria na'i nef'e' etap hiagoma Itali. Ea' na'ipafa wafe' walata sip anama.

⁷ Wafe', sip anama nafe' sa'osa'ombel ama anom nimeguf hi'alam. Wanda'am noma'w nahafa ea' wataga felefele'ma anona wambel Nidus. Uf nalo lu'una nili'akwafa ea' ina ata' wafe' mehip, owa!. Ea' wafe' anona ailan Krit wa'ol uf owa'ma felefele'ma etap Salmone da'malifinama.

⁸ Wanda'am noma'w nahafa ea' waila naoh atom wafe' felefele'ma akata ailan anama Krit. Wafe' nogota laona ea' wataga anona wambel Fasiguma Sip Naila. Anama felefele'ma wambel lu'wagoma Lasea.

⁹ Nimeguf hiami mafe' hi'alam, nemaf anama esis Juda sakwaha gwa'aimianai hi'alana ea' anom nimeguf wapot'i!. Nogota anama naoh manda'am fepo. Ina nogota bo'onama sip neafe', owa!. Ea' Pol na'ipasa basef esis na'ama na'i,

¹⁰ "Ipe' amam, peme!. I'i dei' afa' weafe'ma, nambimb otagama nimanimi ea' amamaga hiami higililam. Ina hiahaom maim atom moloma sip higililam, owa!. Ambagof afa'imi wapot'i nambimb higililam. Ae' egawam endilisi."

¹¹ Ea' Julius name' dembinai kepten anama numafi amam manda' maol sipi naloma aman

anama ofagenama sipi ina mame' basef Pol na'iами, owa'!

¹² Basis amama sip nafe' naima ina bo'wagon ma sip nilagon nogota anama uf naluwianai, owa'. Ea' amam hiami mape sip ma'i anom basef mandame'mama ma'i mokwaha wambel anama mafe'. I'i amam la'ifim, ma'i mefe' motaga ulal basis amama Finiks ea' mope anama nogota anama launai uf lu'unai naluwianai. Basis amama Finiks mape ailan anama Krit. Anama bo'wagoma ma sip nofe' nondambaho'ma uf naluma. Basis amama mape la'afena aon natefima nowalama.

Uf lu'unai nalo naoh manda'am fepo kwapete'am endilisi

¹³ Sape nogota bandana nafe' ea' uf so'unai nalo nafi'i aon natopa' nowalama ea' ina la'ifina, owa'. Ea' amam ma'iam ma'i atuwasi amam mofe' andeande' si'i ukup amamumi ma'i. Na'ama magiai anka nalatai ea' wafe' waila naoh atom felefele'ma bandagoma ailan anama Krit.

¹⁴ Nogota laona uf la'ifinai sa'i taleo naluwi nalo nafi'i ailan anama Krit.

¹⁵ Namboma sip anama ea' ina la'ifina neafe' anama uf nalu nafi'ima, owa'. Ea' wapoma uf atona nefalip' sip nafe'.

¹⁶ Wafe' anona ailan wa'ol uf a'agoma sofalagon sa'i Kauda. Wanda' maol lu'unai endilisi ma owa' bot so'unai nail la'ifina.

¹⁷ Ea' amam magiai bot anama so'unai nalatai sip ilif ea' mowa' sip la'afen ma anom mandelef la'ifina nail. Amam umbamaham endilisi ma

mefe' mieil anama wesan aonai na'oma, fele-fele'ma etap hiagoma Libia, Afrika. Ea' mataga-hai sel mikila'i.

¹⁸ Uf naloma naoh makoto'ma afa' mehip. Wafilu magi' anom hiahaom nimanimi makwahom mowala naoh.

¹⁹ Ama nemaf nafe'ma wenifi manda' lagof amamumi atom makwaha anom amamaga sel mandelef maim manda' sip nimaninai.

²⁰ Nimeguf hiami afa' ina ata' wati aon ondowa, owa!. Uf lu'unai atona endilisi nakoto'mafa wape na'ama etin. Ea' wa'i nambimb ina ofe' otaga anagon andeande', owa!. Wa'i higililafa etin.

²¹ Nimeguf hiami amam ina ata' ma' gwa'aimi ea' Pol nohafel naitu la'afena amam na'i, "Ipe' peme'. Fowa' ipe' andeande'ma peme' basef ae'ami ma afa' ina okwaha Krit ufi'i ulal. I'i onda'am na'ama, afa' ina dei' ofa' nimanimi amama, ea' amamaga hiahaom maim afa'imi higililam, owa!.

²² Ea' dei' a'ipipa afela ukup ipe'imi mope la'ifim. Ina nambimb anona aman afa'inai nef'e higililana, owa!. Sip atona higililana.

²³ Dei' maina ae' egawa amama? Ae' aman Godi anda' lotuma anani. Do'ok owamb anona ensel Ananinai nafi'i naitu felefele'ma ae'

²⁴ na'ipi na'i, 'Pol, ine' owa' umbamehena, owa!. Ine' nambimb nef'e nitu naep gavman dembinai Sisar. Ea' ine' neme', epes hiesi isima sape salomena sipi, isima God nambimb nigiambamas. Ea' ina atuwasi enin higililan, owa!.'

²⁵ Dei' main, ae' embale'efa God anan nambimb nonda' amamaga amama motaga si'i

na'ipiam.

²⁶ Ea' afa' ata' ofe' wil anona ailan anama otamba ma'oma."

²⁷ Owambeh amama wikifah biam tol wala etin wafe' naoh amama Adriai. Owamb la'afen aon nahagasom amam mumafi hiahaom sipi mogawa ma'i sip nafe' nataga felefele'ma anona ailan.

²⁸ Ea' mala mandof si'i ikwaf nowala naoh mondola'wifagon nihi'ambam na'i 40 mita, laogon atona. Ea' wafo'o felefele', walana wapot'i mondala'wifagon na'i 30 mita, ina laogon, owa'.

²⁹ Ea' amam umbamaham ma'i, "Na'ama mofe' etin la'ifim mope anom otamba anama otambaguma."

Ea' makwaha anka biefina biefina nowala sip anama naila ma mombalo'a sip nail. Ea' amam ukup ma'i aon alipunai ata' nitefi mehip.

³⁰ Amam manda' maol sipi ma'i ata' magolopa eafa mokwaha sip mefe'. Ea' mala bot so'unai nowala mambaso'am ma'i mokwaha anona anka nowala sip anama naila.

³¹ Ea' Pol na'ipa dembinai soldia Julius naloma amam soldia na'ipam na'i, "I'i amam amama owa' mope sip la'la'ef, atuwasi ipe' awepa hig-ililipa."

³² Ea' amam soldia matopa' mandelefa bot so'unai anama nowala naoh.

³³ Ea' felefele'ma aon na'i nitefi, Pol na'ipam basef amam hiami. Anan na'i nondam motaga la'ifim mea' anom gwa'aimi. Ea' na'i, "Nogota launai ipe' pape etin ina pa' anom gwa'aimi ea' pape umbamahepa ma amamaga amama meatagamipei. Ipe' pape etin nimeguf amama 14-peleim ea' pafli'i pataga nemaf dei'inai.

³⁴ Dei' a'ipipa mehip, a'i ipe' ata' pea' anom gwa'aimi ma petaga la'ifipa. Peme', ina atuwasi anom amamaga motaga mohambombagepa, owa!. Pepe andeande!."

³⁵ Anan na'iam na'ama, nafela anona bret naep amamumi nanda' beten nanifela God, nawalona na'ana.

³⁶ Ea' amam hiami ukup bo'om ma' gwa'aimi wapot'i.

³⁷ Afa' hiafai wape sip wataga 276-peleifa hi-afai.

³⁸ Amam ma'am ea', makwaha wit mowala naoh ama sip ata' sofalina.

Sip palalana awasina hi'alana

³⁹ Aon natefima lala, amam mati anona etap ea' amam ina mogawa etap anama akata, owa!. Amam mati anom basis sip nafe' naila nondola' nawis endilisi. Ma'i i'i la'ifim, dei' monda' sip nondowasa' wesan akata.

⁴⁰ Ea' matopa' mandelefa anka anama hianai makwahom mala naoh. Ea' matagaha mandof manda'am mowa' stiaimi, mandola sela uf nofa' sip nafe' akata.

⁴¹ Ea' sip la'afina dogwala wesan la'ifina nail. Nali'ma la'ifina endilisi nape otamba. Ea' naoh mowa maha sip nagi'ma ea' kwa'alana.

⁴² Ea' amam soldia ukup amamumi ma'i moha amama manda' kalabusi afum hi'ilam, ama amam ina ata' mopaol mofa' mefe', owa!.

⁴³ Ea' dembinai soldia Julius na'i nigiambama Pol. Ea' na'ipam na'i ina moham afum, owa!. Mope. Ea' na'ipa amam amama mogawa paoli ma motoma mukupa' mopaol mofe' akata.

44 Ea' anom mololama paoli, mohapila palag maim la'if'im moloma endah sip anama kokwa'alami mohapilam tol mola naoh mofa'am mofe' akata. Afa' wame' basef ananimi wanda'am na'ama, dei' afa' hiafai wafe' be'efa wataga waitu naoh akata.

28

Pol nape anona ailan Malta

1 Afa' wafe' wataga andeande' akata, ea' wame' esis sa'i ailan anama Malta.

2 Epes sape wambel anamai sanda'mafa waf bu'unai endilisi. Asaf nalai ea' nomanamb mafa. Ea' sakata nif sa'ipa afa' hiafai wafe' wapoma nif.

3 Ea' Pol nafe' nafela nif nawamonam. Ea' anona yul nahasi nape nif mahi'ana nawisi ande' nona' lagel Poli nalelef yuli mawis nomon.

4 Ea' esis amam nematawa wambelisi sati yul anama nana' lagel Poli nail, esis sa'i, "Endilisi, aman anama naha epes saga'i. Anan ina afuna naoh embel, owa!. Ea' god anama ape'inai nagwa waf andeande'i nandaiwa'ma nope ambal namunai wapoti."

5 Ea' Pol niali' lagel yul pele'atana nafe' nowala nasef nif ea' anan ina awesina, owa!.

6 Ea' esis sape sahafana sa'i siti lagel nolata ea' anan nowa afuna, owa!. Esis sape satolona ea' ina sati anom amamamaga matagamana, owa!. Ea' samboma ukup sa'i basef sa'i, "Ahalomafa, Pol anon anona dembinai god."

7 Etap nape felefele'ma anama afa' wapoma etap anama anona aman dembinai numafi esis sape ailan anamai, agilinama Publius. Aman

anama nofa'afa wafe' ipat ananinai numafiafa
andeande' wape walomana nimeguf wanom.

⁸ Publius ahalomana awesina na'oh. Alop
ananinai nifina ea' naka embel atom. Ea' Pol
nafe' nasa lagel alop ananinai nataga bo'ona
wapoti'.

⁹ Amama mataga ea', enis epes sape ailan
anamai hiesi awes nanda'esi safi'mai anan
nanda'masa beten sataga bo'wes wapoti'.

¹⁰ Ea' esis sase'afa amamaga bu'wami wa'i
weafe', sase'afa amamaga hiami afa' leifamami
ea' sofa'am sambe'mafam sip afa' weafi'anai.

Pol nafe' nataga wambel lu'wagoma Rom

¹¹ Afa' ata' wape aomb wanom ailan anama.
Anom nimeguf mafe'ma ea' walata sip anama
nail ailan anama nogota anama uf lu'unai
naluwi. Sip anama Aleksandria atona. Agili-
nama sa'i sahalomana owalomana amam atom
mape mambap atona. Amam amama nogamana
biam anona god baso'omunai Sus. Ea' afa' wak-
wahogon wafe'.

¹² Wafe' wataga Sirakyus wape nimeguf
wanom.

¹³ Wakwaha anama wafe' wataga Regium. Ama
nemaf nag'i'i uf lu'unai nalo nafi'i aon nowalama,
ea' wataga anom basis Puteoli.

¹⁴ Wambel anama afa' wati enis Kristen. Ea'
sa'ipafa wape walomas wik si'inai. Wape ea'
wafe' Rom.

¹⁵ Esis Kristen sape Romi same' basefa afa'
wafi'i, enis safi'i sotambel Maket wambel Apiusi,
ea' enis safi'i sotambel wambel agel anama sa'i
ifagw wanom sanda' fi'i fe' sapeimi. Ea' satolofa

eaf. Pol nati esis, nandanifel nanifela God okom ananinai bo'ona.

¹⁶ Afa' wafe' wataga Rom, gavman Romunai na'i aho'ma Pol atona nope anona ipat noloma anona soldia numafiana nope la'ela'ef.

Pol nawalapa basef bu'wami ma esis Rom

¹⁷ Nimeguf wenif mafe'ma ea', Polnofalai amam agufumi Judai mafi'i mandatama etifiggin. Ea' na'ipam na'ama na'i, "Ipe' sahope, ae' ina anda' anom amamaga ahambombaga epes ape'isi ma esambala waf amam bafapapa ape'imi, owa'. Ea' amam dambami Judai manda' kalabusima ae' Jerusalem ea' manda'e afi'i lagof amam Romi.

¹⁸ Amam Rom mame' basefa kot ae'anai, ae' basefa waf aonai ofagema owa'etina moha ega'. Ea' ma'i motagahe.

¹⁹ Ea' amam Juda mosambala basef amama. Na'ama dei' ae' eaf a'e ma efe' wafifiwi. Ea' efala gavman dembinai Sisar ma nome' kot ae'anai. Ea' ae' ina enda' kotima epes ae'asi ma anom amamaga, owa'.

²⁰ Basef ofagema amama atom dei' efalepa pafi'i. Ae' a'i i'pipa anom basef. Ae' embale'ef ape ehafa anan anama ape' Israel hiapai mape mohafanai. Ae' embale'efanai. Amama atom ofagema ma dei' manda' sen anama mowa'e."

²¹ Ea' amam ma'ipana ma'i, "Anom Judaimi ina manda' anom basef mafi'i ma ma'ipafa ine', owa'. Ea' ina anona aman Judainai nafi'i nape na'ipafa andeande'ma na'i anom basef awami ma ine', owa'.

22 Ea' afa' wa'i ome' okom ine'inai atoma malogel ine'inai. Afa' ogawa, wambel hiagoma esis amam nematawa sanda' basef awami ma epes hiesi wambota anama.”

23 Ea' amam mandandepa anona nemafa amam hiami maf'i ipat Poli. Ea' maf'i kuhimbita mape mape mataga wambomota, anan na'i basef ofagema nawalipam. Ea' nawalapa basef alihima epes siowis wambota Godi numafias. Anan nawalapa anom basefa mi'uli fowa' gani God naso' Mosesanai maloma basef Godi amam profet fowa' ma'iами. Ama basef amama anan na'ipama basef la'ifimi nafela ukup amamumi ma mombale'efa Jisas.

24 Anom mombale'efana ma basef ananimi, ea' anom owa' mombale'efana.

25 Ea' ukup mape na'ama ea' mafe'. Do'ok Pol nali' na'ipama anom basef na'ama na'i, “Ambal Bu'unai Godi na'i endilisi etisa amam akupapa ape'imi ma malogel profet Aisaia. Fowa' anan na'i na'ama na'i,

26 ‘Ine' fo'mago esis amam nematawa isima ni'ipas na'ama ni'i. Anona nemaf ipe' pepe peme' basef, ea' ipe' ina pegawa ofagema, owa'. Ipe' pepe naep motawa ea' ipe' ina piti anom amamaga pegawam, owa'.

27 Dei' main, ukup epes amam nematawa isima mase'as ea!. Ukup asasimi aoma some' basefa aligah asasimi, sasopama naep asasimi. I'i owa', esis siti amamaga ea' some' basef aligah asasimi ma ukup mopoma basef ofagema samboma opalef sotanima sifi'mai ae' ma enda' esis bo'wes wapot'i, owa!'”

²⁸ Ea' Pol na'ipam basef akutaimi na'i, "Dei' ae' a'i ipe' pegawa basefa God nofa'apa nok-wahomapa waf aonai motanima mufi'mai anan. Amama anan nasapa'am mafe'ma esis amam nematawa sololama Godi. Esis isima nambimb sila basef amama, ea' ipe' owa!."

²⁹ Pol na'ipam basef amama, amam dambami Juda mafe!. Ea' ma'i basef lu'wami ma'iam mandahihihanamam la'afena amam atom.

³⁰ Amama mafe'ma ea', Pol nepe la'ela'ef afagof biam si'im ipat anama anan natalonai ea' nase'as opaf nanda'mas waf bu'unai epes hiesi safi'i satolonai.

³¹ Anan nawalapa basef bu'wami ma epes siowis wambota Godi numafias. Ea' nawalipasa basefa dembinai Jisas Krais. Anan ina umbama-hana, owa!. Nawalapam na'iam alihim ea' ina enin epen nafi'i na'ipana na'i owa!.

BASEF BU'WAMI GODI

**The New Testament in the Filifita Language (Ilahita Dialect), East Sepik Province, PAPUA NEW GUINEA
Nupela Testamen long tokples Filifita long Niugini**

copyright © 1998 Wycliffe Bible Translators, Inc.

Language: Filifita (Filifita dialect of Mufian)

Dialect: Filifita or Ilahita

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-18

PDF generated using Haiola and XeLaTeX on 28 Dec 2024 from source files dated 9 Oct 2020

042dd872-74b3-5958-88ef-d4db936348e2